

O le Olaga
Fa'apa'iaina



O Su'esu'ega o le Tusi
Pa'ia Mai le

O Su'esu'ega o le Tusi Pa'ia Mai le

O le Olaga Fa'apa'iaina

Copyright (C) 2002 e le Revelation Publications
All Rights Reserved world-wide.

Tulaga mo le Fa'aaogāina

O nei su'esu'ega fa'asolo ua faia ina ia maua ai i se tau e taugofie ma mafai ai ona fa'asoa atu i isi. Fa'amolemole ia va'ai i la matou tuātusi o lo'o i lalo pe a i ai ni fesili pe mana'omia e iloa nisi galuega e fa'atatau i nei matā'upu. O nei mataā'upu e mafai ona kopiina ma fa'aaogā, a e lē tatau ona suia se mea lava e tasi pe fa'atau atu fo'i i se isi. E fautua atu i isi vaega o le ekalesia i atunu'u 'ese'ese ina ia fa'aaogā nei su'esu'ega mo le fa'asalalauina o le tala lelei. E mafai ma e tatau ona tusi mai i lē o lo'o lolomiina nei matā'upu ina ia fa'atagaina le fa'aliliuina po o le fa'aaogāina o su'esu'ega i la outou galuega lautele.

www.Bible-Lessons.org

publisherforGod@gmail.com

O fesili ma le tu'ufa'atasiga - Merlin Beerman

Ata Fa'amalamalama - Aiā (C) Justinen Creative Group, Inc., Nampa, ID

Fa'atonu o le Fa'ava'a - Adam Dean

Fa'a-Samoaina - Abbie L Watt

Fa'atonu o le Fa'a-Samoa - Florence Lam Yuen Voigt

O manatu fa'aopoopo e si'i mai fa'asologa o mata'upu ma tala na tusia e E.G. White ma fa'amaopoopoina ma

lomia i le tusi

O le Olaga Fa'apa'iaina

Lolomiina i le U.S.A. - 3

UPU MO LE FAITAU TUSI

Ua matou fiafia ona ua e maua le Fa'asologa o Su'esu'ega Fa'ale-Tusi Pa'ia e fa'atatau i A'oa'oga Fa'afa'atusa a Keriso. Matou te tatalo o le a e fa'aaogā nei lesona ma ia tosina latalata ai 'oe iā Keriso; o Lē o lo'o ofo mai iā te 'oe ia 'avea ma uō, o le filemū, ma le ola e fa'avavau.

O lenei su'esu'ega ua ofo atu o se meaalofoa mo 'oe mai le a'oga o le Tusi Pa'ia. E fa'aaogāina e lau a'oga lenei su'esu'ega i se tasi pe lua ni auala e ui ai.

Atonu e i ai pe leai fo'i i tua o lenei su'esu'ega se vaega o lo'o ta'u mai ai tali i fesili. A o i ai e mafai ona e va'ai i ai ma fa'amaonia ai au tali. Pe a uma le fa'asologa o tali, a e mana'o i ai, e mafai ona maua sau pepa fa'amaonia mai le a'oga e sainia e se tasi o faia'oga.

Pe a o i ai se tuātusi a e leai se vaega o lo'o maua ai tali o fesili, e mafai ona e meli mai lau su'esu'ega ina ia fa'amaonia ma sainia lau pepa pe a ua mae'a lelei lau matā'upu.

O mea uma e te aumaia mo fa'amaoniga o le a toe fa'afo'i atu, fa'apea nisi matā'upu po o ni matā'upu fa'aopoopo e te talosagaina. Pe a i ai ni āu fesili i so'o se taimi, fa'amolemole fa'ailoa mai ma o le a taumafai ia maua vave atu sau tali mai se faia'oga o lenei a'oga.

Atonu o 'oe o se Kerisiano i lou olaga atoa, po o le avanoa muamua lenei ua e filifili ai ia a'oa'oina 'oe fa'atatau i le alofa ofoofogia o Iesu; pe o le ā lava le tulaga, o lenei taimi o le a e fa'aalu i le su'esu'eina o le Afioga a le Atua o le a 'avea ma fa'amanuiāga tele. Ia fa'atumulia e le Ali'i 'oe i le filemū a o e sa'ili ia e iloa atili o Ia.

(Suggestions for individual study)

MANATU MO SU'ESU'EGA E FAIA TA'ITO'ATASI

(1) TATALO MO LE O TA'ITA'IGA

O taimi uma e te su'esu'e ai, ia e tatalo mo le malamalama ma le ta'ita'iga a le Agaga Pa'ia. Ia matala lou mafaufau a o e sauni atu i lau su'esu'ega. Ia tau mamao mai manatu mua'i fa'avae o le a tau fa'atosina 'ese ai lau sa'iliga mo le 'upu moni.

(2) FAITAU LELEI LE FESILI

Ia faitau fa'atelegese fesili ta'itasi ma fa'atele se taimi e fa'aaogā ia manatunatu loloto ai ma ia e malamalama ai. O le a i'u ai i se manuia tele mai lau su'esu'ega.

(3) SA'ILI LE TALI

Fa'aaogā so'o se Tusi Pa'ia e va'ai ai i le fa'asino tusi o lo'o i lalo o le avanoa mo le tali. Faitau le fuai'upu ma fa'asino mau ina ia maua se malamalamaga i a latou so'otaga. Tusi i lalo se tali manino i le avanoa o i le su'esu'ega. A e mana'o e fa'amaonia lau tali, ia e va'ai i le

vaega e i ai tali o lo'o i tua o le su'esu'ega. A mana'o ia malamalama atili, faitau ma fa'atusatusa le fuai'upu mai le fa'asino tusi ma nisi fuai'upu e tau i ai mai fa'aliliuga 'ese'ese o le Tusi Pa'ia. Fa'aaogā se paea'iga o 'upu (concordance), fa'asino matā'upu (references), ma se tusifau'upu (dictionary) ina ia mafai ona va'ai ai i 'upu e lē o malamalama ai ma sa'ili isi mau e tau i ai.

(4) MANATUNATU LOLOTO I FA'AI'UGA

Toe faitau fesili ma tali, ona faitau lea o manatu fa'aopoopo (commentary). Manatunatu loloto i le tāua o mea o lo'o su'esu'eina ma tatalo mo le poto mai le Ali'i ia maua se fesoasoani ia e iloa lona fa'aaogā tatau mo lou olaga.

(5) FA'AAUAU PEA LE SU'ESU'E

O la matou tatalo ia e su'esu'e pea le Afioga a le Atua. Matou te fa'amalosi atu ina ia e feso'ota'i ma le pogai o lenei su'esu'ega ma ia maua nisi matā'upu e tosina ai 'oe ma maua ai se fesoasoani i lou tuputupu a'e fa'aleagaga.

(Suggestions for Group)

MANATU MO SU'ESU'EGA I SE FA'APOTOPOTOGA

(1) FILIFILI SE E TA'ITA'I

E tāua le filifili o se tagata e to'atasi e ta'ita'i i la outou su'esu'ega. E mafai ona filifili se faife'au, se ta'ita'i ekalesia, po o le fa'asoa o lea tiute e ni tagata mai le fa'apotopotoga. O le tiute tau'ave o le ta'ita'i o le fa'aauau o le talanoāga o taualumaga taulemafaufau ma fa'amalosi tagata uma ia 'auai i le talatalaga.

(2) FUAFUA AUALA E SU'ESU'E AI

Filifili e le fa'apotopotoga pe fa'aaofia ai matā'upu mai fafo i a outou su'esu'ega. O le taimi o le su'esu'ega e aupito manuia pe a fai ma autū tusi fau'upu fa'ale-Tusi Pa'ia.

(3) SU'ESU'E LE LESONA

Fautua i tagata ta'ito'atasi o le 'au su'esu'e ia su'esu'eina le lesona a e le'i o'o i le taimi e fa'atasi ai. O lenei mea o le a maua ai le fa'amanuiāga e aupito sili mo tagata ta'ito'atasi ma e fa'alauteleina ai le agava'a i talanoāga o matā'upu.

(4) AMATA I LE TATALO

O taimi uma tou te fa'atasi ai ia vala'aulia le Ali'i e fa'atasi ai i la outou su'esu'ega ma ia 'avea le Agaga Pa'ia ma la outou ta'iala.

(5) FAITAU LELEI FESILI

E tatau ona faitau e le ta'ita'i o le su'esu'ega fesili pe filifili se isi mai le fa'apotopotoga.

(6) FAITAU TALII MA MANATU FA'AOPOOPO

E mafai ona filifili nisi mai le fa'apotopotoga ia tali mai ma aumai manatu fa'aopoopo e tau i ai. Pe a totoe se taimi, fesili i ai mo tali mai fa'aliliuga 'ese'ese ia fa'alautele ai le felafolafoa'iga ma ia malamalama atili ai.

(7) TALANOĀGA

E maua le manuia sili pe afai e lē lauga atu le ta'ita'i i le fa'apotopotoga a e ia ta'ita'i lelei le su'esu'ega. E lelei le fa'amalosia o tagata ta'ito'atasi e tu'u atu se manatu i le mea e mafai. Ia lē faia se tautalaga na o se tagata e to'atasi. E tatau i le ta'ita'i ona fa'alototele tagata uma ia talia manatu ma lagona o isi e ui ina lē tutusa taofi.

(8) MOLIMAU

Ia fa'aavanoa se taimi i le amataga ma le fa'ai'uga o fa'atasiga uma mo ni molimau pu'upu'u. E mafai ona fa'alaua'itele pea ia na o le matā'upu o lo'o su'esu'eina.

FA'ASINO MATĀ'UPU

(Table of Contents)

Fa'atomuaga	Itulau
'Upu mo le Faitau Tusi	2
Manatu mo Su'esu'ega mo le To'atasi	2
Manatu mo Su'esu'ega i se Fa'apotopotoga	3
 Lesona	
1. O le Fa'apa'iāga Moni	6
2. O le Fa'aa'oa'o a Tanielu	13
3. O le Pulea o Mana'oga ma Tu'inaanau	18
4. O le Ogāumu 'A'asa	24
5. O Tanielu i le Lua o Leona	29
6. O Tatalo a Tanielu	32
7. O le Amio a Ioane	36
8. O le Soifuāga ma le Galuega a Ioane	41
9. O Ioane ua Fa'a'aunu'ua	46
10. O le Amio a le Kerisiano	53
11. O le Fa'apa'iāga - Avanoa Fa'apitoa	59

O le ā le Fa'apa'iāga Moni

Lesona 1

(1) E FA'APEFEA ONA FA'AMATALAINA E LE TUSI PA'IA LE FA'APA'IĀGA E ATO'ATO'A?

Ia ato'atoa ona fa'apa'iaina o outou e le Atua lava e ōna le manuia; ia tausia lava lo outou agaga atoa uma, i le ma le loto, atoa ma le tino, ia lē mata'uleagaina, i le afio mai o lo tatou Ali'i o Iesu Keriso.

I Tesalonia 5:23

O le fa'apa'iāga (fa'amāmā po o le fa'apa'iaina) ua tu'u mai i le Afioga Pa'ia e fa'atatau lava lea i le tagata atoa - o le agaga, mafaufau, ma le tino. O le manatu moni lenei o le fa'apa'iāga ato'atoa. Na tatalo Paulo mo le ekalesia i Tesalonia ina ia mafai ona latou 'oli'oli ona o lenei fa'amanuiāga tele. "Ia ato'atoa ona fa'apa'iaina o outou e le Atua lava e ōna le manuia; ia tausia lava lo outou agaga atoa uma, i le ma le loto, atoa ma le tino, ia lē mata'uleagaina, i le afio mai o lo tatou Ali'i o Iesu Keriso" (I Tesalonia 5:23).

(2) O LE Ā LE 'UPU MONI E FA'AALIA MAI E I LATOU UA FA'APA'IAINA?

Auā ua agasala tagata uma lava, ma ua lē o'o i le vi'iga mai le Atua.

Roma 3:23

E i ai i le lalolagi o talitonuga se manatu e uiga i le fa'apa'iāga e sesē ma e faigatā lona a'afiāga. O le to'atele o i latou e ta'u mai ua fa'apa'iaina e lē iā i latou le mea moni, ona o lea fa'apa'iāga e na o 'upu ma tapua'iga e loto i ai. O i latou uma e sa'ili ma le fa'amaoni le amio Kerisiano e ato'atoa, o le a lē manatu o latou e lē agasala. Atonu o latou olaga e agatonu, atonu o lo'o ola latou i se olaga e fa'aali atu ai le 'upu moni ua latou talia. Peita'i o le tele o le pulea o latou mafaufau e tumau ai i uiga moni o Keriso, ma o le latalata atu fo'i o i latou i Lona fa'atusa, o le a atili manino ai ona latou malamalama i lona mamā ato'atoa, ma o le a atili lagona ai e i latou lo latou lava tulaga lē ato'atoa.

(3) O LE Ā LE MEA E FA'AMAONIA AI LE LĒ TONU PE A TA'U MAI E LE TAGATA AGASALA LONA IA LAVA AMIOTONU?

Afai 'ou te ta'uamionuina a'u e a'u, e fa'asalaina a'u i lo'u lava gutu; afai 'ou te fai atu, ua sao la'u nei amio, e ta'ua ai a'u o le fa'api'opi'o.

Iopu 9:20

Auā ua lē iloa e i latou le amiotonu mai le Atua, ma ua sa'ili e fa'atū la latou lava amiotonu, ua latou lē usiusita'i ai i le amiotonu ma le Atua.

Roma 10:3

Pe a ta'u mai e le tagata o ia ua fa'apa'iaina, ua tu'u mai ai lava le fa'amaoniga o ia o lo'o mamao mai le fa'apa'iāga. Ua lē mafai ona ia iloa lona vaivaiga ma mea o lo'o ia mana'omia. Ua va'ai ia iā te ia ma fa'apea ifo o ia o le fa'ata o le fa'atusa o Keriso, ona e na te lē o iloa lelei o Ia. O le tele o le mamao o le vā ma le Fa'aola, o le sili a'e fo'i lea o le tulaga fa'aafiamiotonu i lana lava va'ai.

(4) O LE Ā LE ALA E ILOA AI LE LOTO UA FA'APA'IAINA?

A o i tatou uma, o lo'o va'ava'ai i tatou i le pupula o le Ali'i e peisea'i o i se fa'a'ata ma o tatou mata, e lē ufitia, ua liua ai i tatou ua foliga i ai nai le pupula e o'o i le pupula, fa'apei ona mai le Ali'i le Agaga.

II Korinito 3:18

Pe a ua tatou salamō (ona o agasala) ma fa'amaulalo a o tatou mafaufau loloto iā Iesu, o Lē na tuia ona o a tatou agasala ma na tau'aveina a tatou fa'anoanoāga, atonu o le a mafai loa ona tatou savavali i Ōna tulaga 'a'ao. Pe a tatou va'ai iā te Ia o le a suia ai i tatou e fa'apei o Ia. Ma a faia lenei galuega iā i tatou, o le a lē fa'ailoaina mai so tatou lava amiotonu, peita'i o le a fa'aeaina Iesu Keriso a e fa'apipi'i atu o tatou agaga lēaogā i Ōna uiga e tonu ma lelei.

(5) E TATAU ONA FA'APEFEA ONA TATOU FAIA GALUEGA FESOASOANI IA LELEI?

A ē avatu ni mea alofa, 'a'ua ne'i iloa e lou lima tauagavale le mea ua faia e lou lima taumatau; ina ia lilo au mea alofa; o lou Tamā fo'i, o lē silafia i le mea lilo, o Ia lava na te avatu fa'aaliali se tau'i iā te 'oe.

Mataio 6:3, 4

Na Ia a'oa'o Ōna so'o ia iloa o le itu'aiga talitonuga e sili e fa'aali manino mai ai e filemū ma e uiga fa'amaulalo. Na Ia laapata'i atu ia faia filemū a latou galuega lelei mo isi; ia lē faia ia fa'alialia, e lē ina ia vi'ia pe fa'aaloaloina ai e tagata, a e faia ia fa'amamaluina ai le Atua, ma ia tauia i latou i se taimi mulimuli. Pe a faia galuega lelei ina ia vi'ia ai e tagata, o le a leai se tau'i mo i latou mai le Tamā i le lagi.

(6) E FA'APEFEA ONA TATAU ONA TATOU TATALO?

A o 'oe, pe a e tatalo, inā ūlu atu ia i lou afeafe, ma pupuni lona puipui, i le e tatalo ai i lou Tamā o i le mea lilo; o lou Tamā fo'i o lē silasila i le mea lilo, na te avatu fa'aaliali se tau'i iā te 'oe.

Mataio 6:6

Sa a'oa'oina so'o o Keriso ia 'a'ua ne'i tatalo ina ia lagona mai e tagata. "A o 'oe, pe a e tatalo, inā ulu atu ia i lou afeafe, ma pupuni lona puipui, i le e tatalo ai i lou Tamā o i le mea lilo; o lou Tamā fo'i o Lē silasila i le mea lilo, na te avatu fa'aaliali se tau'i iā te 'oe" (Mataio 6:6). O nei fetalaiga a Keriso na fa'ailoa ai e Na te le'i talia ia itu'aiga amio fa'afiaamiotonu sa ta'atele i le 'au Faresaio. O Āna a'oa'oga i luga o le mauga na fa'ailoa mai ai o galuega e faia ma le alofa e fa'atinoina ai uiga lelei ma tapua'iga fa'aleagaga e fa'aalia ai le manogi pe a faia ma le agaga fa'amaoni, i le salamō ma le loto maulalo. O le uiga mamā e fa'apa'iaina ai le gaoioiga.

(7) O LE Ā LE ALA E O'O AI I LE FA'APA'IĀGA?

O le mea lea ia outou gaua'i ai i le Atua; ia outou tete'e atu i le ti'apolo, ona sola 'ese ai lea o ia iā te outou.

Iakopo 4:7

O le fa'apa'iāga moni o le tausisi atoa lea i le finagalo o le Atua. O le a to'ilalo ai manatu ma lagona fouvale, o le a fafaguina e le si'ufofoga o Iesu le ola fou ma e afāina ai le tagata atoa. O i latou ua fa'apa'iaina moni o le a lē fa'atāuaina o latou lava manatu ia fai ma tapula'a e iloa ai le sa'o ma le sesē. Latou te lē fa'ailoga tagata pe fa'afiaamiotonu; peita'i e lē manatu iā i latou lava ina ne'i lē fa'ataunu'uina ni folafolaga na faia iā i latou ma lē 'ausia tulaga na fa'avae ai ia folafolaga.

(8) E FA'APEFEA ONA FA'AALIA MAI LE FA'APA'IĀGA MONI?

O lea fo'i tou te iloa ai i latou i o latou fua.

Mataio 7:20

O le to'atele o lo'o ta'u mai ua fa'apa'iaina e matuā lē iloa lava le galuega a le alofa tunoa i totonu o le loto. Pe a tofotofoina ma fa'amaonia, o i latou lava e pei o Faresaio fa'afiaamiotonu. E leai so latou 'ese'esega. Latou te tu'u'ese manatu sa'o ma le fa'autauta a e fa'alagolago na o latou lagona, ma ta'u mai ai sa lagona le fa'apa'iaina i se taimi. O i latou ia e loto ma'a'a ma e fa'ailoa mai pea lo latou tulaga pa'ia i 'upu e tele, a e leai se fa'amaoniga i ni fua lelei e maua. O i latou uma o lo'o ta'u mai pea ua fa'apa'iaina o lo'o fa'auisesē o latou lava agaga ma avatu a'oa'oga e ta'ita'i 'ese ai le to'atele o lo'o naunau fa'amaoni e usiusita'i i le finagalo o le Atua. O ē o lo'o feso'ota'i pea ma i latou atonu o le a fa'alogoina ai 'upu, "E ta'ita'i a'u e le Atua! E a'oa'o a'u e le Atua! O lo'o ola a'u e leai

se agasala!" O le to'atele o i latou e feso'ota'i ma lenei agaga o lo'o fetaia'i ma se mea e pouliuli ma e fa'alilolilo, a e latou te lē mafai ona malamalama i ai. O lenei mea e lē fa'apei o Keriso, e na o Ia le fa'ata'ita'i moni.

(9) E FIA LE UMI O LE A FAIA AI PEA E LE ATUA LE GALUEGA MO LE FAAPA'IAINA O I TATOU?

Ua 'ou mautinoa lenei lava mea, o Ia na amataina le galuega lelei i totonu iā te outou, e fa'a'ato'atoaina ai lava e Ia e o'o atu lava i le aso o Iesu Keriso.

Filipi 1:6

O le fa'apa'iāga fa'ale-Tusi Pa'ia e lē fa'atatauina i ni lagona malosi ona ua faia lea ma tapula'a a e ua ta'ita'iina ai le to'atele i le sesē. Pe a ua lagona le fiafia pe ua fa'amalieina le loto, ona latou fa'apea ai lea ua fa'apa'iaina i latou. O le lagona o le fiafia po o le lē fiafia e lē o se fa'amaoniga pe ua fa'apa'iaina pe o le lē fa'apa'iaina, ma o le fa'apa'iāga e lē o se tulaga e maua fa'afuase'i. O le fa'apa'iāga moni o se galuega o aso ta'itasi, e fa'aauau pea i le olaga atoa o le tagata. O i latou o lo'o fa'afeagai ma fa'aosoosoga i aso ta'itasi, o lo'o tau fa'ato'ilalo uiga agasala, ma o lo'o sa'ili pea mo le fa'apa'iaina o loto ma olaga, e leai ni manatu fa'avi'ivi'i e ta'u atu ai se tulaga ua fa'apa'iaina. O i latou o lo'o fia 'a'ai ma fia inu mo le amiotonu, ma o le agasala e foliga iā i latou e matuā leaga lava.

(10) O LE Ā LE FA'AMAONIGA O LE FA'APA'IĀGA MONI LEA E MATUĀ TĀUA LAVA I LE SILAFAGA A LE ATUA?

'Aua ne'i faia i le tino a latou teuga, o le fili lea o le lauūlu, ma le teuteu i auro, ma le 'o'ofu i ofu; a o le tagata lilo o le loto, ia teua lea i le mea e lē pala, o le loto agamalū ma le filemū, o le mea tau tele lava lea i luma o le Atua.

I Peteru 3:3, 4

E i ai ē ta'u mai le fa'apa'iāga ma e ta'utino e iā i latou le 'upu moni, a e atonu e latou te lē o iloa le 'ese'esega. O le molimau a i latou e fai mai fa'apea o le a 'avea ma pogai o le a lē fa'atasi mai ai le Agaga o Keriso ma i latou, o le a leai se feso'ota'iga ma i latou o fa'atasi ai, a e pe afai o lo'o fa'amaoni i se olaga lē agasala, o le a aumai loa agelu pa'ia i lo latou fa'alapotopotoga, ma o a latou 'upu o le a pei "o moli auro ia i 'ato ario togitogi fa'amamanuina" (Fa'ata'oto 25:11).

I le tau mafanafana, a o tatou va'ai atu i la'au o le vaomatua, ua olaola lelei mai ma atonu e leai se 'ese'esega o la'au uma. Peita'i pe a lata i le tau malūlū, ma ua fa'a'ofu latou e le 'aisa ma le kiona malūlū, o le a iloa ai la'au e olaola pea i lea tau ma la'au e 'ave'esea lau matagofie i lea taimi. E fa'apea i latou uma o ē savavali i le loto maulalo, o le tu'u'ese o latou uiga fa'apito a e u'umau i 'a'ao alofa o Keriso. O i latou e talitonu o latou e amio ato'atoa, e fa'atuatua iā i latou lava, o le a mavae'ese o latou ofu fa'afiaamiotonu pe a o'o mai afā o tofotofoga, a e o ē amiotonu moni, e alolofa ma matata'u fa'amaoni i le Atua, o le a 'o'ofu i le 'ofu o le amiotonu a Keriso, i taimi o le manuia fa'apea ma tofotofoga.

(11) O LE Ā LE FUA E MAUA MAI LE OLA UA FA'APA'IAINA?

A o le fua o le Agaga o le alofa, o le 'oli'oli, o le filemū, o le onosa'i, o le mataalofa, o le agalelei, o le fa'amaoni, o le agamalū, ma le lē gaoiā; e lē fa'atulafonoina mea fa'apenā.

Kalatia 5:22, 23

O le tu'u'ese o le fa'apito, tu'u atu o le ola mo isi, o le faia o mea lelei, agalelei, alofa, onosa'i, fa'amalosi i mea uma, ma le fa'atuatua o le Kerisiano moni, o fua ia i aso ta'itasi e maua mai iā i latou e feso'ota'i fa'amaoni ma le Atua. O a latou amio e lē fa'a'ailoa fa'alaua'itele i le lalolagi, peita'i e fetaia'i pea latou i aso uma ma fete'ena'iga ma le ti'apolo, a e manumalō mai nei sesē ma fa'aosoosoga. E maua pea e i latou le malosi ma le fa'afouina e ala i le tatalo ma le mataāla pea. E lē fa'aailoaina pe mata'i pea faigatā e o'o i nei 'au galulue; peita'i e silafia e le Atua mea lilo o le loto, e silasila la ma ma fa'amaonia taumafaiga uma e faia ma le fa'amaulalo ma le agamalū.

E mana'omia le taimi o tofotofoga e fa'aalia ai le mamā pei o le auro o le amio e alofa ma fa'atuatua. Pe a o'o mai tofotofoga ma puapuagā i le ekalesia, o le a fa'atupuina ma atili fa'atuma le sogasogā ma le alofa mutimutivale o so'o moni o Keriso.

(12) E FAUSIA LE FA'APA'IĀGA MONI I LUGA O LE Ā LE FA'AVAE?

A e ui lava i lea o le fa'avae mau o le Atua e tū lava lea, o lo'o i ai lenei fa'ailoga, Ua silafia e le Ali'i Ōna lava tagata; atoa ma lea, Ia o'ese i le amio leaga i latou uma o ē ta'uta'u le suafa o Keriso.

II Timoteo 2:19

E lagona le fa'anoanoa i le va'ai atu ua ta'ita'iina Kerisiano e ala i manatu sesē ma le suamalie fa'apea o latou e ato'atoa ma mamā, auā e faigatā atu ona toe fa'aui'ese mai le ala sesē ma toe fa'atū latou aga'i i le ala tonu. E faigofie le tosina i mea e lelei mai fafo, a e o le a lē iloa atu ai le matagofie o totonu mai le agamalū ma le loto maulalo o Keriso. O le a o'o mai le taimi e tofotofoina ai tagata uma, le taimi na manatu le to'atele e saogalemū, a e o le a iloa e leai se fa'avae o lea mea. E i ai ē foliga mai o poutū i le fale o le Atua, a e o le a fa'aalia mai o i latou e pei o la'au pala sa valiina ia fa'amatagofie ai i le va'ai. Peita'i o ē loto maulalo, e tāua iā i latou ona pi'imau atu o latou agaga i le Papa e fa'avavau, o le a tūtūmau e lē mafa'agaioiina pe a o'o mai afā o tofotofoga, ona e lē fa'atuatua latou iā i latou lava. "A e ui lava i lea o le fa'avae mau o le Atua e tū lava lea, o lo'o i ai lenei fa'ailoga, Ua silafia e le Ali'i Ōna lava tagata; atoa ma lea, Ia o'ese i le amio leaga i latou uma o ē ta'uta'u le suafa o Keriso" (II Timoteo 2:19).

(13) O LE Ā LE MEA E LĒ SA'ILIA E LE ALOFA, LE FA'AVAE LEA O LE FA'APA'IĀGA MONI?

E lē amio matagā, e lē sa'ilia e ia ana lava mea, e lē fa'aitaitagofie, e lē tu'uina atu i nisi le leaga.

I Korinito 13:5

O i latou e fia fa'aali a latou galuega lelei, e talanoa pea e fa'atatau i o latou uiga e lē agasala ma ta'uta'u atu ia fa'ailoa o latou tulaga fa'aleagaga ua 'ausia, a e ua na ona fa'aali atu ai ua fa'asesēina o latou lava agaga. O le tagata soifua malōlōina e fa'atasi atu ma se agaga fiafia i galuega o le olaga i aso ta'itasi a e na te lē alu atu ma se manatu e fia fa'alialia ōna itū uma i ē latou te fetaia'i i le ala. O le soifua malōlōina ma le tino malosi o tulaga ia o lona olaga ma e lē tau fa'ailoa atu fa'apea ona o lo'o fa'amalieina ia e le tele o fa'amanuiāga.

E fa'apea fo'i le tagata e amiotonu fa'amaoni. E lē manatu lava ia i sona lelei ma le amio atua. Ua 'avea ta'iala fa'aleagaga ma fa'avae o lona olaga ma le amio, ma o le uiga moni lea iā te ia ina ia fua mai fua o le Agaga fa'apei o le la'au e fua mai ai mati po o le la'au e fua mai ai le rosa e matagofie. Afai e matuā mautū i lona uiga moni le alofa i le Atua ma ōna uso ā tagata, o le a ia faia galuega mo Keriso ma le loto fa'amaoni.

(14) O AI O LE A TOSINA I AI LE OLA UA FA'APA'IAINA?

Auā ua fa'atauina outou i le tau; o lenei, ia outou vivi'i atu i le Atua i o outou tino ma o outou agaga, o mea a le Atua ia.

I Korinito 6:20

O i latou uma e i ai i le si'osi'omaga o le olaga o le Kerisiano, o le a va'aia le matagofie ma le manogi o lona olaga, a e o le a ia lē manatu i ai, ona e o gatasi ma ōna uiga masani. E tatalo ia mo le malamalama ma e fiafia e savali i lea malamalama. O lana mea'ai ma le mea inu, o le faia lea o le finagalo o lona Tamā i le lagi. O lona ola e puipuia e 'a'ao o Keriso; peita'i e lē 'avea ma mitamitaga pe fiavi'ia ai. E fiafia le Atua i lē agamalū ma loto maulalo, ē e mulimuli i tulaga'a'ao o le Matai. O agelu e fiafia e fa'atasi ma i latou ma e tumau ma i latou i o latou ala uma. Atonu o le a lē amana'ia i latou mai ē fa'ailoa mai a latou lava galuega lelei, peita'i o agelu a le Atua o le a fa'atasi mai pea ma si'omia i latou e pei o se puipui afi e saogalemū ai.

(15) AISEĀ NA LĒ MAFAI AI E TA'ITA'I FA'ALEAGAGA I ŌNA PŌ O KERISO ONA FA'AILOA MAI LE SOIFUA FA'APA'IAINA O KERISO?

Auā o i latou o ē nonofo i Ierusalema, ma o latou ali'i, ina ua lē iloa e i latou o Ia, ma 'upu a le 'au perofeta ua faitauina i lea sapatu ma lea sapatu, ua taunu'u ai iā te i latou i lo latou fa'asala iā te Ia.

Galuega 13:27

O lo tatou Fa'aola o le malamalama Ia o le lalolagi, a e le'i iloa o Ia e le lalolagi. Sa Ia faia pea galuega alofa, fa'asusulu atu le malamalama i auala mo tagata uma; peita'i Na te le'i vala'au iā latou na fa'atasi ai ma Ia ina ia vi'i'a Lona uiga mamā, Lona lē fa'apito mo Ia lava, le agalelei, ma Lona soifua na tu'u atu mo le lelei o isi. E le'i tāua iā te Ia lea soifuāga. O Lona uiga fa'aleagaga na latou fa'alēaogāina ona e le'i talafeagai ma la latou tapula'a fa'afiaamitonu. Sa talitonu latou e lē lava le tulaga fa'aleagaga o le amio po o le agaga o iā Keriso; auā o lo latou talitonuga e tele i le fa'aalialia, o le tatalo leo tele ia lauiloa e tagata uma, ma ia faia galuega lelei e fa'atāua ai. E ili fa'aleotele le pū mo a latou galuega lelei, e pei lava o ē ta'uta'u mai ua fa'apa'iaina. E fiafia e fa'ailoa mai e leai sa latou agasala, peita'i sa matuā 'ese lea mai le soifuāga atoa o Keriso. E le'i sa'ili e Ia se vi'iga po o se mamalu. O Āna galuega fa'amalōlō ofoofogia na faia ma le filemū, e ui ina e le'i mafai ona taofia le fiafia ma le loto fa'afetai o ē sa maua Āna fa'amanuiāga. E loto maulalo ma agamalū le uiga o Lona soifua. Ona o Lona uiga fa'amaulalo ma le lē fia fa'avi'ivi'i, e matuā 'ese mai o latou olaga, lea na lē mafai ai e le 'au Faresaio ona talia o Ia.

(16) AISEĀ E AUPITO SILI AI ONA TĀUA I FUA O LE FA'APA'IAINA LE AGAMALŪ?

E ta'ita'iina e Ia o ē agamalū i le fa'amasinoga; na te a'oa'o mai fo'i i ē agamalū i Lona ala.

Salamo 29:5

O le fua e aupito sili ona tāua o le fa'apa'iaina, o le maua lea o le loto maulalo. Pe a fa'atasi ai lenei uiga i le agaga, ona fausia lea o le amio e ala i lea uiga fa'atosina. O le a fa'atalitali pea i le Atua ma gaua'i atu i Lona finagalo. O le a iloa ma 'u'umau 'upu moni pa'ia uma, ma o le a gaua'i atu le loto i tulafono uma ma le lē muimui. O le agamalū moni e fa'amalūina le loto ma tu'u atu ai le mafaufau ia ō gatasi ma le 'upu ua tu'uina mai. E aumaia manatu uma ia usiusita'i iā Iesu Keriso. O le a tatala mai iā i tatou le loloto o le Afioga a le Atua, ma tu'u i tatou, fa'apei o Maria, ia a'oa'oina i 'a'ao o Iesu.

(17) E FA'APEI O PAULO, O LE Ā LE MEA O LE A TALOSAGAINA E LATOU UMA O LO'O SA'ILI LE FA'APA'IĀGA MONI?

Ua gatete ia, ma ua mata'u, ua fa'apea atu, Le Ali'i e, se ā le mea e te finagalo i ai 'ou te faia? Ona fetalai mai lea o le Ali'i iā te ia, Tū ia 'oe i luga, inā alu ia i le 'a'ai, ona ta'uina atu lea iā te 'oe o le mea e tusa ona e faia.

Galuega 9:6

O le gagana a ē loto maulalo e lē fia fa'avi'ivi'i. A e tatalo i latou e pei o Samuelu a o tamaitiiti, "Fetalai mai ia, Ieova e, auā o lo'o fa'alologologo atu lau 'au'auna" (I Samuelu 3:9). Ina ua 'avea Iosua ma ta'ita'i o le fanauga a Isara'elu, sa ia fa'asagatau i fili uma o le Atua. Na fa'atumulia lona loto i mafaufauga e fa'ataui i lana galuega tāua. Peita'i ina ua fa'aalia mai se fe'au mai le lagi, na ia fa'atulagaina ia lava e pei o se tamaitiiti ina ia fa'atonuina.

(18) O Ā TA'IĀLA E TOLU O LE AGAMALŪ MA LE PULEA O 'OE LAVA IA?

O lenei, o'u uso pele e, ia ta'itasi le tagata ma fa'ata'alise ona fa'alologologo, ia fa'agesegese ona tautala atu, ia fa'agesegese ona ita.

Iakopo 1:19

O le māfaufau o le tagata e fa'agesegese ai lona ita; o lona vi'iga fo'i lea, ina ua lē manatua lona agaleagaina.
Fa'ata'oto 19:11

I le a'oga a Keriso, o le loto agamalū o se tasi lea o fua tāua o le Agaga. O se uiga e ala mai le Agaga Pa'ia, Lē e fa'apa'iaina, ma e mafai ai e lē ua i ai fa'apea ona pulea i taimi uma le maitaita gofie. Pe a iā i latou le loto maulalo ma ua lē fiafia i le tulaga e aga'i ai i le losivale, o le a latou taumafai loa e fa'aalu i lalo lea amio a e ia maua le uiga e mafai ai ona pulea le loto. O le a fa'ato'ilalo loa uiga e lē matagofie ma e lē pei o Iesu, a e o le a ō gatasi ma le fuafuāga mai le lagi se'ia o'o ina mafai ona usiusita'i i le fa'atonuga na tu'u mai, "Ia ta'itasi le tagata ma fa'ata'alise ona fa'alologologo, ia fa'agesegese ona tautala atu, ia fa'agesegese ona ita" (Iakopo 1:19).

(19) O LE Ā LE MALOSI FA'ATOSINA E FA'AALIA MAI E LE LAULAUFAlVA?

O le oti ma le ola, o lo'o i le pule a le laulaufaiua ia; o ē manana'o i ai latou te 'a'ai i lona fua.

Fa'ata'oto 18:21

O lē ua leoleo i lona gutu ma lona laulaufaiua, e tausi o ia iā te ia 'ai puapuagā.

Fa'ata'oto 21:23

O le laulaufaiua e malōlō ai, o le la'au o le ola lea; a o le laulaufaiua fa'api'opi'o e momomo ai le loto.

Fa'ata'oto 15:4

E fa'apea fo'i le laulaufaiua, o le mea itiiti lea, a ua lafo 'upu fa'asili. Fa'auta, o le afi itiiti e mū ai le vao la'au e tele. O le laulaufaiua o le afi lea, o le faupu'ega o amio leaga; ua fa'apea ona tu'uina le laulaufaiua i o tatou itū tino, o lo'o leaga ai le tino uma, ua fa'amūina ai le olaga nei uma lava;...E mafai ona fa'alataina, ua uma fo'i ona fa'alataina i le poto o tagata, o manu amio 'ese'ese o manu fe'ai ma manu felelei, o mea fetolofi ma mea ola i le sami. Peita'i e lē mafai e se tasi tagata ona fa'alata i le laulaufaiua; o le mea leaga e lē mataofia, ua tumu i le mea 'o'ona e oti ai; o lea ua tatou vivi'i a 'i i le Atua le Tamā, o lea fo'i ua tatou fetu'u a 'i i tagata ua faia e foliga i le Atua;

Iakopo 3:5-9

E pei ona pa'ia o Ia na vala'auina outou, ia fa'apea fo'i outou ona pa'ia i a outou amio uma.

I Peteru 1:15

Pe a ta'u mai e se tagata o ia ua fa'apa'iaina, a e fa'aalia mai i 'upu ma galuega le pogai 'ele'elea o lo'o fa'atafe mai ai suāvai 'o'ona, e mafai ona tatou fa'apea atu, "Ua fa'asesēina lea tagata." E tatau iā te ia ona a'oa'o mata'itusi o matā'upu o lo'o 'a'afia ai le olaga o le Kerisiano. E i ai nisi o lo'o fa'ailoa mai o 'au'auna latou a Keriso a e ua leva ona fa'apelepele le uiga lē alofa ma e fiafia lava i lea tulaga lē pa'ia ma tautala atu i 'upu e fa'atigāloto ma le tau fa'alili. E lē talia nei tagata e 'avea ma fanau a le Atua se'iloga ua suia a latou amio.

(20) O LE Ā LE TAUI A LE ATUA MO Ē AGAMALŪ?

Auā o lo'o fiafia Ieova i Lona nu'u; e fa'amatagofie e Ia i le olataga ē ua agamalū.

Salamo 149:4

O le tagata lilo o le loto, ia teua lea i le mea e lē pala, o le loto agamalū ma le filemū, o le mea tau tele lava lea i luma o le Atua.

I Peteru 3:4

O le loto maulalo o le teuteuina lea mai totonu, e fa'ataua e le Atua i se tau e sili le tele. E tautala le aposetolo i lea mea e aupito sili atu ma le aogā e sili i lo o le auro po o penina po o isi mea tautele. A teuteuina fafo ia fa'amatagofie ai le tino e pala, a o le loto maulalo o le a matagofie ai le agaga ma feso'ofa'atasi atu ai le tagata ma le Atua e fa'avavau. O le teuga lenei na filifili e le Atua lava ia. O Ia Lē na fa'atumulia le vānimonimo i le malamalama, ua folafola mai e ala i lea lava Agaga e tasi, "E fa'amatagofie e Ia i le olataga ē ua agamalū" (Salamo 149:4). O le a fa'ailoa mai e agelu o le lagi ē ua aupito sili le matagofie, o i latou ia o lo'o i le Ali'i o Iesu Keriso ma e savavali ma Ia i le loto maulalo ma le agamalū.

A o i latou uma ē na talia o Ia, ma fa'atuatua i Lona suafa, na Ia avatu i ai o lea manuia, ia 'avea i latou ma fanau a le Atua.

E ma'oa'e fa'ataunu'uga mo le Kerisiano, ma e taumafai pea ia e 'ausia se tapula'a e aupito sili ona maua'uga atu. Sa iā Ioane le manatu e si'itia maua'uga le tulaga o le Kerisiano ina ua ia fa'a'pea mai, "Fa'auta i le silisili o le alofa ua foa'iina mai e le Tamā iā te i tatou, ina ua ta'ua i tatou o le fanau a le Atua" (I Ioane 3:1). E leai se isi tulaga e sili a'e ona tāua ma fa'aaloalogia mo le aigā tagata i lo o lea ua fa'a'iloa mai iinei. Ua tu'u mai i le tagata le avanoa e 'avea ai ma suli moni o le Atua, ma suli fa'atasi ai ma Keriso. Mo i latou ua fa'aeaina fa'a'pea, o lo'o ua fofola mai i ai 'o'loa e lē mafaitaulia a Keriso, 'oa e sili atu i tau afe ona tāua i lo 'oa a le lalolagi. O le mea lea e ala i le lelei o Keriso, ua si'itia a'e ai le tagata lē aogā ia mau fa'atasi ma le Atua ma Lona Ālo pele.

Li'o le Tali: **Ioe** **Lē Mautonu**

Tali o Tatalo

This image shows a single sheet of white paper with horizontal blue or grey ruling lines. The lines are evenly spaced and run across the width of the page. There are approximately 20 lines visible. The paper has a slight shadow on the right side, suggesting it's part of a bound notebook.

O Le Fa'aa'oa'o a Tanielu

Lesona 2

O le perofeta o Tanielu o se tagata e mamalu lona uiga. O ia o se fa'aa'oa'o t̄aua i le mea e o'o i le tagata pe a ō gatasi ma le Atua e Ōna le poto aoao. Ua tu'u mai se tala'aga pu'upu'u i le olaga o lenei tagata pa'ia mo le fa'amalosi'aga iā i latou o ē o le a vala'auina ia lavatia tofotofoga ma fa'aosoosoga pe a o'o mai.

(1) O Ā UIGA FA'ATAMĀLI'I O TANIELU MA ĀNA UŌ SA FIAFIA AI Ē NA 'AVEINA FA'APAGOTĀ I LATOU?

O tama e lē ponā lava, a ua 'aulelei, o ē ua atamamai lava, ma ua iloa mea uma, o ē ua popoto lava, ma ua tatau ona latou tutū i le maota o le tupu, ia a 'oa 'oina fo'i i latou i tusi ma le gagana a Kaletaia.

Tanielu 1:4

Ina ua 'ave fa'apagotā tagata Isara'elu, lo latou tupu, ali'i, ma faitaulaga, e to'afā sa filifilia e fai ma 'au'auna i le maota o le tupu Papelonía. O Tanielu, se tasi o lea to'afā, na fa'aalia mai lava i le amataga le atamai ma le tomái na fa'ateleina a o tuputupu a'e. Sa va'aia e le Tupu o Nepukanesa le maoa'e o taleni a nei pagotā talavou ma na filifili e saunia i latou mo tulaga t̄aua i lona malō. E feagai ai ma aganu'u o ia malō mai Sasa'e, pe a tofia i latou mo le olaga i le maota o le tupu, e tatau ona a'oa'oina i le gagana fa'a-Papelonía, ma i le tolu tausaga, sa matuā a'oa'o ai i matā'upu ia pulea lelei ai le tino ma le mafaufau.

(2) O Ā MEA FA'ALETINO NE FIFLIFILI LE TUPU E TU'U MO IA TALAVOU MA LE MANATU E MO LO LATOU LAVA MANUIA?

Ua poloa'i fo'i le tupu ia latou 'a'ai i lea aso ma lea aso i mea taumafa a le tupu, atoa ma le uaina e inu ai o ia, ia tausia i latou i tausaga e tolu; a mavae ia, ona latou tutū ai lea i luma o le tupu.

Tanielu 1:5

O talavou mai lenei a'oga sa fa'atagaina e ulufale i le maota o le tupu, ma sa saunia ia tatau ona 'a'ai i mea 'ai ma inu le uaina mai le la'o'ai a le tupu. Mai nei sauniuniga uma sa manatu le tupu ua ia tu'u atu se mamalu tele i o latou luga, ma ua latou maua fo'i le fa'amalosi'aga sili o le tino ma le mafaufau e mafai ona 'ausia.

(3) O LE Ā LE TALOSAGA, MAI LONA TALITONUGA, NA TU'U ATU E TANIELU I LONA AGAGA FA'AMAONI?

A ua manatu Tanielu, o le ā le leaga o ia i mea taumafa a le tupu, po o le uaina e inu ai o ia; ona 'a'ioi atu ai lea o ia i le ali'i e pule i eunuka ina ia lē leaga ai o ia.

Tanielu 1:8

Sa aofia ai i mea taumafa a le tupu 'a'ano o puā'a ma isi 'a'ano o manu e lē mamā, e ala i tulafono a Mose, ma sa matuā fa'asāina ona 'a'ai ai tagata Iutaia, ma o le tofotofoga faigatā lea na o'o iā Tanielu. E tatau ea ona ia tumau i a'oa'oga mai ōna tua'ā e uiga i 'a'ano o manu ma mea inu, lē usita'i ai i le tupu, ma 'ave'esea ai mai lona tulaga pe 'ave ai fo'i ma lona ola? po o le fa'agalo o le tulafono a le Atua a e usiusita'i i fa'atonuga a le tupu ona maua ai lea o manuia ma tulaga fa'alelalolagi? E le'i fa'atuai ona mafaufau Tanielu. Na filifili ia e tū tumau i lona uiga fa'amaoni, tusa pe o le ā le fa'ai'uga o le a maua.

(4) AISEĀ E TĀUA AI LE USIUSITA'I I LE FINAGALO O LE ATUA I MEA ITI?

Ona fai atu ai lea o lona ali'i iā te ia, Ua lelei ia, le 'au'auna lelei e, ma le fa'amaoni, ua e fa'amaoni i nai mea itiiti, 'ou te tofia 'oe e pule i mea e tele; inā ulufale mai ia i le fiafia o lou ali'i.

Mataio 25:23

E to'atele i latou e ta'u mai o Kerisiano a e manatu e vāapiapi le mafaufau o Tanielu, e lē fautuaina ma e fa'aailoga tagata. E manatu mamā i latou e fa'atatau i mea'ai ma mea inu, ia lē tū mamafa i lea mea - atonu o lea tū o le a lē iloa atu ai fa'amanuiāga uma fa'alelalolagi. Peita'i o ē fa'apea o latou manatu, pe a o'o i le aso o le fa'amasinoga o le a latou iloa ai ua latou liliu 'ese mai mana'oga a le Atua a e fa'atū mai o latou lava manatu e fai ma tapula'a o le sa'o ma le sesē. O le a iloa mea sa foliga mai e lē tāua iā i latou a e o le a lē fa'apea i le fa'atatau a le Atua. Sa tatau ona usiusita'i i mea ua fa'aailoa mai o lo'o mana'omia e le Atua. O ē talia ma usiusita'i i se tasi o Āna tulafono ona e faigofie ona fai, a e tete'e se isi ona pe a faia e mana'omia ai le ofo atu o ia lava, o le a tu'u fa'amaulalo ifo le tapula'a o le mea sa'o ma ta'ita'i ai isi ia lē fa'atāuaina le tulafono pa'ia a le Atua, e ala i la latou fa'aa'oa'o. Ia 'avea 'upu "Ua fa'apea ona fetalai mai le Ali'i" e pulea ai i tatou i mea uma.

(5) O LE Ā LE POGAI O LE MALOSI O Tanielu NA MAFAI AI ONA FA'ATO'ILALO FA'AOSOOSOGA?

Ua iloa e Tanielu ua tusia le tusi, ona alu atu ai lea o ia i lona fale, ua avanoa fa'amalama o lona potu e fa'asaga i Ierusalema, ua ta'i fo'i fa'atolu i aso ona to'otuli o ia i ona tulivae, ma tatalo, ma fa'afetai i luma o lona Atua, fa'apei ona masani ai o ia.

Tanielu 6:10

Sa feagai pea Tanielu ma fa'aosoosoga e aupito faigatā, a e o lo'o fetaia'i fo'i ma talavou o nei ōna pō; peita'i sa fa'amaoni pea ia i a'oa'oga fa'aleagaga na ia maua i lona olaga a o la'ititi. Na si'omia o ia i mea fa'atosina sa taumafai ai ia fa'aliliu'ese i latou o ē lē mautonu e fa'atatau i ta'iala ma mana'oga; peita'i o lo'o fa'aailoa mai e le Afioga a le Atua lona uiga e leai se pona. E le'i fa'atuatua Tanielu i lona lava malosī, a e na talitonu o le tatalo o se mea e na te mana'omia. O le Atua na 'avea ma pogai o lona malosī, ma sa i ōna luma pea, i fa'agaoioiga uma o lona olaga, le mata'u i le Atua.

(6) O LE Ā LE MANATU A LĒ O LO'O MULIMULI IĀ KERISO E FA'ATATAU I TULAFONO A TAGATA?

O lenei, ia outou usiusita'i atu i tofiga uma a tagata auā o le Ali'i; po o le tupu ina ua sili.

I Peteru 2:13

Ia usiusita'i tagata uma i faipule silisili; auā e leai se pule pe a lē mai le Atua; o pule uma lava o lo'o fai nei, ua fa'atūina e le Atua. O lenei, o lē na te tete'e i le pule, ua tete'e e ia i le sauniga a le Atua; o ē tete'e fo'i e sala lava i latou. Auā o ali'i, e lē se fa'amata'u i latou i ē amio lelei, na o ē amio leaga. O lou mana'o ea, ia e lē fefe i le pule? ia e amio lelei, ona ta'uleleia mai lea o 'oe e ia. Auā o le 'au'auna ia a le Atua iā te oe, ia lelei ai; a e afai e te amio leaga, ia e fefe ai, auā e lē fai fua e ia lana pelu; auā o le 'au'auna o ia a le Atua, o Lē na te tau i atu le to'asā i lē amio leaga. O lenei, e tatau ona usiusita'i, e lē gata ona o le to'asā, a e peita'i ona o le loto fuatia ifo. O le mea fo'i lea tou te avatu ai taulaga, auā o 'au'auna i latou a le Atua, o lo'o finafinau i lenei lava mea. O lenei, ia avatu i tagata uma lava a latou mea; o le taulaga i ē ua tatau i ai le taulaga; o le telo i ē ua tatau i ai le telo; o le mata'u i ē ua tatau i ai le mata'u; o le fa'aaloalo i ē ua tatau i ai le fa'aaloalo.

Roma 13:1-7

(7) E FA'APEFEA PE AFAI E FETE'ENA'I TULAFONO A LE TAGATA MA LE TULAFONO A LE ATUA?

Ona tali atu lea o Peteru ma le 'au aposetolo ua fa'apea atu, E tusa ona sili o lo matou 'ana'ana i le Atua i lo matou 'ana'ana i tagata.

Galuega 5:29

Ua latou fai mai ia te Ia, E o Kaisara. Ona fetalai atu ai lea o Ia iā te i latou, O lenei, o mea a Kaisara, ia outou avatu iā Kaisara; a o mea a le Atua ia avatu ia i le Atua.

Mataio 22:21

Sa iā Tanielu le uiga loto fa'amaulalo moni. O ia na fa'amaoni, mautū, ma uiga fa'atamali'i. Na sa'ili lava ia e mau filemū ma tagata uma, a e pei o le la'au o le arasi, sa lē mafai ona gausia lona mausalī i ta'iala. I so'o se mea e lē fete'ena'i ai ma lona uiga fa'amaoni i le Atua, sa usiusita'i ma fa'aaloalogia e ia ē tulaga maualuga ma o lo'o i ai le pule; peita'i sa tū aupito i maualuga le Atua i lo o ta'ita'i fa'alelalolagi. E le'i mafai ona tosina 'ese ia e le manatu fa'apito mo ia lava ina ia ta'ita'i 'ese ai mai lana galuega.

(8) O LE Ā LE FOLAFOLAGA E MAFAI ONA TATOU TAPA I AI PE A FA'AOSOOSOINA I TATOU?

Ua lē maua outou e se tofotofoga e 'ese i lo tagata; a ua fa'amaoni le Atua, o Lē na te lē tu'uina atu outou i le tofotofoga e sili i se mea ua outou lavatia, a e sauni fo'i fa'atasi ma le tofotofoga se mea e sao ai, ina ia outou lavā 'o'ono.

I Korinito 10:13

O le amio a Tanielu ua tu'uina i le lalolagi e 'avea ma fa'aa'oa'oga tāua o le mea e mafai ona faia e le alofa tunoa o le Atua mo le tagata ua pa'ū ma fa'alēaogāina e le agasala. O lenei olaga agamalū ma e fa'atamali'i o se fa'amalosi'aga lea mo le aigā tagata, ia mafai ai ona maua le malosi e tete'e ai i fa'aosoosoga ma ia tū mausalī mo mea e tonu pe a o'o mai tofotofoga e matuā faigatā lava.

(9) O LE Ā LE TALOSAGA NA FAIA E Tanielu E FA'AMAONIA AI LE SILI ATU O TA'IALA O LE SOIFUA MALŌLŌINA A LE ATUA?

Ia e tofotofo i au nei 'au'auna i pō e sefulu, ia latou 'au mai ai ia te i matou ni fua o la'au e 'a'ai ai, ma vai e inu ai. Ona e silasila lea i o matou mata, ma mata o tama o ē 'a'ai i mea taumafa a le tupu, ona e faia lea i au 'au'auna e tusa ma lau silafaga.

Tanielu 1:12, 13

Atonu na mafai e Tanielu ona maua se faitioga ia liliu'ese ai mai āna tū masani, a e peita'i sa pele iā te ia lona Atua i lo o manuia sa ofo mai e le ta'ita'i pule aoao fa'alelalolagi - na sili atu ona pele i lo o lona lava ola. Ona o lana uiga fa'aaloalo, sa agalelei mai le pule o leoleo i lenei talavou Iutaia, ma na talosaga atu Tanielu ina ia lē 'a'ai i mea taumafa a le tupu pe inu i lana uaina. Sa fefe le ta'ita'i'au ona ua manatu ia, pe a lē 'a'ai i mea'ai lelei mai le la'o'ai a le tupu, o le a fa'ama'ia ma tino vaivai ai ia talavou o lo'o i lalo o lana tausiga, ma o le a fa'alētonu ai fo'i ma lona ia ola. E pei o le to'atele i nei ona pō, o le manatu pe a tele mea'ai taugatā ma foliga mai e lelei i le va'ai, o le a maua ai le tino malosi ma le soifua malōlōina, a e maise le mafaukau.

Sa talosaga Tanielu ina ia tu'u mai aso e sefulu e tofotofo ai - aso ia e fa'ataga ai latou ina ia 'a'ai i mea'ai e faigofie ma mamā ma le suāvai e inu ai, a e ia feagai pea isi uma talavou ma mea'ai mai le laulau a le tupu. E ui o ia e na o se talavou a e sa na va'aia e ia le leaga o le inu i le uaina ma le olaga e lē taupulea e afāina ai le soifua malōlōina o le tino ma le mafaukau.

(10) O LE Ā LE I'UGA O LE TOFOTOFOGA SA FAIA MO ASO E SEFULU?

Ua mavae pō e sefulu, ona iloa lea ua sili ona lālelei o latou mata mona tino lelei i tama uma ē na 'a'ai i mea taumafa a le tupu.

Tanielu 1:15

Ina ua mae'a aso e sefulu, o le i'uga ua matuā 'ese nai lo le mea sa mafaukauina e le 'au'auna. Sa lē na o i foliga, a e fa'apea le malolosi o tino ma le maoa'e o mafaukau o i latou ia sa lē so'onafaia a latou masaniga, ma sa sili a'e i mea uma nai o latou sa fa'amalie tu'inaanau o mea fa'aletino. Ina ua fa'ai'uina lenei tofotofoga sa fa'atagaina loa Tanielu ma āna uō e fa'aauau pea a latou mea'ai faigofie ma mea inu a o alu pea a'oa'oga mo galuega e latou te faia o le malō.

(11) SA FA'APEFEA ONA FA'AMANUIAINA E LE ATUA LE FA'AMAONI O ĀNA 'AU'AUNA?

A o ia tama e to'afā ua foa'iina e le Atua iā te i latou le fa'autauta ma le atamai i tusi uma lava, atoa ma le poto; a o Tanielu ua poto ia i fa'aaliga uma lava ma miti.

Tanielu 1:17

Sa fa'amanuiaina e le Atua le sogasogā ma le lē manatu fa'apito o nei talavou Eperu. Ina ua uma tausaga e tolu o a'oa'oga, ina ua tofotofoina e le tupu le poto ma le tomai ua 'ausia, na ia "lē maua se tasi o i latou e tusa ma Tanielu, ma Hanania, ma Mesaclu, ma Asaria; ona latou tutū ai lea i luma o le tupu. O mea uma lava e o'o ai le poto ma le fa'autauta na fesili atu ai le tupu iā te i latou, ua iloa ai e ia ua sāutuasefulu ona sili o lo latou poto i taulāitu, ma va'afa'atau uma i lona malō uma lava" (Tanielu 1:19, 20).

(12) O Ā ALA E MAFAI AI ONA TAUNU'U I LE TAPULA'A E AUPITO MAUALUGA O LE UIGA TONU MA LE ATAMAI SILISILI?

A e afai ua leai se poto i so outou, inā ole atu ia i le Atua, o lē foa'i tele mai i tagata uma ma le lē toe ta'uta'ua; ona foa'iina mai ai lea iā te ia.

Iakopo 1:5

Ona fai atu lea o Samuelu i le nu'u, 'Aua tou te fefefe, e ui lava ina ua outou faia nei mea leaga uma, tau lava ina lē tu'ua e outou ona mulimuli atu iā Ieova; a ia outou 'au'auna iā Ieova ma o outou loto atoa.

I Samuelu 12:20

O i latou uma o ē fai aigofie e fai fa'atautu i mea uma lava; o i latou fo'i ua latou fa'aapea ina ia maua le pale palagofie, a o i tatou, ina ia maua le pale e lē pala lava.

I Korinito 9:25

Ia e fa'atuatua iā Ieova ma lou loto atoa; a e 'aua le fa'alagolago i lou lava atamai. Ia e manatua o Ia i ōu ala uma, ona fa'atonuina ai lea e Ia lava ou ala.

Fa'ata'oto 3:5, 6

O le olaga o Tanielu o se ata fa'ate'i loto e fa'atautu i le uiga o lē ua fa'apa'iaina. O lo'o tu'u mai ai mo tagata uma, a e maise le 'au laiti se a'oa'oga tāua. O le tū malosi e mulimuli i mana'oga a le Atua, e aogā lea mo le soifua malōlōina o le tino ma le mafaufau. Ina ia taunu'u i le tapula'a e aupito maua ma 'ausia ai le amio e tonu ma le atamai, e mana'omia ia sa'ili le poto ma le malosi mai le Atua ma ia tausisi e usiusita'i ina ia tasi ma le lē so'onafai masaniga lelei uma o le olaga. I gaoioiga a Tanielu ma āna uō na latou maua ai fa'ata'ita'iga o le manumalō o ta'iala mai fa'aosoosoga e gaua'i atu ai i tu'inaanau fa'aletino. E fa'ailoa mai ai iā i tatou, e ala i ta'iala fa'aleagaga, e mafai e taulele'a talavou ona fa'ato'ilalo tu'inaanau o le tino ma fa'amaoni pea i le finagalo o le Atua, tusa pe fa'atauina i se tau e tele.

(13) O LE Ā LE FAIGATĀ E O'O I AI PE A FA'AMALIEINA SE FA'AOSOOSOGA LAVA E TASI?

O ana amio leaga e maua ai lava lē ua agasala; o maea o ana agasala e taofia ai o ia.

Fa'ata'oto 5:22

Mata o le ā le fa'ai'uga pe ana faia e Tanielu ma āna uō se tu'utu'uga ma ia fitafita fa'apaupau, ma gaua'i atu i tu'inaanau tau i mea'ai ma mea inu pei o le aganu'u fa'a-Papelonia? Pe ana tyupu lea mea e tasi ma ō 'ese ai mai ta'iala, se manū o le a fa'avaivaiina ai le lagona o le mea sa'o ma lo latou 'ino'ino i le sesē. O le fa'amalieina o tu'inaanau i mea a'i e 'ave'esea ai le malosi tauletino, o le mafaufau manino, ma le malosi fa'aleagaga. A tasi se la'asaga e ui sesē, o le a mulimuli mai ai fo'i ma nisi, se'ia o'o ina motusia le so'otaga ma le lagi, ma i'u ina tafi 'esea ai e fa'aosoosoga.

O le mea lea ua fetalai mai ai Ieova le Atua o Isara'elu, Na 'Ou fai atu lava i lou aiga ma le aiga o lou tamā, latou te feoa'i i O'u luma e fa'avavau; a o lenei, ua fetalai mai Ieova, Ia mamao lea mea iā te A'u, a o ē fa'asili ia te A'u, 'Ou te fa'asili iā te i latou; a o ē 'ino'ino mai iā te A'u, e ta'u fa'atauva'aina i latou.

I Samuelu 2:30

A o tumau pea Tanielu i lona Atua ma le fa'atuatua e mautū, na o'o i ōna luga le mana o le Agaga o valo'aga. A o fa'atonuina o ia e tagata e fa'atatau i gaoioiga o le olaga i totonu o le maota o le tupu, sa a'oa'oina o ia e le Atua e fa'atatau i mea lilo o tupulaga o i lumana'i, ma ia tu'uina atu i ia augātupulaga, e ala i fa'ailoga ma fa'atusatusaga, o mea ofoofogia o le a o'o mai i aso o le i'uga.

Li'o le Tali: **Ioe** **Lē Mautonu**

Li'o le TAli: Ioe Lē Mautonu

Li'o le Tali: Ioe Lē Mautonu

Li'o le Tali: **Ioe** **Lē Mautonu**

Tali o Tatalo

This image shows a single sheet of white paper with horizontal blue ruling lines. The lines are evenly spaced and run across the width of the page. There are no margins, text, or other markings on the paper.

O Le Pulea o Mana'oga ma Tu'inanau

Lesona 3

(1) O LE Ā LE I'UGA O LE FA'AMALIEINA O TU'INANAU TAULETINO?

Le 'au pele e, 'ou te 'ai'oi atu iā te outou o tagata 'ese ma ē āumau, ia mamao outou ma tu'inanau o le tino, o mea ia e tau ma le agaga.

I Peteru 2:11

E to'atele e manatu o nei fuai'upu e na o se lapata'iga e fa'ataui i le amiolēmamā, peita'i e lautele lona uiga. O lea e fa'asā mai ai le fa'amalieina o tu'inanau 'ese'ese uma. Ia lē so'onafai ma lelē popole le soifua malōlōina o le tino e i latou o lo'o ta'u le amioatua, ma fa'apea mai e lē o se agasala le amio e lē taupulea, ma o le a lē afāina ai fo'i le ola fa'aleagaga. So'o se masaniga e lē fa'aleleia ai le soifua malōlōina e fa'aleagaina ai le malosi po o le pulea o mea e mafai ona faia. Afai e masani ona fa'aaogā o mea'ai ma mea inu e lē lelei, o le a aumai ai manatu ma gaoioiga sesē. O le fa'amalieina o le tu'inanau i mea'ai e fa'amalosia ai amio fa'amanu ma o le a si'i maualuga a'e i lo o le malosi fa'aleagaga ma le pulea o le mafaufau.

(2) O LE Ā LE I'UGA PE A FA'AMALIEINA LE TU'INANAU O MEA 'AI?

Auā o lē inu tele ma 'ai tele e fa'amativaina o ia; ma lē fia moe pea e 'ofu o ia i 'ofu masaesae.

Fa'ata'oto 23:21

E tu'u atu se polo i lou ua, pe afai e te se tagata 'ai tele;

Fa'ata'oto 23:2

E lē mafai e se tasi ona fiafia i manuia mai le fa'apa'iāga a o loto fa'apito ma malie e faia tu'inanau fa'aletino. E mafatia le to'atele i lalo o 'avega o fa'ama'i ma vaivaiga ona o mea'ai ma mea inu lē lelei ua masani ai, o mea ia e fa'ataugā ai i tulafono o le olaga ma le soifua malōlōina. O mea ia e fa'aleagaina ai, a e maise itūtino e fa'ataui i fegaoioiga o mea'ai ma mea inu. E matuā ofoofogia le malosi o le tino o le tagata e tete'e atu i le so'onafai, peita'i o le faifai pea o le so'ona 'ai ma inu i mea e lē tataui e pei ona masani ai, o le a fa'avaivaiina ai itūtino uma. E o'o lava i ē ta'ua o Kerisiano o le a fa'avaivaia le tino, le mafaufau, ma le pulea o iga uma ona o le fa'amalieina o tu'inanau 'ese'ese. Ia fa'ailoa atu i nei agaga vaivai le mea atonu o le a mafai ona 'ausia pe ana ola i se olaga e lē fa'ataugā, ma si'itia ai le tulaga o le soifua malōlōina a e lē o le so'onafai.

(3) O LE Ā LE TULAGA E NAUNAU LE ATUA IA I AI LO TATOU FA'APA'IĀGA?

Ia ato'atoa ona fa'apa'iaina o outou e le Atua lava e Ōna le manuia; ia tausia lava lo outou agaga atoa uma, i le ma le loto, atoa ma le tino, ia lē mata'uleagaina, i le afio mai o lo tatou Ali'i o Iesu Keriso.

I Tesalonia 5:23

Ina ua tusi Paulo ina "Ia ato'atoa ona fa'apa'iaina o outou e le Atua lava e Ōna le manuia; ia tausia lava lo outou agaga atoa uma, i le ma le loto, atoa ma le tino, ia lē mata'uleagaina, i le afio mai o lo tatou Ali'i o Iesu Keriso" (I Tesalonia 5:23), na te le'i vala'auina ōna uso iā Keriso e tausisi i se tapula'a e lē mafai ona latou 'ausia; e le'i tatalo fo'i ia ina ia latou maua fa'amanuiāga e lē finagalo le Atua e tu'u atu. Na iloa e ia o i latou uma e mafai ona fetaia'i ma Keriso, e tataui ona iā i latou amio e mamā ma e pa'ia. "O i latou uma o ē fai aigofie e fai fa'ataui i mea uma lava; o i latou fo'i ua latou fa'apea ina ia maua le pale palagofie, a o i tatou, ina ia maua le pale e lē pala lava. O a'u nei fo'i, ua fa'apea ona 'ou momo'e e lē ma le fa'aletonu; ua fa'apea ona 'ou tu'i, e lē pei o sē tu'i le matagi. A 'ou te fa'ato'ilaloina lo'u nei tino, ma a'u fai ai ma pologa, ina ne'i i'u ina lē fa'amaoni a'u, o a'u sa tala'i atu i isi tagata" (I Korinito 9:25 - 27), ma "Tou te lē iloa ea, o lo outou tino o le malumalu lea o le Agaga Pa'ia ua i totonu iā te outou, o lo'o ua iā te outou mai le Atua, e lē aiā fo'i outou iā te outou? Auā ua fa'atauina

outou i le tau; o lenei, ia outou vivi'i atu i le Atua i o outou tino ma o outou agaga, o mea a le Atua ia" (I Korinito 6:19, 20).

(4) ONA O LE ALOFA, O LE Ā SA TATOU GALUEGA E MAFAI ONA FAIA IA LELEI MO LE ATUA?

O lenei, le 'au uso e, 'ou te 'ai'o'i atu iā te outou, ona o le alofa mutimuti vale o le Atua, ia outou tu'uina atu o outou tino i le Atua, o le taulaga ola, ma le pa'ia, ma le mālie, o le mea lea e tatau ai ona outou faia.

Roma 12:1

'Aua fo'i ne'i tu'uina atu o outou tino i le agasala e fai ma a'u'upega a le amio leaga; a ia outou tu'uina atu outou i le Atua, e pei o ē ua ola nai ē ua oti, ma ia tu'uina atu outou tino i le Atua e fai ma a'u'upega a le amiotonu.

Roma 6:13

(5) E FA'APEFEA LE AFĀINA O LE SUAFA O KERISO PE A TATOU FAIA SE TAULAGA E 'INOSIA?

E āva le atali'i i lona tamā, e āva fo'i le 'au'auna i lona ali'i; afai o A'u o le tamā, o ifea ni O'u āva? afai fo'i o A'u o le ali'i, o ifea Lo'u mata'utia? ua fetalai mai ai Ieova o 'au iā te outou faitaulaga o ē 'ino'ino i Lo'u igoa; a ua outou fai mai, Ua matou ino'ino i Lou suafa i ni ā? Ua 'ino'ino ina ua outou 'au mai o mea e 'ai ua leaga i La'u fata faitaulaga; a ua outou fai mai, Ua leaga 'Oe iā te i matou i ni ā? Ua leaga ina ua outou fai ane, O le la'o'ai a Ieova, o le mea fa'atauva'a lava lea. A outou 'aumaia le mea tauaso e fai ma taulaga, e lē leaga ea? A outou 'aumaia le mea pipili ma le mea e ma'i, e lē leaga ea? Se'i avatu ia i le Ali'i e pule iā te 'oe; pe fiasia mai ea o Ia iā te 'oe? pe talia mai 'oe e Ia? ua fetalai mai ai Ieova o 'au. O lenei, ia outou ōle atu i luma o le Atua ina ia alofa mai o Ia iā te i tatou; ua tupu mai iā te outou lenei mea; pe na te talia mai ea outou? ua fetalai mai ai Ieova o 'au.

Malaki 1:6-9

O ai lava so outou na te punitia fua faitoto'a? Tou te lē tafu fua le afi i La'u fata faitaulaga; e leai lava So'u fiasia iā te outou, ua fetalai mai ai Ieova o 'au; 'Ou te lē talia fo'i se taulaga ai o outou lima. Auā e fua mai i le mea e alu a'e ai le lā, e o'o i le mea e alu ifo ai, e vi'ia ai Lo'u igoa i nu'u 'ese; e 'aumaia fo'i le mea manogi e mū i Lo'u igoa i nu'u uma lava, atoa ma le taulaga lelei; auā e vi'ia Lo'u igoa i nu'u 'ese, ua fetalai mai ai Ieova o 'au. A o outou, ua outou fa'aleagaina ai, ina ua outou fai ane, Ua leaga le la'o'ai a Ieova; mōna fua, o Āna mea e 'ai lea, o le mea fa'atauva'a lava. Ua outou fai ane fo'i, 'Auē, o le mea tigā na'uā! ma outou 'ino'ino i ai, ua fetalai mai ai Ieova o 'au; ua outou 'aumaia fo'i le mea ua faoa, ma le mea pipili, ma le mea e ma'i; ua outou 'au mai ai ma taulaga? 'Ou te talia ea lea mea ai o outou lima? ua fetalai mai ai Ieova. A ia fa'afanoia le tagata pepelo ua i ai le po'a i lona lafu, a ua tautō o ia ma fai taulaga i le Ali'i i le mea leaga; auā o le Tupu sili lava A'u, ua fetalai mai ai Ieova o 'au; e mata'utia lava Lo'u igoa i nu'u 'ese.

Malaki 1:8-14

Sa tu'u mai fa'atonuga fa'apitoa iā Isara'elu anamua ia leai ni manu e fa'ama'ia pe i ai pona e tatau ona tu'uina fa'ataulaga i le Atua, a e na o manu e ato'atoa e filifilia mo lenei fuafuāga. E ala mai le perofeta o Malaki, sa matuā a'oa'i e le Ali'i Ōna tagata ina ua ō 'ese mai nei fa'atonuga.

O nei fetalaiga e i ai a'oa'oga mo tagata o le Atua o ōna pō nei, e ui ina sa tu'u mai iā Isara'elu anamua. Ina ua ōle atu le aposetolo i ōna uso ia ofoina o latou tino "i le Atua, o le taulaga ola, ma le pa'ia, ma le mālie" (Roma 12:1), na ia tu'u mai ai ma ta'iala o le fa'apa'iāga moni. E lē ia na o se mea e mafaufauina, se lagona, po o ni 'upu, peita'i o ta'iala e ola, e gaoioi, e feagai ma le tagata i aso ta'itasi o le olaga. E mana'omia ia fai a tatou masaniga e fa'ataui i mea'ai, mea inu, ma lavalava, ina ia puipuia ai le soifua malōlōina tau le tino, le mafaufau, ma le amiotatau, ina ia mafai ona tu'uina i le Ali'i o tatou tino, ia lē o se taulaga ua fa'aleagaina e agasesē, a e "o se taulaga e ola, e pa'ia, ma e mālie" i le Atua.

(6) O LE Ā LE I'UGA PE A FA'AMALIEINA LE TU'INANAU I VAILA'AU E FA'ASĀINA?

O āna amio leaga e maua ai lava lē ua agasala; o maea o āna agasala e taofia ai o ia.

Fa'ata'oto 5:22

O le lapata'iga a Peteru ia 'alo'ese mai tu'inanau tauletino, o se lapata'iga e aupito malosi ma e fai sa'o mai ia 'aue le fa'aaogāina mea e i ai vaila'au e fa'asāina, e i ai le ti, kofe, tapa'a, ma le 'ava malosi. A amata ona fa'amalieina o nei masaniga a o la'itiiti, o le a malosi le 'u'umau o le tagata ia fa'apagotāina ai e le tu'inanau ma o le a tu'u fa'amaulalo ai le tapula'a fa'aleagaga.

O le a lē mafai e a'oa'oga mai le Tusi Pa'ia ona fa'amalosia itūtino ua fa'aleagaina e ala i le fa'amalieina o tu'inanau. E afe ma afe ē o le a lafoa'i 'ese e lē na o le soifua malōlōina ma le ola, a e fa'apea le fa'amoemoe mo le lagi ona o le a lē fia tete'e i a latou tu'inanau leaga.

(7) O LE Ā LE FA'AA'OA'OGA E TATAU ONA TATOU TU'UINA I LE LALOLAGI?

O lenei, pe tou te 'a'ai, pe tou te inu, po o se tasi mea tou te faia, ia outou faia mea uma lava ia vi'ia ai le Atua.

I Korinito 10:31

Le nu'u e, 'amuia 'oe pe a fai mou tupu le alo o se ali'i, e 'a'ai fo'i ou ali'i i le itu aso e tatau ai, ia malolosi ai, a e lē ina ia onā ai.

Failauga 10:17

So'o se mea o lo'o i ai i latou, o ē ua fa'apa'iaina moni o le a si'itia i luga le tapula'a o le amiotatau e ala i le tausia o masaniga lelei e tauletino, ma e fa'apei o Tanielu, e tu'u mai i isi se fa'ata'ita'iga o le lē so'onafai ma le tu'u'esea o ia lava mana'oga. O fa'anaunauga lē mamā uma e 'avea o tu'inanau e fetaua'i, ma o mea uma e fete'ena'i ma tulafono fa'anatura e tupu ai tulaga e lē manuia o le agaga. O le fa'amalieina o le tu'inanau o mea'ai e tupu ai le fa'alētonu o le manava, o le ate vevela, fa'anenefu ai le mafaufau, e maua gofie i le loto ita ma fa'avaivaiina ai le agaga o le tagata. E lē talia e le Atua ē e fia tu'u atu latou fa'ataulaga vaganā e lē ponā. O le ala lea e tatau ai iā i tatou ona fa'a ō gatasi a tatouu mana'oga i mea'ai e lelei mo le tino ma a tatou masanaiga o le olaga ia tusai ma tulafono fa'anatura. Pe ana fai e iloiloina au'ililili tino e tu'u i luga o le fata faitaulaga a le Atua fa'apei ona faia i tulaga fa'a-Iutaia, mata o ai o le a mafai ona taliaina?

(8) O LE Ā LE MEA E TATAU ONA TATOU FAIA, E ALA I LE MALOSI MAI LE AGAGA PA'IA, E TU'U ATU AI LA TATOU 'AU'AUNAGA E AUPITO SILI ONA LELEI I LE ALI'I?

O lenei, le 'au pele e, ona ua iā te i tatou o ia upu ua folafolaina mai, ia tatou fa'amamā iā te i tatou i mea uma e leaga ai le tino atoa ma le agaga, ia fa'a'ato'atoaina lo outou fa'apa'iaina i le mata'u i le Atua.

II Korinito 7:1

E tatau ona tausii ma le fa'aeteete e le Kerisiano āna tū masani, ina ia puipuia atili ai le malosi o itū tino uma auā le 'au'auna atu iā Keriso. Pe afai e fa'apa'iaina i tatou i le agaga, le tino, ma le mafaufau, o le a tatau loa ona ola i se olaga e ō gatasi ma le tulafono o mea uma na foafoaina. E lē mafai e le loto ona fa'amaoni i le Atua a o fa'amalieina pea tu'inanau uma o le tino ma mea 'ai, a e fa'aleagaina ai fo'i le soifua malōlōina ma le ola. O i latou e lē usiusita'i i tulafono e fa'avae ai le soifua malōlōina, o le a tatau fo'i ona mafatia ai i le fa'asalaga. O i latou ia ua lē mafai ona faia se mea e fesoasoani atu ai i isi, ma ua lē mafai ona tali le vala'au a le Atua.

(9) AISEĀ, PE AFAI TATOU TE LĒ USITA'I I TULAFONO TAULESOIFUA MALĒLĒINA, O LE A LĒ MAFAI AI E KERISO ONA TALI A TATOU TATALO MO NI FA'AMANUIĀGA O SE OLAGA E SOIFUA MANUIA?

O lē ua liliu 'ese ōna taliga a e lē fa'alogologo i le tulafono, e 'inosia lana lava tatalo.

Fa'ata'oto 28:9

Ina ua talosagaina e ta'ita'i fa'aleagaga o Sikotilani le Ali'i Sili o Egelani ina ia filifili se aso mo talosaga ma 'anapogi ia fa'ate'a'ese ai le fa'ama'i vevela mata'utia (o le cholera), na tali mai ia, "Ia fa'amamā ma fa'availa'au o outou fale ma auala, ia fa'amalosia le tūmamā ma le soifua malōlōina i tagata matitiva, va'ai ia tele ma lava mea'ai ma lavalava mo i latou, ia fa'aaogā tulaga e tonu ma tatau e puipuia ai le olamamā, ona outou lē mana'omia lea o le anapogi ma le tatalo. O le a lē fa'afofoga mai le Atua i a outou talosaga pe a lē o faia e outou Āna fofō e puipuia ai mai fa'ama'i.

Ua fa'apea mai Paulo, "Ia tatou fa'amamā iā te i tatou i mea uma e leaga ai le tino atoa ma le agaga, ia fa'a'ato'atoina lo outou fa'apa'iaina i le mata'u i le Atua" (II Korinito 7:1). Ua ia tu'uina mo so tatou fa'amalosi'aga le sa'olotoga o lo'o maua e i latou ua fa'apa'iaina moni: "O lenei, ua leai se fa'asala i ē o iā Keriso Iesu, o ē lē savavali i la le tino, a e i la le Agaga" (Roma 8:1). Na ia tu'uina se lu'iga i tagata Kalatia, "Ia outou savavali i la le Agaga, ona lē faia lea e outou o le tu'īnanau o le tino" (Kalatia 5:16), ma na ia fa'aigoaina isi itū'aiga tu'īnanau fa'aletino - "o le ifo i tupua,... o le onāga,... ma mea fa'apenā" (fuai'upu 20, 21). Ina ua uma ona fa'ailoa mai fua o le Agaga, e i ai le lē so'onafai, na ia toe fa'aopoopo mai, "O ē o iā Keriso, ua fa'asatauroina e i latou le tino, ma ōna mana'o, ma ōna tu'īnanau" (F. 24).

(10) O LE Ā LE MEA O LE A TUPU IĀ I LATOU E FA'AMALIEINA TU'INANAU MA FA'ALEAGA LE MALUMALU O LE TINO?

Afai e fa'aleaga e se tasi le malumalu o le Atua, e fa'aleagaina lenā tagata e le Atua; auā e pa'ia le malumalu o le Atua, o outou lava ia.

I Korinito 3:17

E lē sao atu lava i ai se mea leaga e tasi, po o sē na te faia se mea 'inosia, po o se pepelo; na o i latou lava ē ua tusia i le tusi o le ola a le Tama'i Mamoe.

Fa'aaliga 21:27

Ua fa'apea mai le aposetolo o Iakopo, o le poto mai lugā "muamua ona mamā" (Iakopo 3:17). Pe ana va'ai ia i sona uso o fa'aaogāina le tapa'a, mata e na te lē ta'uvaleina lea masani e "la le lalolagi ia, o le mea fa'aletino, o le fa'atemoni ia" (F. 15)? I nei ona pō o le malamalama fa'aKerisiano, e fa'afia ona ta'uta'u le sua fa'ia o Keriso e laugutu ua 'ele'elea i le tapa'a ma le māmāva ua fa'aleagaina e le manogi leaga. O le agaga e mafai ona fafia i lea tulaga lē mamā e tatau lava fo'i ona tū 'ele'elea. E pei ona 'ou va'aia i ē ua fa'ailoa mai e fiafia i fa'amanuiāga o le ola e fa'apa'iaina, a o lo'o fa'apagotāina e le tapa'a, e fa'aleagaina mea uma o lo latou si'osi'omaga.

O tagata e na ona ta'u lo latou amioatua e ofo atu pea o latou tino i le fata faitaulaga a Satani ma fa'amū ai le taulaga manogi o le tapa'a i lona mamalu fa'asatani. O lenei 'upu e mata'utia, ona o lenei taulaga sa faia i se atua. Ona o le Atua e mamā ma pa'ia, e na te lē talia se mea e 'ele'elea lona uiga, o le a tatau ai ona Ia te'ena lenei taulaga e tautele, e palapalā, ma e lē pa'ia. O le mea lea ua tatou iloa ai ma le mautino o Satani lea ua na talia le fa'amaualuga.

(11) O LE Ā LE FOLAFOLAGA E MAFAI ONA TATOU TAPA I AI A O TATOU TAUMAFAI E TETE'E I TU'INANAU TAULETINO?

Auā e lē pule le agasala iā te outou; auā ua outou lē nonofo i le tulafono, a o le alofa tunoa.

Roma 6:14

Na maliu Keriso e lavea'i le tagata mai le 'u'umau a Satani. Na afio mai o Ia e fa'asa'oloto i tatou, e ala i le toto mai Lana taulaga mo le fa'amagaloina o agasala. O le tagata ua 'avea ma mea totino a Iesu Keriso, ma o lona tino ua fai ma malumalu a le Agaga Pa'ia, o le a lē toe fai ma pagotā a le masaniga leaga o le fa'aaogā ta'pa'a. O lona malosi e ā Keriso lea, o Lē na fa'atauina ia i le tau o le toto. O ia o le mea totino a le Ali'i. E fa'apefea ona lē agasala ia pe a o fa'aaogā itūlā o aso uma i le fa'amalieina o se tu'īnanau e leai se fa'avae i le natura?

(12) PE AFAI E VALA'AUINA I TATOU E KERISO E FAI MA MALAMALAMA O LE AMIOTONU I LE LALOLAGI, O LE Ā LE FOLAFOLAGA E MAFAI ONA TATAOU TAPA I AI?

O A'u o Ieova, na 'Ou vala'auina 'oe i le amiotonu; 'Ou te taofimauina lou lima, ma A'u leoleo iā te 'oe, 'Ou te avatua fo'i 'oe e fai ma feagaiga a le nu'u, o le malamalama o nu'u 'ese.

Isaia 42:6

E matuā tele le tupe e fa'aalu fa'ama'imau i tausaga uma mo le fa'amalieina o lenei tu'inanau, a e o lo'o fano agaga e to'atele ona o le mana'omia o le 'Upu o le Ola. O ē o lo'o ta'u mai o latou o Kerisiano ua latou fāoa pea mea a le Atua, i sefulua'i ma taulaga, a o lo'o latou ōfo atu i luga o le fata faitaulaga le tu'inanau e malaia ai, i le fa'aaogā o le tapa'a, e sili atu i lo o le tu'u o le fesoasoani mo ē matitiva po o le avatu o mea o lo'o mana'omia mo le galuega a le Atua. O i latou ua fa'apa'iaina moni o le a mafai ona fa'ato'ilalo tu'inanau leaga uma. O le a mafai ona fa'au'i atu 'oloa sa fa'aaogā lē tataui i le fale teumea a le Ali'i, ma o le a ta'ita'iina le Kerisiano ia fa'afitia ia lava, ia ofo atu fa'ataulaga, ma ia lē toe fa'ataugā. Ona 'avea ai loa lea o i latou ma malamalama o le lalolagi.

(13) E FA'APEFEA ONA AFĀINA LO TATOU SOIFUA MANUIA FA'ALETINO MA LE FA'ALEAGAGA MAI LE FA'AAOGĀ O VAILA'AU E FIAGATĀ ONA TU'U MA AMIOGA E LĒ TAULAU?

'Aua ne'i fa'asesēina outou, e lē ulagia le Atua auā o le mea e lulūina e le tagata, o le mea lava lea e seleseleina mai ai e ia; o sē lulū i la lona tino, e selesele mai ai e ia i la le tino le mea e pala; a o sē lulū i la le Agaga, e selesele mai ai e ia i la le Agaga le ola fa'avavau.

Kalatia 6:7, 8

O le tī ma le kofe, fa'apea ma le tapa'a e i ai le vaila'au 'ona e afāina ai le tino o le tagata. O le kofe ma le tapa'a e fa'anefuina ai le mafaufau ma fa'aitiitia ai le malosi o le tino. O su'esu'ega uma ua aumaia e fa'atatau i le leaga o le tapa'a e tataui fo'i lea mo le fa'aaogāina o le tī ma le kofe. O i latou ua masani i le fa'aaogāina o le tī, kofe, tapa'a, vaila'au e fa'asāina, po o le 'ava malosi, pe a 'ave'esea lea tu'inanau, o le a lē mafai e latou ona tosina atu ma le fiafia ma le sogasogā e tapua'i i le Atua. E foliga ua leai se mana o le alofa tunoa o le Atua e toe fa'aolaola ma fa'amalosia ai le fa'aleagaga o a latou talosaga po o a latou molimau. E tataui iā i latou ua ta'ua o Kerisiano ona manatunatu i le pogai o lo latou fiafia. E sau mai lugā po o lalō? I le tagata o lo'o fa'aaogā vaila'au fa'asāina, pe a lē fa'amalieina lea tu'inanau, o mea uma o le a foliga salafalafa ma ua lē manino. O le a tineia le lagona moni o le tino ma le mafaufau, ma o le a faigatā ona lagona e ia le mana fa'atosina o le Agaga Pa'ia. Pe a leai ia vaila'au e pei ona masani ai, o le a i ai se mana'oga e le tino ma le agaga, e lē mo le amiotonu, lē mo le mamalu, e lē mo le fa'atasi mai o le Atua, a e mo le tupua ua pele i lona loto. I le fa'amalieina o tu'inanau, o le a fa'avaivaiina ai loa i aso ta'itasi lo latou malosi, ma lē mafai ai ona fa'amamaluina le Atua.

'Ou te iloa e i ai tulafono o le soifua malōlōina e pulea lona uiga ma le i'uga. E mafai ona 'ou filifili e usiusita'i i ai pe lē fa'alogofa'i i ai. O le a 'ou selesele lava mea 'ou te lulūina.

Li'o le Tali:

Ioe

Lē Mautonu

Ua 'ou iloa o a'u filifiliga fa'atatau i le soifua malōlōina o le a afāina ai lo'u lelei fa'aletino a e fa'apea fo'i le mafai ona 'ou malamalama ai i mea fa'aleagaga.

Li'o le Tali:

Ioe

Lē Mautonu

Ua 'ou iloa nei e finagalo le Atua ia pito mao'e ona 'ou manuia ma, ona o Lona alofa ua Ia vala'auina a'u e fa'amamalu o Ia i a'u mea 'ai uma, mea inu, ma mea uma 'ou te faia.

Li'o le Tali:

Ioe

Lē Mautonu

Li'o le Tali: **Ioe** **Lē Mautonu**

Tali o Tatalo

This image shows a blank sheet of white paper with horizontal ruling lines. The lines are evenly spaced and extend across the width of the page. There are no margins, text, or other markings on the paper.

O le Ogāumu 'A'asa

Lesona 4

I le tausaga lava sa amata ai le galuega a Tanielu ma āna uō mo le tupu o Papelonia, sa i ai mea na tutupu sa matuā tofotofoina ai le uiga tonu o nei talavou lutaia, ma fa'amaonia ai i luma o le malō fa'apaupau le mana ma le amiotonu o le Atua o Isara'elu. A o tepataula'i le Tupu o Nepukanesa ma lona lagona e i ai le mea o le a tupu, na fai sana miti ofoofogia ma na matuā fa'apopoleina ai o ia, "ma ua lē iloa e ia sina moe" (Tanielu 2:1). O lenei miti o le pō sa matuā afāina ai lona mafau, a e peita'i sa lē mafai e ia ona manatua au'ili'ili se mea fa'apito. Na ia vala'au i āna va'aifetū ma taulāitu ma na ofo i ai 'oa ma mamalu pe afai latou te fa'amatala iā te ia le miti ma lona uiga. Peita'i sa latou fa'apea ane, "Ia e fetalai mai le fa'alepō i āu 'au'auna, ona matou fa'aali atu ai lea o le uiga" (Tanielu 2:4).

Pe afai e latou te mafai ona fa'amatala le uiga, e silafia e le tupu oa le a mafai fo'i ona latou iloa le miti. Ona o Lana ta'ita'iga alofa, sa tu'u ai e le Ali'i iā Nepukanesa lenei miti, ma le mafuaaga na fa'agalo ai, e ui ina sa matuā afāina lona mafau, a e ina ia fa'ailoa ai amio fa'afoliga o le 'au popoto a Papelonia. Sa matuā ita le tupu ma ua ta'u atu e fasiotia i latou uma pe a lē mafai ona fa'ailoaina le miti i le taimi o lo'o tu'u mai. O le a fa'aumatia ai fo'i ma Tanielu ma āna uō fa'atasi ma le 'au perofeta pepelo; peita'i sa tula'i Tanielu ma ulu atu i luma o le tupu, ma talosaga atu mo sina taimi ina ia mafai ona ia sauni e fa'ailoa le miti ma lona uiga.

(1) O LE Ā LE FOLAFOLAGA SA TAPA I AI TANIELU MA ĀNA UŌ A O MATUĀ TOFOTOFOINA O LATOU OLA?

Auā o Ieova na te foa'i mai le poto; mai Lona fofoga le poto ma le fa'autauta.

Fa'ata'oto 2:6

A e afai ua leai se poto i so outou, inā ōle atu ia i le Atua, o lē foa'i tele mai i tagata uma ma le lē toe ta'uta'ua; ona foa'iina mai ai lea iā te ia.

Iakopo 1:5

Sa fa'ataga e le tupu lenei talosaga; na fa'apotopoto Tanielu ma āna uō ma latou avatu i luma o le Atua lea matā'upu, ma ua sa'ili i latou mo le poto e na o le Pogai o le malamalama ma le atamai e maua mai ai. E ui ina fa'atasi ai i latou i le maota o le tupu ma o lo'o si'omia pea i fa'aosoosoga, a e le'i galo iā i latou lo latou tiute i le Atua. Sa matuā manino i o latou mafau Lana ta'ita'iga ua o'o ai i le tulaga ua i ai; o lea o lo'o latou faia Lana galuega, fa'ataunu'u mea uma ua vala'auina ai i latou e le 'upu moni ma le tiute. E talitonu fa'amaoni i latou i le Atua. E liliu i latou i le Atua mo le malosia pe a i ai faigatā ma fa'alētonu, ma e fa'atasi pea Ia ma i latou, o lo latou fesoasoani.

(2) O LE Ā LE TA'IALA SA FAI MA FA'AVAE O A LATOU TALOSAGA?

O le mea lea ua fetalai mai ai Ieova le Atua o Isara'elu, Na 'Ou fai atu lava i lou aiga ma le aiga o lou tamā, latou te feoa'i i O'u luma e fa'avavau; a o lenei, ua fetalai mai Ieova, Ia mamao lea mea iā te A'u, a o ē faasili iā te A'u, 'Ou te fa'asili iā te i latou; a o ē 'ino 'ino mai iā te A'u, e ta'u fa'atauva'aina i latou.

I Samuelu 2:30

E le'i i ai se talosaga mai au'auna a le Atua sa lē aogā. Na latou fa'amamaluina Ia i taimi uma, ma i itulā o tofotofoaga, na fa'amamalu i latou e Ia. Sa fa'aalia le mea lilo iā Tanielu ma na alu fa'avave e talosaga se feiloā'iga ma le tupu.

(3) O AI NA TU'U I AI E Tanielu le fa'aalologa mo le vavega o le fa'aliliuina o le miti?

A o i ai le Atua i le lagi, o Lē na te fa'aalia mea ua lilo, ma fa'ailoa mai iā Nepukanesa le tupu o mea e o'o mai i aso amulī. Sa fa'apea lau fa'alepō ma le mea na e silafia i lou tofaga.

Tanielu 2:28

E ui ina si'omia le tupu e āna 'oa ma le mamalu, a e sa matuā mafatia lona loto a o lo'o tula'i atu i ōna luma le talavou Iutaia, o lona agaga e filemū ma fiafia i lona Atua. O le taimi nei e mafai ai e Tanielu ona fa'aeaina ia lava, ina ia fa'amuumua ai ia ona o lona lelei ma lona poto maoa'e. Peita'i sa ia muā'i taumafai e fa'au'ese vi'iga mo ia a e fa'aeaina le Atua ona o la o le pogai o le poto. Sa fa'alologologo le tupu i vaega uma o lo'o fa'amatala āu'ili'ili uma mai o le miti; ina ua mae'a ona ta'u mai le uiga, na lagona e ia e na te mafai ona talitonu o se fa'aaliga lava lea mai le Atua.

(4) O LE Ā LE MEA NA FOLAFOLAINA ATU E LE TUPU ONA O LENEI VAVEGA?

Ona fai atu lea o le tupu iā Tanielu, ua fa'apea atu, E moni, o lo outou Atua o le Atua o atua ia, ma le Ali'i o tupu, o Lē fa'aali fo'i i mea ua lilo, auā ua e mafaia ona fa'aali o lenei mea sa lilo.

Tanielu 2:47

O 'upu moni sa tu'u mai i lenei fa'aaliga o le pō sa matuā afāina ai le mafaufau o le Tupu o Nepukanesa; ma le loto maulalo ma le āva tele, na ia fa'apa'ū i lalo ma tapuā'i i le Atua.

(5) SA FA'APEFEA ONA FA'AALIA E LE TUPU LONA TOE FO'I I LE IFO I TUPUA?

Na faia e Nepukanesa le tupu o le tupua auro, e onogafulu kupita o lona umi lea; e ono kupita o lona lautele lea; na ia fa'atūina i le fanua laugatasi o Turu i le itū malō o Papelonía.

Tanielu 3:1

Sa fa'asusuluina le malamalama mai le lagi i luga o le Tupu o Nepukanesa, ma e mo sina taimi na osofia ia i le mata'u i le Atua. Peita'i sa fa'atumulia lona loto i le mitamitavale ona o fa'amanuiāga e tele, ma sa galo iā te ia lana molimauina o le Atua soifua. Na toe fa'aauau pea ma le ma'elegā lana ifo i tupua fa'apea le olaga so'onafai.

Na ia fausia se fa'atusa auro mai 'oloa sa ia maua mai taua, e pei o lea sa ia va'aia i lana miti, ua faatū i le fanua laugatasi o Tura, ma ua ia fa'atonu ta'ita'i ma tagata uma e tapuā'i ma ifo i ai, a lē o lea o le a oti. O le tupua e 90 futu le umi a e 9 lona lautele, ma i le va'ai a ia tagata ifo tupua sa tu'u mai ai se fa'aaliga e aupito sili le maualuga ma le mamalu. Sa alu le fa'aaliga e vala'au ai tagata uma o le malō ina ia fa'apotopoto mo le fa'apa'iāga o le tupua, ia ifo i lalo ma tapua'i i ai pe a fa'alogoina le leo o la'au pese. Pe a i ai se tasi e lē ususita'i i ai, o le a lafoina i totonu o le ogāumu 'a'asa.

(6) O LE Ā LE TALI NA TU'U ATU E TALAVOU IUTAIA I MANA'OGA E FA'ATATAU I LE IFO ATU I TUPUA A LE TUPU?

Ua tali mai Sataraka, Mesako, ma Apeteniko, ua fa'apea mai i le tupu, Nepukanesa e, e lē aogā ona matou tali atu iā te 'oe i lenei mea; afai o lea, ua mafai lo matou Atua, matou te 'au'auna i ai, ona lavea'i mai iā te i matou ai le ogāumu e mū ai le afi, na te lavea'iina mai lava i matou ai lau pule le tupu. A e peita'i, a lē o lea, ia e silafia e 'oe le tupu e, matou te lē 'au'auna i ōu atua; o le tupua auro fo'i ua e fa'atūina, matou te lē ifo i ai.

Tanielu 3:16-18

Ua o'o i le aso na filifilia ma ua fa'apotopoto mai uma le malō, ona aumai lea o le tala i le tupu e fa'ataau i talavou Iutaia e to'atolu sa ia fa'atū i luga o itūmalō o Papelonía, ua latou lē tapuā'i i le fa'atusa. O uō lava ia a Tanielu sa fa'aigoa e le tupu, o Sataraka, Mesako, ma Apeteniko. Na vala'au le tupu, ma lona to'asā tele, ina ia tutū mai le to'atolu i ōna luma, ma a'o ia fa'asino i le afi 'a'asa sa ia ta'u atu le fa'asalaga o le a o'o i ai pe a lē usita'i i lana fa'atonuga. Peita'i e le'i mafai ona fa'aliliu'ese nei talavou amio fa'atamāli'i mai lo latou fa'amaoni i

le Pule aoao o malō uma. Sa a'oa'oina i latou mai le tala'aga o a latou tua'ā, o le lē usiusita'i o le lē fa'amamaluina lea o le Atua, e o'o ai i faigatā ma le malaia. A o le mata'u i le Ali'i o le amataga lea o le poto ma le fa'avae o manuia uma. Sa vā'ai latou ma le filemū i le afi 'a'asa ma le motu o tagata ifo i tupua. O latou e fa'atuatua pea i le Atua, o le a Ia lē tu'ulafoā'i i latou i se taimi fa'apenei. Na latou tali atu ma le fa'aaloalo ma le matuā mautino ato'atoa.

(7) O LE Ā LE TA'IALA MAI LE TUSI PA'IA SA FA'AFEAGAI MA LA LATOU FILIFILIGA E USIUSITA'I I LE ATUA?

Ua latou fai mai iā te Ia, E o Kaisara. Ona fetalai atu ai lea o Ia iā te i latou, O lenei, o mea a Kaisara, ia outou avatu iā Kaisara; a o mea a le Atua ia avatu ia i le Atua.

Mataio 22:21

Na si'omia le tupu e āna ta'ita'i maualuluga, o ali'i o le malō, ma fitafita o malō na ia fa'ato'ilalo; sa fa'aeaina ia e tagata popoto uma ona o le poto ma le malosi o atua. A o i totonugalemū o lea va'aiga, o lo'o tula'i mai ai talavou Iutaia, ma o tete'e pea i le poloa'iga a le tupu. O latou e usiusita'i i tulafono a Papelonia pe a lē fete'ena'i ma fetalaiga a le Atua, peita'i e lē liliu'ese i latou mai lo latou tiute i Lē na faia i latou.

(8) SA FA'APEFEA ONA TALI LE TUPU I LE LATOU FA'AMAONI I LE ATUA?

Ona tumu ai lea o Nepukanesa i le ita tele, ua 'ese le tū o ona fofoga ia Sataraka, ma Mesako, ma Apeteniko; ua tautala atu ia, ua fa'apea atu, ia fa'a'a'asa le ogāumu, ia fa'afitu ona sili i lē ua masani ai ona tafuina.

Tanielu 3:19

E le'i fa'atuā'oa le to'asā o le tupu. Ua i ai nei o ia i le tumutumu o lona malosi ma le mamalu, a e ua tū tete'e mai sui o le malō 'inosia o Iutaia, o se mea matuā fa'atigā lea i lona loto mitamitavale ma ua ia lē mafai ona lavātia. Sa lafoina nei pagotā Iutaia i totonu o le ogāumu afi e sautuafitu lona vevela, a e ona o le 'a'asa o le afi na fa'aumatia ai ē sa lafoina i latou i totonu.

Sa fa'afuase'i ona sui foliga o le tupu ona ua ia matuā fefe lava. Ua pupulataula'i lana va'ai ma sa lē to'esea mai le afi mumū.

(9) O LE Ā LE 'UPU NA FAI A LE TUPU MA LONA MAOFA TELE NA'UĀ?

Ona matuā ōfo ai lea o Nepukanesa le tupu, ua vave ona tula'i, ua fai atu, ua fa'apea atu i āna tulafale, Pe na tatou lē lafoina ea tagata e to'atolu o fusifusia i totonu o le afi? Ua tali mai i latou, ua fa'apea mai i le tupu, Le tupu e, sa fa'apea lava. Ua tali atu o ia, ua fa'apea atu, Fa'auta, ua 'ou iloa tagata e to'afā, ua tatalaina, ua feoa'i i totonu o le afi, ua lē afāina lava i latou; ua tino mai lona to'afā ua pei o se Ālo o le Atua.

Tanielu 3:24, 25

Pe a fa'aalia e Keriso Ia lava i le fanau a tagata, o le a fetalai se mana e lē mava'aia i o latou agaga. Latou te lagona le fa'atasi ai o le Atua ma i latou. E tetemū tupu ma ali'i i luma o Lona mamalu, ma latou fa'aailoa atu o le Atua soifua e aupito maualuga lea i lo o pule uma fa'alelalolagi.

(10) O LE Ā LE UPU A LE TUPU NA TA'UTINO ATU AI MA LE LOTO FA'AMAULALO?

O le mea lea 'ou te pule ai, Ai se nu'u, po o se atu nu'u, po o se gagana 'ese, na te faia se 'upu vale i le Atua o Sataraka, Mesako, ma Apeteniko, e vaevaenini'iina i latou, e fai fo'i o latou fale ma fa'atāfuna; auā e leai se isi atua na te mafaia ona lavea'iina fa'apenā.

Tanielu 3:29

Sa lagona e le tupu le masiasi ma le salamō, ona ia fa'apea atu lea, "O 'au'auna a le Atua silisili, ō mai ia, inā ō mai" (Tanielu 3:26). Na latou usiusita'i i le fa'atonuga, ma ua ō mai i luma o le motu o tagata, e le'i i ai se fa'aailoga o le afi i o latou lavalava. Na aumaia e lenei vavega se suiga i mafaufau o tagata ma ua galo iā i latou

le tupua auro sa fa'atūina ma se fa'aaliga ofoofogia. Sa faia loa e le tupu le poloa'iga e fasiotia so'o se tasi e fai 'upu e tete'e ai i le Atua o nei talavou Iutaia.

(11) O LE Ā LE TALOSAGA O LE A FAIA I LE ATUA E LE TAGATA KERISIANO UA FA'APA'IAINA?

Ia 'ou fa'alologologo i Lou alofa i le taeao; auā 'ou te fa'atuatua iā te 'oe; ia e fa'asino mai le ala 'ou te savali ai; auā o lo'o naunau atu lo 'u loto iā te 'Oe.

Salamo 143:8

O nei talavou Eperu e to'atolu sa fa'aalia mai e iā i latou le fa'apa'iaina moni. O le a lē taofia le ta'iala a le Kerisiano fa'amaoni se'i fuatia po o ā i'uga. E lē fesili po o le ā le manatu a tagata pe a 'ou tago e fai lea mea? Pe o le a afāina fa'apefea lo'u olaga fa'alelalolagi pe a 'ou faia lea mea? Ia matuā naunauta'i le fanau a le Atua ia iloa Lona finagalo i le mea e tatau ona latou faia, ina ia fa'amamaluina o Ia i a latou galuega. Ua faia e le Ali'i mea uma ina ia mafai ona pulea e Lona alofa tunoa loto ma olaga o Ōna so'o uma, ina ia 'avea latou o molī e susulu ma fa'amalamalamaina ai le lalolagi.

(12) PE AFAI TATOU TE FILIFIFLI IA 'AUA NE'I 'AVEA LE POTO, MALOSI, PO O LE TULAGA IA FA'ATAUMĀLUA AI LO TATOU UIGA TONU, O LE Ā LE FOLAFOLAGA E MAFAI ONA TATOU TAPA I AI?

Auā o Ieova le Atua o le lā lava ia ma le talitā; e foa'iina mai e Ieova le alofa tunoa ma le manuia; e lē taofia e Ia se mea lelei i ē ua sao lo latou savavali. Ieova o 'au e, 'amu'ia le tagata ua fa'atuatua iā te 'Oe.

Salamo 84:11, 12

O nei tama Eperu fa'amaoni e matuā agava'a lava, ma e iā i latou le atamai e aupito maualuga ma e i tulaga fa'aaloologia o le taimi nei; peita'i e ui i nei mea uma, a e latou te le'i fa'agaloina ai le Atua. O lo latou malosi sa gaua'i atu i le mana tosina o le alofa tunoa o le Atua, ma e ala i le mautū o lo latou uiga fa'amaoni, sa latou fa'aalia lea i vi'iga o Ia Lē na vala'auina i latou mai le pogisā a e ūlu atu i Lona malamalama ofoofogia. Ina ua laveā'iina i latou i luma o lea fa'apotopotoga e mata'utia le to'atele, sa va'aia ai le mana ma le mamalu o le Atua. Na tula'i mai Iesu lava ia i o latou tafatafa i totonu o le ogaūmu 'a'asa, ma e ala i le mamalu o Lona fa'atasi ai, sa iloa mautinoa ai e le tupu o Papelonia e lē o se tasi lea a e na o le Ālo o le Atua. O le malamalama o le lagi sa fa'asusulu mai iā Tanielu ma āna uō, se'ia o'o ina malamalama uma o latou soa e fa'atatau i le fa'atuatua e fa'aeaina ai o latou olaga ma fa'amatagofie ai o latou uiga. E ala i le laveā'iina o Āna 'au'auna fa'amaoni, ua fa'aailoa mai ai e le Ali'i o le a Ia tula'i ma ē sauāina ina ia fa'ato'ilalo pule fa'alelalolagi uma e taumafai e solipala le puleaga a le Atua o le lagi.

(13) O AFEA O LE A FA'AALIA MAI AI FUA O I LATOU O LO'O TUMAU PEA IĀ KERISO?

Auā e sau le Atali'i o le tagata fa'atasi ma Āna agelu i le mamalu o Lona Tamā; ona tauia lea e Ia ē ta'itasi e tusa ma lana galuega.

Mataio 16:27

O se a'oa'oga ua tu'u mai nei i lē e loto vaivai, e lē mautonu, e loto pala'ai, e lē to'a i ala lelei a le Atua, a e o se fa'amalosia'aga iā i latou o ē o le a lē fuitua mai tiute ona o faigatā po o mea e tau fa'amata'u mai. O nei uiga fa'amaoni ma le tumau ua tu'u mai o se fa'ata'ita'iga o le ola ua fa'apa'iaina; a e leai so latou manatu e fa'aailoa mai o latou e matuā tāua lava. O le aofa'i o le lelei atonu na faia e Kerisiano fa'amaoni e lē mafai ona faia se fa'atatau se'ia o'o ina fa'aailoa i tusiga o le olaga pe a nofoia le fa'amasinoga ma tatalaina tusi.

E fa'aalia mai e Keriso Lona agaga fiafia i lea vaega o tagata; Na te ta'u i latou o Ōna uso. E tatau ona i ai se tau selau o i tatou i le mea o lo'o i ai nei se to'atasi, ia soso'o felāta'i atu i le Atua, o latou olaga e matuā mausalī i

Lona finagalo, o le a 'avea ai i latou o malamalama e susulu ma pupula atu, o ē fa'apa'iaina ato'atoa i le loto, le tino, ma le agaga.

(14) O LE Ā LE Ā'UPEGA E PITO SILI LE MALOSI E MAFAI ONA MAUA E LE FITAFITA A KERISO?

Auā o i latou uma o ē fanau mai i le Atua, e manumalō i latou i le lalolagi; o lenei fo'i le manumalō e manumalō ai i le lalolagi, o lo tatou fa'atuatua lava.

I Ioane 5:4

O lo'o alu pea le fete'ena'iga i le vā o le fanau a le malamalama ma le fanau a le pōuliuli. E tatau iā i latou uma o ē ta'uta'u le suafa o Keriso ona fa'ate'a 'ese le tulaga tautulemoe o lo'o fa'avaivaiina ai le uiga fia taumafai, a e ia tula'i e fetaia'i ma tiute tāua e o'o mai i o latou luga. O i latou e faia fa'apea, atonu o le a fa'aalia iā i latou le mana o le Atua. O le Ālo o le Atua, le Fa'aola o le lalolagi, o le a fa'aילוaina mai i a latou 'upu ma a latou galuega.

'Ou te fa'afetai i le Atua, lo tatou Tamā; Iesu Lona Ālo; ma le Agaga Pa'ia - le Pogai i taimi uma o lo tatou ola filemū ma le saogalemū i taimi o faigatā.

Li'o le Tali: **Ioe** **Lē Mautonu**

'Ou te naunauta'i ia gaua'i pea i le mana fa'apa'ia o le Atua, ina ia fa'apei o talavou Iutaia, o le a 'ou lē fa'amasaloina lo'u uiga tonu ma le lelei mo le malosi po o se tulaga.

Li'o le Tali: **Ioe** **Lē Mautonu**

Le Ali'i e, fa'amolemole ia fa'atumulia a'u i le mana o le Agaga Pa'ia, ina ia 'ou le tu'umanatu ai i i'uga fa'alelalolagi e fa'atatau i le mamalu ma le usiusita'i iā te 'Oe.

Li'o le Tali: **Ioe** **Lē Mautonu**

O la'u tatalo e faifaipēa: "Le Ali'i e, ia fa'apa'ia mai a'u ma ia fa'atumaui lo'u uiga mamā ina ia 'avea a'u ma fa'aa'oa'o i le lalolagi, ma fa'aali atu vi'iga o Ia Lē ua vala'auina a'u mai le pogisā i Lona malamalama ofoofogia."

Li'o le Tali: **Ioe** **Lē Mautonu**

Manatu o Su'esu'ega

Tatalo Mana'omia

Tali o Tatalo

[illegible]

O Tanielu i le Lua o Leona

Lesona 5

(1) AISEĀ NA TOFIA AI Tanielu I LUGA A'E O TA'ITA'I MA ALI'I SILI E PULE I LE MALŌ?

A ua sili lenei Tanielu i ali'i silisili ma ali'i sili, ina ua tele lona atamai, sa manatu fo'i le tupu ia tofia o ia e pule i le malō uma.

Tanielu 6:3

Ina ua nofoia e Tariu le nofoāli'i o Papelonía, na ia sauni loa e toe fesuia'i le malō. Na ia "tofia ē pule i le malō o ali'i sili e tasi le selau ma le to'aluafulu, latou te i ai i le malō uma lava. Ua tofia fo'i ali'i silisili e to'atolu, ua i ai Tanielu; latou te pule i ia ali'i sili" (Tanielu 6:1, 2).

(2) INA UA FAIA SU'ESU'EGA A TA'ITA'I MATAŪ'A O LE MALŌ E FA'ATATAU I UIGA AGATONU O Tanielu, O LE Ā LE MEA SA FA'AALI MAI I LE LATOU SA'ILIGA?

Ona tausa'ili lea e ali'i silisili ma ali'i sili ina ia maua se mea a le malō e fa'alani ai se sala iā Tanielu; a ua lē maua e i latou se mea e fa'alani ai po o se mea leaga e tasi; auā sa fa'amaoni o ia, ua lē maua fo'i sona sesē e tasi, po o se mea leaga.

Tanielu 6:4

Sa oso le matau'a i loto o le 'au ta'ita'i o le malō ina ua fa'atūina Tanielu i tulaga mamalu. Na sa'ili e nei ali'i ma pule se mafua'aga ina ia aumai ai se faitiōga e tete'e ai iā te ia. "A ua lē maua e i latou se mea e fa'alani ai po o se mea leaga e tasi; auā sa fa'amaoni o ia, ua lē maua fo'i sona sesē e tasi, po o se mea leaga" (Tanielu 6:4).

(3) O LE Ā LE POGAI O LE A MAUA MAI AI LE OLAGA E FA'AMAONI MA E FA'APA'IAINA?

Ou te fai atu, ia outou savavali i la le Agaga, ona lē faia lea e outou o le tu'inanau o le tino.

Kalatia 5:16

O se fa'aa'oa'oga lenei ua tu'u mai mo Kerisiano uma. Sa tumau pea i aso ta'itasi foliga o le matau'a i luga o Tanielu; sa ati ma le ma'ai la latou va'ai ona o le 'ino'ino; e ui i lea na leai se 'upu po o se gaoioiga o lona olaga na mafai ona fa'aalia mai ai se sesē. Ma e na te lē fa'ailoa se tulaga ua fa'apa'iaina; peita'i na faia e ia le mea e sili atu le lelei - na ola o ia i se olaga e fa'amaoni ma e fa'apa'iaina.

(4) O LE Ā LE MANATU O LE 'AU TAUPULEPULE LEAGA PE FA'APEFEA ONA FA'ATAUNU'U LE FA'AUMATIĀGA O Tanielu?

Ona fa'apea atu ai lea o ia tagata, E lē maua e i tatou se mea leaga i lenei Tanielu, pe afai tatou te lē maua se mea iā te ia i le tulafono a lona Atua.

Tanielu 6:5

Sa fa'atumulia fili o Tanielu i le ita ona latou te le'i mafai ona maua se pona i lana amio po o se sesē i lana galuega ia fa'avae ai se faitiōga e tete'e ai iā te ia. "Ona fa'apea atu ai lea o ia tagata, E lē maua e i tatou se mea leaga i lenei Tanielu, pe afai tatou te lē maua se mea iā te ia i le tulafono a lona Atua" (F. 5). E fa'atolu i le aso ona tatalo Tanielu i le Atua o le lagi, ma e na o lenei le faitiōga sa mafai ona latou aumaia e tete'e ai iā te ia.

Ua faia loa nei se latou fuafuāga ia taunu'u ai ona fa'aumatia o ia. Sa fa'apotopoto ōna fili ma latou ssa'ili ina ia faia se tulafono e le tupu e fa'asāina ai le malō atoa ona fai se talosaga mo se mea i le Atua po o se tagata, a e

vaganā ai le tupu o Tariu, mo le tolusefulu (30) aso, ma o se isi e lē usita'i i lenei fa'atonuga e tatau ona fa'asala i le lafoina i le lua o leona. E le'i iloa e le tupu e uiga i le ino'ino o ia ali'i iā Tanielu, ma e le'i mātēa e ia o le pogai o le poloa'iga ina ia fa'aumatia ai Tanielu. E ala i uiga taufa'ase'e sa latou fa'asesē le tupu ia talitonu o lea tulafono ua faia ia fa'amamaluina ai ia. Sa tu'umuli latou mai luma o le tupu ma ua fa'afiafiaina ona o le mailei ua mafai ona latou fafauina mo le 'au'auna a le Atua.

(5) O LE Ā LE MEA NA FAI E FA'AALIA AI E LE'I TAU MĀLUELUE LE FA'AMAONI O Tanielu I LE ATUA, E UI INA FA'AMATA'UINA IA I LE OTI?

Ua iloa e Tanielu ua tusia le tusi, ona alu atu ai lea o ia i lona fale, ua avanoa fa'amalama o lona potu e fa'asaga i Ierusalema, ua ta'i fo'i fa'atolu i aso ona to'otuli o ia i ona tulivae, ma tatalo, ma fa'afetai i luma o lona Atua, fa'apei ona masani ai o ia.

Tanielu 6:10

Ua alu le poloa'iga mai le tupu; e masani fo'i Tanielu i fuafuāga uma a ōna fili ia fa'aleaga iā te ia. Peita'i e le'i mafai ai ona suia ōna uiga masani e se mea e tasi. Na ia fa'asaga e fai ma le filemū lona tiute e pei ona masani ai, ma i le itulā e tatalo ai, ua alu i lona afeafe, tatala fa'amalama aga'i i Ierusalema, ma fai āna talosaga i le Atua o le lagi. Ona ua uia lea ala, na ia fa'ailoa atu ai e leai lava se mea fa'alelalolagi e mafai ona tū mai i le vā o ia ma lona Atua, pe ta'u iā te ia po o ai e tatau pe lē tatau ona ia tatalo i ai. Oi le tagata e fa'amaoni i ta'iala! ua ia tū i luma o le lalolagi i lenei aso, e fai ma fa'aa'oa'o e ōnovi'ia, o le Krisiano e lē fefe ma e usiusita'i fa'amaoni. E liliu o ia i le Atua ma lona loto atoa, e ui ina ua iloa o le oti le fa'asalaga mo lona uiga fa'amaoni.

(6) O AI NA FA'ASAGA I AI LE TO'ASĀ O LE TUPU INA UA ILOA UA SOLI LE TULAFONO E Tanielu?

Ua fa'alogole tupu i nā 'upu, ona tigā tele ai lea o ia iā te ia lava, ua naunau o ia ia lavea'iina o Tanielu; ua o'o ina goto le lā o taumafai pea lava ia ina ia lavea'i iā te ia.

Tanielu 6:14

Sa mātā'i pea Tanielu e ōna fili i le aso atoa; e fa'atolu ona ia tu'umuli i lona afeafe, ma e fa'atolu ona latou fa'alogoina le leo o le tatalo fa'atauānau. I le taeao na soso'o ai ua faia loa le faitiōga i le tupu ona ua lē usita'i le pagotā Iutaia, o Tanielu, i lana poloa'iga. Ina ua fa'alogole tupu i nei 'upu, sa matala ōna fofoga ma ia iloa ai le mailei ua uma ona fafauina. Sa matuā fa'anoanoa o ia ona ua fa'atagaina lenei tulafono, ma na galue e fai se fuafuāga atonu o le a mafai ai ona lavea'iina Tanielu. Peita'i sa ō mai fili o le perofeta i luma o le tupu ma nei 'upu, "Le tupu e, ia e silafia le tulafono a Metai ma Peresia, e le tālaina lava se vavao, po o se tulafono ua fa'amauiina e le tupu" (Tanielu 6:15).

(7) O Ā 'UPU FA'ALOTOTELE NA TAUTALA ATU AI LE TUPU IĀ Tanielu?

Ua fai atu le tupu, ona latou ta'ita'iina ane ai lea o Tanielu, ua lafo iā te ia i le lua o leona. Ua fai atu le tupu, ua fa'apea atu iā Tanielu, O lou Atua, o Lē ua e 'au'auna i ai e lē aunoa, o Ia na te lavea'iina oe.

Tanielu 6:16

"Ua fai atu le tupu, ona latou ta'ita'iina ane ai lea o Tanielu, ua lafo iā te ia i le lua o leona.... Ua au mai fo'i le ma'a, ua tu'u ai i le gutu o le lua, ona fa'amaufa'ilogaina lea e le tupu i lana mama, atoa ma le mama a ali'i sa iā te ia, ina ne'i liua le pule iā Tanielu. Ona alu atu lea o le tupu i lona maota ua lē taumafa ia i lea po; e leai fo'i ni la'aupese na avane i ona luma, ma ua te'a iā te ia le moe" (F. 16-18).

(8) O LE Ā LE TUGA NA O'O IĀ I LATOU NA SA'ILI E FA'AUMATIA Tanielu?

Ua fai atu le tupu, ona ta'ita'iina mai ai lea o ia tagata ē na molia Tanielu, ma ua lafo iā te i latou, atoa ma a latou fanau, ma a latou avā i le lua o leona; ua manumalō leona iā te i latou, ua lamupala o latou ivi uma, a o le'i o'o ifo i latou i le ta'ele o le lua.

Tanielu 6:24

I le taeao pō lava, ua usu fa'avavave le tupu i le lua o leona, ma 'alaga, "Tanielu e, le 'au'auna a le Atua soifua, ua mafai ea e lou Atua, o Lē ua e 'au'auna i ai e lē aunoa, ona lavea'i iā te 'oe ai leona?" (F. 20). Na ia fa'alogoina le leo o le perofeta ina ua tali mai, "Le tupu e, ia soifua 'oe e fa'avavau, ua 'auina mai e lo'u Atua o Lana agelu, ua punitia ai gutu o leona, ua lē afāina ai a'u; auā ua silafia e Ia ua leai sa'u amio i Ōna luma; e leai fo'i se mea leaga ua a'u faia i ōu luma, le tupu. Ona fiafia tele lea o le tupu ona o ia, ua ia fetalai atu ia 'aveina a'e Tanielu ai le lua; ona 'aveina a'e ai lea o Tanielu ai le lua, ua lē afāina lava o ia, auā na ia fa'atuatua i lona Atua" (F. 21-23). Sa fa'apea ona lavea'iina le 'au'auna a le Atua. O le mailei sa fausia e ōna fili ia fa'aumatia ai ia, na 'avea ma ala o lo latou lava fa'aumatiāga. Mai le fa'atonuga a le tupu, sa lafoina i latou i le lua, ma sa vave ona fa'aumatia latou e manu fe'ai.

O la'u tatalo pe a o'o ina iloilo ina lo'u olaga, o le a mafai ona fa'a'apea mai e uiga iā te a'u: "latou te le'i maua se mea na tupu po o se mea na sesē; auā e pei ona fa'atuatua o ia, e le'i maua se mea na sesē pe fa'alētonu iā te ia."

Li'o le Tali: Ioe Lē Mautonu

Ua 'ou iloa o lo'o vala'auina a'u e filifili po o ai o le a 'ou 'au'auna i ai. 'Ou te tatalo, e ala i le alofa tunoa o le Atua, o le a 'ou savali latalata iā te Ia, ona pe afai e o'o mai tofotofoga o le a mafai ona 'ou tū fa'amaoni, tusa pe o le ā le totagi.

Li'o le Tali: **Ioe** **Lē Mautonu**

Manatu o Su'esu'ega

Tatalo Mana'omia

Tali o Tatalo

[illegible]

O Tatalo a Tanielu

Lesona 6

(1) O LE Ā LE MEA NA TA'UTA'U ATU E Tanielu INA UA FAI MA SUI O ISARA'ELU?

Ua matou agasala, ma ua fai mea leaga, ma ua matou agaleaga, ua fouvale fo'i ina ua te'a 'ese ma Āu poloa'iga ma Āu fa'amasinoga.

Tanielu 9:5

Ua lata i le fa'ai'uga o le fitusefulu (70) tausaga talu ona 'ave o ia fa'apagotā, a ua fa'agaoiioina le mafaufau o Tanielu e fa'atatau i valo'aga a Ieremia. Sa iloa e ia ua lata mai le taimi e tatau ona toe tofotofoina ai e le Atua Ōna tagata filifilia. Ua anapogi ia, ma le loto fa'amaulalo sa tatalo ma ia ōle atu pea i le Atua o le lagi mo le manuia o Isara'elu.

E le'i fa'a'iloa atu e Tanielu sona ia lava fa'amaoni i luma o le Atua, lē ta'u atu o ia e mamā ma pa'ia. Peita'i o lenei perofeta sa fa'amamaluina ua ta'u atu ia fa'atasi ma tagata e matuā agasala lava o Isara'elu. O le poto na tu'u e le Atua i lenei 'au'auna sa aupito sili ona maoa'e i lo le tomai o tagata mauululuga o le lalolagi, e pei o le pupula o le lā ona susulu i le vānimonimo i le aoauli e sili atu le malamalama i lo o le fetū e pito itiiti. Se'i tatou manatunatu loloto i le tatalo mai le agaga o lenei tagata e matuā fiasia i ai le lagi!

Ma le loto fa'amaulalo lava, ma loimata mai le loto ua matuā tigā, na ia ōle atu mo ia lava ma ōna tagata. Na ia fa'amafola atu lona agaga i luma o le Atua, ta'u atu lona lē aogā ma fa'a'iloa atu le maoa'e ma le mamalu o le Ali'i.

(2) O LE Ā LE ŌLEGA ATanielu - MA O LA TATOU FA'AA'OA'O - PE A FA'APEFEA ONA TU'U ATU A TATOU TALOSAGA I LUMA O LE ATUA?

Lo'u Atua e, ia e liliu mai Ōu fofoga, ma fa'afofoga mai; ia silasila mai Ōu fofoga, ma e silasila mai i lo matou fa'atafunā'ina, atoa ma le 'a'ai ua fa'aigoa i Lou suafa; auā matou te lē avatu lo matou 'ai'oi i Ōu luma ona o a matou amiotonu, a o Lou alofa tele. Le Ali'i e, ia e fa'afofoga mai. Le Ali'i e, ia fa'amagalo mai. Le Ali'i e, ia e fa'asagasaga mai, ma e faia lava; 'aua le fa'atuatuai, ona o Lau afio lava, lo'u Atua e, auā ua igoa i Lou suafa Lau 'a'ai ma Lou nu'u.

Tanielu 9:18, 19

O āna talosaga e matuā fa'atauānau ma e tu'u atu ma lona naunauta'i. Sa 'a'apa atu le 'a'ao o le fa'atuatua e u'umau folafolaga e lē gata a le Silisili 'Ese. O lona agaga sa tigā ma mafatia, a e na ia iloa ua fa'afogaina lana tatalo ma ua iā te ia le manumalō. Pe afai e tatou te tatalo fa'apei o Tanielu, fa'atigā e pei ona ia tigā, ma ia fa'amaulalo i luma o le Atua, e tatau loa ona tatou iloa ua talia a tatou talosaga e pei ona tu'uina iā Tanielu.

Sa tatalo le tagata o le Atua mo fa'amanuiāga a le lagi i luga o Ōna tagata ma ina ia iloa manino Lona finagalo. O le 'avega a lona lot sa mo Isara'elu, o latou o ē sa lē tausia le tulafono a le Atua. Sa iloa e ia o mea leaga uma ua o'o i o latou luga talutalu le lē usiusita'i i Lana tulafono pa'ia. Ua fa'apea ia, "Ua matou agasala, ua matou amio leaga.... Auā o a matou agasala, ma amiolētonu a o matou tamā ua 'avea ai Ierusalema atoa ma Lou nu'u ma luma e i latou uma o ē vagavagai mai iā te i matou" (Tanielu 9:15, 16). Ua alu'ese mai iā Iutaia lo latou tulaga fa'apitoa ma pa'ia, o tagata filifilia latou a le Atua. "O lenei, lo matou Atua e, ia e fa'afofoga mai i le tatalo a lau 'au'auna, atoa ma āna fa'atoga, ma ia malamalama atu Ōu fofoga i Lou malumalu ua fa'atafunā'iina" (F. 17). Sa faliu le loto o Tanielu ma le matuā naunauta'i lava i le malumalu ua fa'atafunā'iina o le Atua. Na iloa e ia o lona tamāo'aiga e mafai ona toe fa'afo'isia mai pe a toe salamō Isara'elu mai le latou solia o le tulafono a le Atua, ma 'avea i latou o tagata e fa'amaoni, loto fa'amaulalo, ma e usiusita'i.

(3) O LE Ā LE TALI MAI LE LAGI NA FA'AILOA AI UA FA'AFOFOGA LE ATUA I LE ŌLEGA A Tanielu NA FAIA MA LE LOTO FA'AMAULALO?

O lo'o ou tautala lava i le tatalo, ua pa'i mai iā te a'u le tagata o Kaperielu, o lē na a'u lua'i iloa i le fa'aaliga, o lo'o lele fa'ata'alise mai i le itulā o le taulaga afiafi. Na ia a'oa'o mai, ma ua tautala mai iā te a'u, ua fa'aapea mai, Tanielu e, ua a'u sau nei e a'oa'o iā te oe e poto ai.

Tanielu 9:21, 22

A o tatalo Tanielu, na alu ifo mai maota o le lagi le agelu o Kaperielu, e ta'u iā te ia ua lagona ma taliina āna talosaga. Sa fa'atonuina lenei agelumamana e tu'u iā Tanielu le agava'a ma le malamalama - ia fofola i ōna luma mea lilo o i lumana'i. O lea, a o sa'ili Tanielu ia matuā iloa ma malamalama i le 'upu moni, na aumaia o ia i se so'otaga tāua ma le 'avefe'au a le lagi.

(4) O LE Ā LE 'ESE'ESEGA I LE VĀ O LE TAGATA O LO'O TA'U MAI UA FA'APA'IAINA MA LĒ O LO'O SA'ILI I AI MA LE FA'AMAONI?

E lē tumau fo'i Lana afioga i totonu iā te outou; auā o Lē ua Ia 'auina mai, tou te lē talitonu i ai. E su'esu'e outou i Tusi, auā ua outou manatu tou te maua ai le ola e fa'avavau; o Tusi fo'i ia o lo'o molimau iā te A'u.

Ioane 5:38, 39

Na maua e Tanielu mai le tali o lana tatalo le malamalama ma le 'upu moni sa ia mana'omia fa'aapea ma ōna tagata, ma sa iloa ai se va'aiga o mea tetele o le a tutupu i lumana'i, se'ia o'o i le afio mai o le Fa'aola o le lalolagi. O i latou o ta'u mai ua fa'apa'iaina a e latou te lē o naunau e sa'ili Afioga Pa'ia po o fete'ena'i ma le Atua i le tatalo ina ia malamalama manino i i le 'upu moni, e lē o iloa le uiga o le fa'apa'iāga moni.

Na talanoa pea Tanielu ma le Atua, ma sa tatala mai le lagi i ōna luma. O tulaga maualuluga na tu'u iā te ia sa maua ona o le loto maualalo ma le sa'ili ma le fa'amaoni. O latou uma e talitonu mai le loto i le afioga a le Atua o le a matelāina i le fia iloa o Lona finagalo. O le Atua o le pogai o le 'upu moni, e na te fa'amalamalamaina le poto e pogisā ma tu'u i le mafaufau o le tagata le malosi e taofimau ai ma iloa 'upu moni ua Ia fa'aali mai.

(5) NA FA'APEFEA ONA SAUNI Tanielu E TULIMATA'I PEA LONA NAUNAUTA'IGA MO LE POTO MAOA'E MA LE MALAMALAMA FA'ALEAGAGA?

O ōna pō ia, o a'u o Tanielu sa 'ou fa'anoanoa ai i vaiasosā ato'atoa e tolu; e leai se mea lelei na a'u 'ai ai, e leai fo'i se 'a'ano o manu, po o se uaina na o'o i lo'u gutu, na 'ou lē u'u ai lava, ua o'o ina mavae atu vaiasosā e tolu.

Tanielu 10:2, 3

Mai lenei mea na tupu, sa tu'u ai e le agelu o Kaperielu iā Tanielu fa'atonuga uma na mafai ona ia maua. Ua mavae nai tausaga a e ua naunau lava le perofeta ia na iloa nisi mea e le'i ato'atoa ona fa'amatalaina, ma na sauniuni lava ia e sa'ili pea le malamalama ma le poto mai le Atua. "O ōna pō ia, o a'u o Tanielu sa 'ou fa'anoanoa ai i vaiasosā ato'atoa e tolu; e leai se mea lelei na a'u 'ai ai, e leai fo'i se 'a'ano o manu, po o se uaina na o'o i lo'u gutu, na 'ou lē u'u ai lava,...Ona a'u tepa a'e lea ma 'ou va'ai, fa'auta fo'i, o le tasi tagata ua 'ofu i le 'ie lino, ma ua fusi lona sulugātiti i le auro lelei o Upasa. O Lona tino fo'i ua pei o le tasesa lea, ma Ōna fofoga ua tino mai pei o le uila, ma Ōna mata ua pei o lamepa mumū ia, o Ōna lima fo'i ma Ōna vae ua pei o 'apa memea ua fa'apupulaina, o le si'ufofoga o Lana fetalaiga ua pei o le ta'alili o le vao tagata e to'atele" (Tanielu 10:2-6).

O lenei fa'amatalaga e tai tutusa ma lea sa tu'uina mai e Ioane ina ua fa'aalia Keriso iā te ia i le motu o Patamo. E lē o se isi lava a e o le Ālo o le Atua na fa'aalitino iā Tanielu. O lo tatou Ali'i na afio ifo ma se tasi 'avefe'au fa'alelagi e a'oa'o Tanielu e fa'atatau i le mea o le a tupu i aso o le i'uga.

(6) O LE Ā LE MEA E FAIA PEA E I LATOU O LO'O SA'ILI MA LE FA'AMAONI MO LE FA'APA'IĀGA?

E sa'ili mai outou iā te A'u, tou te maua fo'i, pe a outou sa'ili mai iā te A'u ma outou loto atoa.

Jeremia 29:13

O 'upu moni tāua o lo'o fa'aalia mai e le Fa'aola o le lalolagi e mo i tatou o ē sa'ili mo le 'upu moni e pei o 'olua ua nātia. Ua tausagā ma ua matua Tanielu. Sa i ai ia i lona olaga atoa i le maota fa'apaupau i totonugalemū o mea fa'afiafia ma va'aiga fa'atosina, o lona mafaufau sa mamafa ma fa'atumulia i matā'upu o le malō tele. Peita'i sa liliu'ese pea ia mai nei mea uma ina ia tū fa'amaulalo i luma o le Atua, ma sa'ili ia malamalama i fuafuāga a le Silisili "ese. Ina ua tali āna talosaga, na fa'afeso'ota'i mai i le malamalama mai maota o le lagi, mo i latou o le a ola i aso o le i'uga. E tatau ea ona tatou fa'amaoni e sa'ili le Atua ina ia tatou iloa ai ma malamalama i 'upu moni o lo'o aumai iā i tatou mai le lagi? "E tatau i lē alu atu i le Atua ona talitonu o lo'o soifua o Ia, o Ia fo'i na te tauia mai o ē matuā sa'ili iā te Ia" (Eperu 11:6).

(7) O LE Ā LE A'AFIA O TANIELU INA UA FA'ATASI AI SE TASI E PA'IA?

Ua tu'ua to'atasi lava na o a'u, ona a'u iloa lea o lenā mea tele na fa'aalia mai, ona leai lea o se toe malosi iā te a'u; ua mavae lo'u matagofie, ua 'ou pulavale, ua leai lava se malosi ua toe iā te a'u.

Tanielu 10:8

O i latou uma o ē ua fa'apa'iaina moni o le a lagona fa'apitoa fa'apea. O le a latou va'aia lo latou tulaga vaivai ma le lē ato'atoa ona ua manino i a i latou le maoa'e, le mamalu, ma le ato'atoa o Keriso. O le a leai so latou malosi e mafai ai ona fa'aailoa mai o latou e leai se uiga agasala; o le mea e foliga mai e tonu ma lelei e na ona fa'aailoa mai e lē aogā ma e palagofie pe a fa'atusatusa atu i le tulaga mamā ma le mamalu o Keriso. O le taimi pe a vavae 'ese le tagata mai le Atua, pe a ua matuā lē manino ana va'aiga o Keriso, ona latou fa'apea ai lea, "O a'u e lē agasala; o a'u ua fa'apa'iaina."

(8) NA FA'APEFEA ONA TALIINA LE TATALO FA'ATAUĀNAU A TANIELU?

Ona ia fa'apea mai lea iā te a'u, Tanielu e, o le tagata ua alofateleina, ia e mafaufau i 'upu 'ou te fai atu ai iā te 'oe, ma ia e tū i luga; auā ua 'auina mai nei a'u ia te oe. Ua uma ona fetalai mai ia te a'u o nei 'upu, ona 'ou tū ai lea, ua 'ou gatete....O lenei, ua a'u sau e fa'aailoa atu iā te 'oe mea e tutupu i lou nu'u i ona pō amulī; auā e tuai ona pō o le fa'aaliga.

Tanielu 10:11, 14

Oi se fa'aaloaloga e matuā maoa'e na fa'aalia iā Tanielu e le Mamalu silisili'ese o le lagi! Na Ia fa'amafanafana Lana 'au'auna ma ta'utino iā te ia ua fa'alogoina lana tatalo i le lagi. Ina ua taliina lea tatalo fa'atauānau, sa 'auina ifo le agelu o Kaperielu ia sui afāina ai le loto o le tupu Peresia. Na tete'e le tupu i osofa'iga a le Agaga o le Atua a o anapogi ma tatalo Tanielu mo vaiaso e tolu, peita'i sa 'auina mai le Ali'i o le lagi, o Mikaele le Agelu silisili, e suia le loto ma'a'a o le tupu ina ia fa'agaoioi e tali le tatalo a Tanielu.

(9) SA FA'APEFEA LE MAFAI E TANIELU ONA LAGONA LE FE'AU NA 'AUINA MAI E LE ATUA?

Ona toe pa'i mai lea iā te a'u o le tasi ua tino mai pei se tagata, ua Ia fa'amalosi mai iā te a'u. Ua fa'apea mai o ia, O 'oe o le tagata ua alofateleina, 'aua e te fefe, ia e manuia, ia e fa'amalosi, ia e fa'amalosi lava. Ua mavae mai lana fetalai iā te a'u, ona 'ou malosi ai lea, ma a'u fa'apea atu, Inā fetalai mai ia lo'u ali'i; auā ua e fa'amalosi mai iā te a'u.

Tanielu 10:18, 19

E ala i lona mana fa'a-Atua sa ia fa'amalosi i lenei tagata uiga lelei ma le fa'atuatua ina ia lagona le fe'au ua 'auina mai e le Atua iā te ia.

O Tanielu o se 'au'auna fa'amaoni a Lē Silisili 'Ese. O lona olaga atoa sa fa'atumulia i galuega lelei mo lona Matai. O lona uiga mamā ma le fa'amaoni sa mautū ma e tulaga tutusa lava i lona loto fa'amaulalo ma le salamō i luma o le Atua. E toe fa'aapea atu, o le olaga o Tanielu o se ata manino lea o le fa'apa'iāga moni.

Le Ali'i e, 'ou te tatalo mo le loto maulalo ma le usiusita'i ina ia 'ou tuputupu a'e ai i le uiga e fa'amamaluina. Fa'amolemole fesoasoani mai ia 'ou iloa pea o le meaalofa lea mai iā te 'Oe ma e lē 'ausia lea mai a'u lava taumafaiga.

Li'o le Tali: **Ioe** **Lē Mautonu**

Le Ali'i e, 'ou te tatalo ma lo'u fa'anaunau ia e tu'u i lo'u loto le alofa ma le fa'apalepale e pei ona fa'aalia e Tanielu i lana o'lega fa'atauānau mo le lelei o ōna uso ā tagata.

Li'o le Tali: **Ioe** **Lē Mautonu**

Manatu o Su'esu'ega

Tatalo Mana'omia

Tali o Tatalo

This image shows a single sheet of white paper with horizontal blue or grey ruling lines. The lines are evenly spaced and run across the width of the page. There are approximately 20 lines visible. The paper has a slight shadow on its right side, suggesting it's resting on a surface.

O le Amio a Ioane

Lesona 7

(1) O AI NA TU'U I AI E IESU LE TAUSIGA O LONA TINĀ PE A MAVAE LONA MALIU?

Ua silasila atu Iesu i Lona tinā, ma le so'o ua alofaina e Ia, ua tutū mai, ona fetalai atu lea o Ia i Lona tinā, Sena e, fa'auta, o Lau tama. Ua fa'aapea atu fo'i i lea so'o, Fa'auta, o lou tinā. Talu fo'i lea itu aso ua 'ave o ia e lea so'o i lona aiga.

Ioane 19:26, 27

O le aposetolo o Ioane sa iloga 'ese lava ia e sili a'e i isi o ōna uso na ta'ua o le "so'o na alofaina e Iesu." E ui e lē i ai se uiga fefe, vaivai, po o le femoumoua'i i lana amio, na iā te ia le uiga e agalelei ma le loto alofa. E foliga na iā te ia le fiafia i se uiga maoa'e, o le uiga o se uō mafanafana a Keriso, ma sa ia maua le tele o fa'aailoga o le talitonuina ma le alofa o le Fa'aola. O ia o se tasi o le to'atolu na fa'atagaina e molimauina le mamalu o Keriso i le mauga o le liliuina, ina ua fa'aalia Lona mamalu ma Lona puapuagā i Ketesemane, ma Lona fa'atuatuāga i le tu'uina iā Ioane o le tausiga o Lona tinā i itūlā mulimuli a o mafatia o Ia i luga o le satauro.

O le alofa o le Fa'aola mo le so'o ua peleina na toe fo'i mai ma le malosi ato'atoa o le alofa e matuā fa'amaoni lava. Na pipi'imaui Ioane iā Keriso e pei o le vine ona pipi'i atu i le la'au e sosolo ai. Mo lona Matai na ia loto tele ai lava i taimi o faigatā i le maota o fa'amasinoga ma na tū fa'atalitali e latalata ane i le satauro. Ma ina ua o'o mai tala fiafia ua toe tū a'e Keriso, na ia fa'avave atu i le tu'ugamau, ma i lona oli'oli tele sa momo'e fa'avave atu ai ma sa muamua taunu'u i lo o Peteru i le tu'ugamau.

(2) O LE Ā LE AUALA AOGĀ NA FA'AILOA ,AI E IOANE E FA'ATINO AI LO TATOU ALOFA?

Le 'au pele e, afai ua fa'aapea ona alofa mai o le Atua ia te i tatou, e tataui ai ona tatou fa'alofani.

I Ioane 4:11

O le alofa o Ioane mo lona Matai e lē na o se alofa o masaniga fa'aletagata, peita'i o le alofa o le tagata agasala ua salamō, ua lagona ua togiolaina ia e le toto tāua o Keriso. Na ia fa'atāuaina i le fa'aaloalo e aupito maua luga le galue am le onosa'i i le galuega a lona Ali'i. O lona alofa mo Iesu na ta'ita'iina ai o ia ia alofa iā i latou uma na maliu ai Keriso. O lana tapuā'iga o le alofa e fa'atinoina. Sa ia manatu o le alofa i le Atua e fa'aailoa i le alofa i Lana fanau.... "Pe afai e fa'aapea mai se tasi, 'Ou te alofa i le Atua, a e ita i lona uso, o le pepelo lava ia; auā o lē lē alofa i lona uso ua ia va'ai atu i ai, pe mafai fa'apefea ona alofa o ia i le Atua ua ia lē va'ai atu i ai" (I Ioane 4:19, 20). O le olaga o le aposetolo na ō gatasi ma āna a'oa'oga. o le alofa na mumū mai lona loto mo Keriso, na ta'ita'iina ai o ia ina ia tu'uina atu le mea sili, e galue ai ma le lē fa'avaivai mo ona uso ā tagata, a e maise ōna uso Kerisiano. O ia o se failauga malosi, e naunauta'i, ma e matuā fa'amaoni, ma o ana 'upu e tāua ma e tu'u atu ai le fe'au e liua ai le loto.

(3) O AI LE IGOA NA FA'APOOPO IĀ IOANE MA LONA USO NA FA'AMATALAINA AI LA AMIO MASANI A O LE'I FA'ATASI MA KERISO?

O Iakopo le atali'i o Sepetaio, ma Ioane le uso o Iakopo; ua Ia fa'aigoa fo'i iā te i la'ua o Poaneki, o lona uiga, O tagata faititili.

Mareko 3:17

O le alofa fa'amoemoeina ma le agaga e lē alofa fa'apito na fa'aailoa i le olaga ma le amio a Ioane e aumai ai a'oa'oga elē mafai ona fa'amatalaina i le tāua mo le ekalesia Kerisiano. E i ai nisi e fa'aapea o lo'o iā i latou

lenei alofa e aunoa ma le alofa tunoa fa'ale-Atua; peita'i o Ioane, o lona ia lava uiga moni, sa i ai uiga sa matuā ponā ai lana amio; sa mitamitavale ma fiasili, sa vave ona ita ma mana'o e tau'i ma sui.

(4) O LE Ā LE FOLAFOLAGA O LE A FA'ATAUNU'UINA IĀ I TATOU PE AFAI TATOU TE FA'ATAGAINA LE MANA O LE ALOFA O KERISO I O TATOU LOTO MA SUIA AI TATOU?

Ieova e, ua e fa'afogaina le mana'o o ē ua puapuagātia; e fa'amauiina e 'oe o latou loto, ua liliu mai i ai Ōu fofoga.

Salamo 10:17

O le loloto ma le lagona o le alofa tele o Ioane mo lona Matai e lē o le mafuaga lenā o ke alofa o Keriso mo ia; a e o le uiga o lona alofa ona ua fa'anaunau Ioane ina ia 'avea o ia ia pei o Iesu, ma e i lalo ifo o le gaoioiga e suia ai ona o le alofa o Keriso, ma na 'avea ai o ia o sē e agamalū ma loto maulalo. Sa nātia ia lava iā Iesu. Na feso'ota'i vavālalata ma le Vine Ola, ma na 'avea ai o sē tasi ua 'au ai i le uiga moni fa'ale-Atua. O le i'uga lenā o le mafutaga ma Keriso. O le fa'apa'iaina moni lenā.

(5) O LE Ā LE MEA TATOU TE O'O I AI E ALA I LE MANA E SUIA AI O KERISO?

O lenei, afai o iā Keriso se tasi, o le tagata fou ia; ua mavae mea tuai, fa'auta, ua fa'afouina mea uma.

II Korinito 5:17

Atonu e tele fa'ailoga o pona i le amio a se tasi, peita'i e o'o ina 'avea ma so'o moni o Iesu, o le mana o le alofa tunoa o le Atua e 'avea ai o ia o se tagata fou. O le alofa o Keriso e suia ma fa'apa'iaina ai o ia. Peita'i afai e na ona fa'apea tagata o latou o Kerisiano, ma o a latou tapuā'iga e lē 'avea ai i latou o ali'i ma tama'ta'i e sili atu i tauālumaga uma o le olaga, - e ola o sui o Keriso i masaniga a amio - e lē ō Keriso i latou.

(6) O LE Ā LE VAEGA TĀUA O LE FA'APA'IAINA MONI NA A'OA'O MAI E KERISO?

Ua nofo Ia i lalo, ona vala'au atu lea i le to'atinoagafulu ma le to'alua, ua fetalai atu iā te i latou, Afai e fia muamua se tasi, e 'avea o ia ma mulimuli i tagata uma, ma 'au'auna a tagata uma.

Mareko 9:35

O se taimi na aofia ai Ioane i se finauga ma nisi o ōna uso po o ai o i latou e ta'ua e sili. Latou te le'i manatu o ā latou 'upu o le a lē lagona e le Matai; peita'i na faitauina e Iesu o latou loto ma maua ai le avanoa e tu'u atu ai i Ōna so'o le lesonea o le loto maulalo. E lē na o le vaega to'aitiiti lenei na fa'alogologo i Āna 'upu, a e ua tusia mo le manuia o i latou uma o ē mulimuli iā te Ia i le taimi o le i'uga.

(7) O LE Ā LE FA'ANAUNGA FA'ALE-ATUA O I LATOU UMA O LO'O I AI LE FA'APA'IAINA MONI?

'Aua ne'i faia se mea e tasi ma le finau vale, ma le mitamita fua; a ia ta'itasi outou ma manatu ma le loto maulalo, ua sili nisi uma iā te ia.

Filipi 2:3

O i latou e i ai le agaga o Keriso o le a leai se agaga fiasili ina ia maua se tulaga e maua'uga a'e i o latou uso. O i latou ia o ē fa'atauva'a le va'ai iā i latou lava, o i latou ia o le a ta'ua e sili i le silafaga a le Atua. "Ona tago lea o ia i le tama itiiti, ua fa'atū iā te ia i o latou luma; ua na si'itia o ia i Ōna lima, ona fetalai atu lea ia te i latou, 'Ai sē talia se tama itiiti fa'apenei i Lo'u nei igoa, ua talia e ia o A'u; ai se talia A'u, e lē o A'u ua ia talia, a o Ia na 'auina mai A'u'" (Mareko 9:36, 37).

O se a'oa'oga tāua tele mo i latou uma o ē mulimuli iā Keriso! O i latou o ē va'ai māmā i tiute o le olaga o lo'o ta'atia mai tonu i o latou auala, o ē fa'atalalē i le alofa, agalelei, ma le fa'aaloalo, e o'o lava ise tamaitiiti, ua latou lē amana'ia Keriso. Na lagona e Ioane le tāua o lenei a'oa'oga ma na fa'amanuiaina ai o ia.

(8) E TO'AFIA NI MATAI E MAFAI ONA TATOU MULIMULI I AI?

E leai sē na te mafaia ona 'au'auna i ali'i e to'alua; auā e 'ino'ino o ia i le tasi, a e alofa atu i le tasi; a lē o lea, e fa'apipi'i atu ia i le tasi, a e fa'aleaogā i le tasi. Tou te lē mafaia ona 'au'auna i le Atua atoa ma mamone.

Mataio 6:24

O se tasi aso na va'aia ai e ia ma lona uso o Iakopo se tagata o lo'o tutuli temoni i le suafa o Iesu, ma e talia i e le'i feso'ota'i o ia ma la latou fa'apotopotoga, sa latou filifili ai e lē o iā te ia le aiā e fai ai lenei galuega, ma sa fa'asāina ai o ia. I lona loto fa'amaoni ua ta'u atu e Ioane lenei mea na tupu i lona Matai. Na fetalai atu Iesu, "'Aua le vaoia o ia; auā e leai se tagata na te faia se vavega i Lo'u nei igoa, na te mafaia ona vave tautala i se 'upu leaga iā te A'u. Auā fo'i o lē lē 'au 'ese iā te i latou, e 'au fa'atasi lea ma i tatou" (Mareko 9:39, 40).

(9) O LE Ā LE TALOSAGA E MANATU FA'APITO NA TU'UINA ATU IĀ IESU E IAKOPO MA IOANE?

Ona la fai mai lea iā te Ia, Ia e tu'u mai iā te i ma'ua, ma te nonofo o le tasi i Lou itū taumatau, ma le tasi i Lou itū tauagavale i Lou mamalu.

Mareko 10:37

E fa'apea fo'i ina ua tu'uina atu Iakopo ma Ioane i se olega a lo la'ua tinā, na ta;osagaina ai ina ia mafai ona fa'atagina mo i la'ua tulaga e aupito maualuluga ma fa'aalologia i le malō o Keriso. E to'aititi i tatou e malamalama i le tāua moni o a tatou tatalo! Na silafia e Iesu le tulaga e lē mafai ona fa'atusatusa i ai le mamalu e ao ina fa'atauina mai ai, "O Lē na onosa'i i le satauro, na fa'atauva'a iā te Ia le mā, ona o le 'oli'oli sa tu'u i Ōna luma" *Eperu 12:2). O le 'oli'oli lenā na lagona ina ua va'aia agaga sa fa'asaoina i Lona fa'amaulaloina, Lona puapuagā, ma le fa'amaligiina o Lona toto.

O le mamalu lenā sa tatau ona maua e Keriso, ma o lea na talosagaina e nei so'o e to'alua, atonu o le a mafai ona fa'atagina i la'ua e tofusua i ai..

(10) O LE Ā LE TALI A IESU I LA LA'UA TALOSAGA E LĒ TALAFEAGAI?

A ua fetalai atu Iesu iā te i la'ua, Lua te lē iloa le mea lua te ole mai ai na. E mafai 'ea e oulua ona inu i le ipu 'Ou te inu ai; ma ia papatisoina i le papatisoga e papatisoina ai A'u?

Mareko 10:38

Na itiiti lava so la'ua malamalama i le uiga moni o le papatisoga! "Ona fetalai atu lea o Iesu iā te i la'ua, Lua te inu lava i le ipu 'Ou te inu ai; atoa ma le papatisoga e papatisoina ai A'u, e papatisoina ai oulua; a o le nofo i Lo'u itu taumatau ma Lo'u itu tauāgavale, e lē o iā te A'u lea ona avatu, a e tau lava o ē ua saunia mo i latou lea mea" (Mareko 10:39, 40).

(11) O LE Ā LE TULAGA E AUPITO TĀUA E MAFAI ONA UMIA E SE TASI E MULIMULI IĀ KERISO E MATUĀ TĀUA LAVA I LE AGA'I I LUMA I LE GALUEGA O LE FA'APA'IĀGA?

O se fia sili iā te outou, ia fai o ia ma a outou 'au'auna; o sē fia muamua fo'i iā te outou, ia fai o ia ma tautua a outou uma.

Mareko 10:43, 44

Na silafia e Iesu mafuaaga na faia ai lea talosaga, ma sa a'oa'ia le mitamitavale ma le fiasili o ia so'o e to'alua: "Ua outou iloa o ali'i o nu'u 'ese ua ali'itai i latou; o ē ua sili fo'i o i latou, ua pule ia te i latou.... Auā fo'i o le Atali'i o le tagata na lē sau o Ia ina ia 'au'auna tagata iā te Ia, a e peita'i ia 'au'auna o Ia, ma foa'iina atu Lona ola o le togiola e sui a'i tagata e to'atele" (Mareko 10:42, 45).

(12) E UI I LE LAUILOA O IESU ONA O LONA AGALELEI, NA FA'APEFEA ONA TALIA O IA E TAGATA SAMARIA?

A ua lē talia o Ia e i latou, auā ua fa'asaga atu Lana malaga i Ierusalema.

Luka 9:53

I se tasi o taimi na auina atu ai e Keriso o ;avefe'au e muamua atu iā te Ia i le tasi 'a'ai o Samaria, ma talosagaina tagata mo se tausiga fa'aletino mo Ia ma Ōna so'o. Peita'i ina ua tau lata atu le Fa'aola i le 'a'ai, a e ua foliga mai o lo'o malaga sa'o loa aga'i i Ierusalema. O lenei mea ua fa'aoso a'e ai le to'atama'i o Samaria, ma sa latou lē auina atu 'avefe'au e vala'aulia mo se malōlōga ma i latou. Sa lē fa'aalia le fa'aaloaloga e masani ona latou avatu i tagata faimalaga o aso faiso'o.

(13) INA IA MAUA LE FA'AMANUIĀGA O LE FA'ATASI AI O KERISO E TA'ITA'IINA ATU AI I LE FA'APA'IAINA, E TATAU ONA FA'APEFEA LA TATOU TALI ATU?

Fa'auta, 'Ou te tū atu i le puipui ma tu'itu'i atu; ai se tasi e fa'alogi mai i Lo'u leo, ma tatala mai le puipui, 'Ou te ulufale atu iā te ia, ma te tali sua fo'i ma ia, o ia fo'i ma A'u.

Fa'aaliga 3:20

E lē 'u'una'i fa'amalosi e Iesu Lona fa'atasi ai i so'o se tasi, ma na lē maua e Samaria le fa'amanuiāga se manū latou te maua pe ana vala'aulia o Ia e fai ma a latou malō.

Atonu tatou te ofo i lenei faiga lē fa'aaloalo i le Tupu o le lag, peita'i mata e fa'afia iā i tatou o ē fa'apea o tatou e mulimuli iā Keriso ona tatou nofo sala fo'i i le fa'atamala fo'i fa'apea? Tatou te fa'atauānau ea Iesu ia fai o tatou loto ma nofoāga e afio ai fa'apea fo'i i o tatou aiga? E tumu Ia i le alofa, le alofa tunoa, o fa'amanuiāga, ma o lo'o Ia saunia e foa'i mai nei meaalofo iā i tatou; peita'i e pei o tagata Samaria, tatou te ola fiafia pea a e leai ia mea.

(14) O LE Ā LE FA'AMATALAGA NA FA'AILOA AI LE LĒ FIAFIA O IAKOPO MA IOANE AGA'I I TAGATA SAMARIA MA LO LATOU LĒ TALIMALŌ?

Ua iloa e Ōna so'o o Iakopo ma Ioane, ona la fai mai lea, Le Ali'i e, pe e te finagalo, ma te fai atu ia alu ifo le afi mai le lagi, ia fano ai i latou, pei ona faia e Elia?

Luka 9:54

O le 'au so'o na latou iloa le finagalo o Keriso ia fa'amanuia tagata Samaria i Lona fa'atasi ai; ma ina ua latou vaa'aia le lē fiafia, le matau'a, ma le lē āva ua fa'aalia i lo latou Ali'i, na fa'atumulia ai i latou i le ōfo ma le ita tele. O Iakopo ma Ioane sa osofia i le matuā lē fiafia lava. O Ia lea o Lē e aupito maua'uga ona latou fa'aaloalo i ai a e ua faia fa'apea, ua foliga iā i latou o se agasala e natuā maoa'e e lē mafai ona fa'ate'a lemū ae aunoa ma se fa'asalaga i lea lava taimi.

(15) O Ā 'UPU A'OA'I NA FETALAI ATU AI KERISO?

A ua fāliu o Ia, ma a'oa'i iā te i la'ua, ua fa'apea atu, E lē iloa e oulua le uiga o oulua loto; auā e le'i sau le Atali'i o le tagata e fa'aumatia le ola o tagata, a ia fa'aolaina. Ona latou ō atu lea i le tasi 'a'ai.

Luka 9:55, 56

O Ioane ma ōna uso 'au so'o e i le a'oga e a'oa'o ai Keriso. O i latou ua sauni e iloa o katou lava sesē, ma ua naunau ia fa'aleleia a latou amio ma sa tele le avanoa. Sa fa'atāua e Ioane a'oa'oga uma ma na sa'ilī'ili i taimi uma ia aumaia lona olaga ia ō gatasi ma le Fa'aa'oa'o Sili. O a'oa'oga a Iesu sa tu'uina mai ai le agamalū, loto maulalo, ma le alofa, o uiga ia e mana'omia i le tuputupu a'e i le alofa tunoa, ma fetai fo'i i lana galuega, o mea ia na aupito tāua iā Ioane. O nei a'oa'oga na tu'uina mai fo'i mo i tatou ta'ito'atasi ma o na o tatou o uso i le ekalesia, a e fa'apea fo'i mo ulua'i so'o o Keriso.

(16) E FA'APEFEA ONA FA'AILOA UIGA O LE AMIO O LE FA'APA'IAINA MONI?

O le tagata lilo o le loto, ia teua lea i le mea e lē pala, o le loto agamalū ma le filemū, o le mea tau tele lava lea i luma o le Atua.

I Peteru 3:4

O se a'oa'oga e fa'amalamalamaina e mafai ona maua mai i le 'ese'esega mamao lava i le amio a Ioane ma le amio a Iuta. O Ioane o se fa'ata'ita'iga ola o le fa'apa'iaina. I le isi itū, o Iuta sa iā te ia le uiga e foliga mai e fa'afiaamioatua, a e matele i le amio fa'asatani. Sa ia fa'apea o ia o se tasi o le 'au so'o o Keriso, a e o ana 'upu ma ana galuega sa ia fa'afitia o Ia.

Na maua lelei e Iuta avanoa tāua e pei ona maua e Ioane e a'oa'o ai ma fa'ata'ita'i i le Fa'aa'oa'o Sili. Na ia fa'alogologo i a'oa'oga a Keriso, ma o lana amio atonu sa mafai ona suia e ala i le alofa tunoa o le Atua. Peita'i a o tauivi ma le naunauta'i Ioane e fa'asagatau i ona lava vaivaiga ma sa'ili ia 'avea e pei o Keriso, o Iuta na ia solia lona lava loto fuatiaifo, gaua'i i fa'aosoosoga, ma fa'amautū iā te ia masaniga o le lē fa'amaoni lea na i'u ina liua ai o ia i le fa'atusa o Satani.

O nei so'o e to'alua e fai ma sui o le lalolagi Kerisiano. O tagata uma e ta'utino o latou e mulimuli iā Keriso, peita'i a o savavali le tasi vaega i le loto maulalo ma le agamalū, ma a'oa'oina iā Iesu, o le isi vaega o lo'o fa'aילוa o i latou e lē 'ana'ana i le 'upu a e na o le fa'alogologo. O le tasi e fa'apa'iaina e ala i le 'upu moni; a o le tasi e lē iloia le mana o le alofa tunoa e fa'apa'iaina ai. O le isi vaega e oti iā te ia lava i aso faiso'o, ma manumalō ai i le agasala. A o le tasi vaega e fa'amalieina pea o latou lava tu'inaanu, ma avea ai o 'au'auna a Satani.

O lo'u fa'anaunauga ia mulimuli i fa'ata'ita'iga a Ioane ma fa'ataga le suiga e ala i le alofa o Keriso e fesoasoani iā te a'u ia agamalū ma loto maulalo.

Li'o le Tali:

Ioe

Lē Mautonu

'Ou te tatalo mo le poto ia fa'alogo ai pea i le tu'itu'i a Keriso i le faitoto'a o lo'u loto ma fa'ataga o Ia e ulufale e aumaia le fa'apa'iaina i lo'i olaga.

Li'o le Tali:

Ioe

Lē Mautonu

Manatu o Su'esu'ega

Tatalo Mana'omia

Tali o Tatalo

O le Soifuāga ma le Galuega a Ioane

Lesona 8

(1) NA O AI LE POGAI O LE POTO MONI E NA TE AVATUA LE A'OA'OGA E AUPITO MAUALUGA?

A e afai ua leai se poto i so outou, ina ole atu ia i le Atua, o lē foa'i tele mai i tagata uma ma le lē toe ta'uta'ua; ona foa'iina mai ai lea iā te ia.

Iakopo 1:5

O le aposetolo o Ioane na fa'aalu tausaga muamua o lona olaga i le vaega o tagata e le'i i ai se a'oa'oga fa'apitoa a e faifaiva o Kalilaia. E le'i fiafia i le a'oa'ogaina i a'oga; peita'i o lona mafuta fa'atasi ma Keriso, le A'oa'o Sili, na ia maua ai le a'oa'oga e aupito maua e tagata ola. Na ia naunau e inu i le vaipuna o le poto, ma ia sa'ili ai e ta'ita'i isi i le "vai'eli o le ola e puna a'e i le ola e fa'avavau" (Ioane 4:14). O le faigofie o ana 'upu, o le malosi o le matagofie ma le maua o 'upu mmoni na ia tautalagia, ma le malosi o 'upu fa'aleagagana fa'amatalaina ai ana a'oa'oga na avatu ai iā te ia le avanoa e feso'ota'i ai i vaega o tagata 'ese'ese. A e o'o lava i ē talitonu na latou lē malamalama ato'atoa i mea lilo pa'ia o le 'upu moni o lo'o fofola mai i ana a'oa'oga. Na foliga mai o ia na fa'atumulia i taimi uma e le Agaga Pa'ia. Na ia sa'ili'ili ia aumai i luga manatu o tagata ina ia latou malamalama i mea e lē o va'aia. O le poto na ia tautala ai na mafua ai ona pei ana 'upu o le pa'ū o le sau, e fa'amalūlūina ma fa'ato'afilemūina ai le agaga.

(2) O LE Ā LE MEA NA FAIA I LE A'OA'OGA A IOANE SA SAUNIA O IA MO LE LUMANA'I?

Auā o le 'au faigaluega i matou fa'atasi ma le Atua; o outou o le fa'ato'aga a le Atua, o outou o le fale o fai o le Atua.

I Korinito 3:9

Ina ua mavae le afio a'e o Keriso, na tula'i mai Ioane o se tagata fa'atuatua, o se tagata faigaluega malosi mo le Matai. Sa fa'atasi ai ma isi ma na 'oli'oli i le liligiina mai o le Agaga Pa'ia i le Aso Penetekoso, ma e fa'atasi ai ma le ma'elegā fou ma le mana, ma ia fa'aauau le tautala atu i tagata o 'upu o le ola. Na fa'amata'uina i le tu'uina i le falepuipui ma le oti fo'i, a e le'i fefe ai o ia.

(3) O LE Ā LE MEA NA FAIA E LE 'AU APOSETOLO INA UA FA'ATO'Ā UMA TAUMAFAGA A FAITAGALAGA IA TAOFA AI I LATOU MAI LE GALUEGA NA VALA'AUINA AI I LATOU E LE ATUA?

A ua tō mai puipui o le fale e le agelu a le Ali'i i le pō, ua na ta'ita'i iā te i latou i fafo, ma fa'aapea atu, Inā ō ia outou, ina tutū i le malumalu ma tautala atu i le nu'u i 'upu uma lava o lenei olataga. Ua fa'alogoa ai i latou, ona latou ulufale lea i le malumalu i le tafa o ata, ma a'oa'o ai. Ona sau lea o le faitaulaga sili ma i latou sa ia te ia, ua fa'apotopoto e i latou le fono, atoa ma le taupulega uma lava o le fanauga a Isara'elu, ona 'a'au atu lea nisi i le fale puipui e ta'ita'i mai iā te i latou.

Galuega 5:19-21

E to'atele le motu o tagata mai vaega 'ese'ese na ō mai e fa'alogologo i lauga a le 'au aposetolo, ma sa fa'amalōlōina mai o latou ma'i e ala i le suafa o Iesu, o le suafa lea na matuā itagia e Iutaia. O faitaulaga ma ta'ita'i sa matuā fa'aosofia le ita i lo latou tete'e atu a o latou va'aia ē mama'i ua fa'amalōlōina ma fa'aeaina ai Iesu, o Ia le Ali'i o le Ola. Na fefefe i latou ona ua tai lata i le taimi e talitonu ai le lalolagi atoa iā te IA, ona molia lea o i latou i le fasiotia o Lē Fa'amalōlō Sili. Peita'i o le tele o a latou taumafaga e taofi lenei fa'agae'etia o tagata, o le tele fo'i lea o ē ua talitonu iā te Ia ma liliu 'ese mai a'oa'oga a tusi'upu ma Faresaio. Sa fa'atumuina i latou i le ita, ma ina ua latou tagolima iā Peteru ma Ioane, sa latou lafo i la'ua i le falepuipui. A e o le agelu a le

Ali'i, i le pō, na tatalaina faitoto'a o le falepuipui ma aumai i la'ua i fafo, ma fa'apea atu lea, "Inā ō ia outou, inā tutū i le malumalu ma tautala atu i le nu'u i 'upu uma lava o lenei olataga" (Galuega 5:20).

(4) O LE Ā LE AUTŪ O LE FE'AU A LE APOSETOLO?

O le mea lava lenei ua fa'aalia mai ai le alofa o le Atua iā te i tatou, ina ua 'auina mai e le Atua Lona Ālo e to'atasi i le lalolagi, ina ia tatou ola iā te Ia.

I Ioane 4:9

I lona fa'amaoni ma le naunauta'i na tau'ave pea e Ioane le molimau mo lona Ali'i i taimi uma e talafeagai ai. Na ia va'aia o lenei taimi ua fa'atumulia i fa'afitauli mo le ekalesia. O Satani ma ana tau'afasesē ua i so'o se mea. O mafau'au o tagata ua fesese'a'i i auala lē sa'osa'o o le masalosalo ma matā'upu tau'afasesē. O nisi sa fa'afoliga mai e fa'amaoni i le galuega a le Atua a e o latou o ē tau'afasesē. Ua latou fa'afitia Keriso ma Lana tala lelei, ma latou aumai talitonuga e tau'afasesēina ma ola ai i le soliga o le tulafono pa'ia.

O le matā'upu autū fa'apitoa a Ioane o le alofa e leai se mea e gata ai o Keriso. Na talitonu ia i le Atua e pei ona talitonu le tamaitiiti i se tamā e fa'apalepale ma agalelei iā te ia. Na ia malamalama i le uiga ma le galuega a Iesu; ma ina ua ia va'ai i ōna uso Iutaia o lo'o ō tautagotago i o latou lava ala e aunoa ma se 'ave mai le Lā o le Amiotonu e fa'amalamalamaina ai lo latou ala, na ia naunauta'i e tu'uina atu iā ta i latou Keriso, le Malamalama o le lalolagi.

(5) O AI NA FA'AAUAU PEA ONA FA'AILOA ATU E LE 'AU APOSETOLO E PAU LENĀ O LE AUALA I LE FA'AOLATAGA?

Ia iloa e outou uma, atoa ma le nu'u uma o Isara'elu, o le suafa o Iesu Keriso o le Nasareta, o Lē na fa'asatauroina e outou, o Lē ua toe fa'atūina e le Atua nai ē ua oti, o Ia lava ua tū mai ai lenei tagata ua malōlō i o outou luma.... E leai fo'i se tasi ua i ai le ola; e leai lava se isi igoa i lalo o le lagi ua fo'iina mai i tagata e mafaia ona fa'aolaina ai o i tatou.

Galuega 4:10, 12

O lenei aposetolo fa'amaoni na va'ai atu i lo latou tauaso, lo latou mitamitavale, talitonuga i 'uputu'u, o le fefe ona e leai se fa'amoemoe, ma le lē iloa o le Afioga a le Atua ua fa'amauiina ai o latou agaga i filifili e lē mafai ona motusia. O le fa'ailoga tagata ma le ino'ino tele iā Keriso ua latou taofimau i ai ma le fiafia, ua aumaia le fa'atafunaga i luga o lo latou malō ma fa'aumatia ai o latou fa'amoemoe mo le ola e fa'avavau. Peita'i na fa'aaau pea e Ioane ona fa'ailoa atu Keriso iā i latou, ona pau lea o le ala i le fa'aolataga. Na matuā manino lelei le fa'amaoniga o Iesu le Nasareta, o Ia le Mesia, lea na fa'ailoa atu e Ioane e leai se tagata e mana'omia ia savali i le pouliuli o mea sesē a o lo'o i ai le malamalama ua uma ona ōfoina mai iā te ia.

(6) O LE Ā LE A'OA'OGA SESĒ NA MATUĀ TETE'E I AI IOANE?

Auā e to'atele o ē fa'asesē ua ō atu i le lalolagi, o ē lē ta'u tino ua maliu mai Iesu Keriso i le tino; o le fa'asesē lava lea ma le anetikeriso.

II Ioane 7

A o ola Ioane na ia va'aia le laugaina o le tala lelei i nu'u lata mai ma nu'u e mamao, ma e afe ma afe i latou ua talia ma le fiafia ana a'oa'oga. A e peita'i sa fa'atumulia pea o ia i le fa'anoanoa a o ia matauina le sosolo mai o a'oa'oga sesē i totonu o le ekalesia. O nisi na talia Keriso ua latou ta'utino o Lona alofa ua tu'usa'oloto ai latou mai le ususita'i i poloa'iga a le Atua. A e o le isi itū, e to'atele ua a'oa'o e tataua ona tasi mata'itusi o le tulafono, fa'apea fo'i ma sauniga ma tū masani fa'a-Iutaia uma, ma ua lava ia mea mo le fa'aolataga, e aunoa ma le toto o Keriso. Ua latou taofi o Keriso lava ia o se tagata lelei, e pei o le 'au aposetolo, a e latou te fa'afitia Lona itū Atua. Na va'aia e Ioane le mata'utia o le a aliali ma va'ai i ai le ekalesia, pe afai e latou te talia ia manatu, ma sa ia fa'afeiloa'i nei manatu ma filifiliga i lea lava taimi.

(7) PE A TATOU OLA MA GALULUE MO LE GALUEGA A KERISO O LE Ā LE MEA E MAFAI ONA TATOU FA'AMOEMOE I AI?

Auā ua fōa'ifuaina ia te outou ona o Keriso, e lē na ona ia fa'atuatua iā te Ia, a ia fa'atigāina fo'i outou ona o Ia.

Filipi 1:29

E le'i fa'aapea na fa'ataunu'uina lana galuega e aunoa ma ni mea e fa'alavelave mai. O Satani e lē o se paiē. Sa ia fa'aoso tagata amioleaga ina ia fa'apu'upu'uina le ola aogā o lenei tagata o le Atua, a o agelu pa'ia na puipui iā te ia mai a latou osofa'iga. E tatau ona tula'i pea Ioane, o se molimau fa'amaoni mo Keriso. O le ekalesia i ona taimi faigatā na mana'omia ai lana molimau.

(8) O LE Ā LE AUALA E AUPITO SILI E TETE'E AI I MANATU 'ESE'ESE E FETE'ENA'I MA LĒ TUTUSA E LAMATIA AI LE EKALESIA?

Inā mataāla ia outou, ia outou tumau i le fa'atuatua, ia outou fa'atamatane, ia fa'amalolosi outou. Ia faia uma a outou mea i le alofa.

I Korinito 16:13, 14

E ala i le taufa'asesē ma le fai mea e lē tonu, ua sa'ili sui o Satani e fa'atupu le itū e tete'e iā Ioane ma tete'e ai le talitonuga iā Keriso. O le i'uga na lamatia loa le ekalesia i fe'ese'esea'iga ma talitonuga 'ese ua o'o mai. Na fa'afeiloa'i e Ioane nei mea sesē e aunoa ma le fefe; na ia fa'afesaga'i ma fili o le 'upu moni. Na ia tusi ma fautua, ia lē tatau ona maua se fa'amalosi'aga mo i latou o lo'o ta'ita'i e taufa'asesē. O i ai i ōna pō nei le ti'apolo e pei o i latou ia na taufa'aleaga le manuia o le ulua'i ekalesia, ma o a'oa'oga a le aposetolo e fa'atatau fo'i lava i matā'upu ia e ao ona fa'autagia ma le fa'aeteete. "E ao ona iā te outou le alofa," o le alaga lea e tatau ona lagona i so'o se mea, a e maise mai iā i latou o ē ta'u mai ua fa'apa'iaina. Peita'i e mamā tele le alofa e lē mafai ona ufiufi ai se agasala e lē fa'aalia. O a'oa'oga a Ioane e matuā tāua mo i latou o lo'o ola i totonugalemū o faigatā o aso o le i'uga. O ia na mafuta vāvālalata ma Keriso, na ia fa'alologologo i Āna a'oa'oga ma sa molimauina Āna vavega ofoofogia e tele. Na ia tau'ave le molimau e talitonuina, lea na fa'alēaogāina ai mea sesē na taumafai e Ōna fili.

(9) O LE Ā LE IGOA E TA'U AI SE TASI E FA'APEA MAI NA TE ILOA LE ATUA A E LĒ USIUSITA'I I ĀNA TULAFONO?

O sē fa'aapea, Ua 'ou iloa o Ia, a e lē tausi e ia i Āna poloa'iga, o le pepelo lava lea, e lē o i totonu iā te ia le 'upu moni.

I Ioane 2:4

Na oli'oli Ioane i le fa'amanuiāga o le fa'apa'iaina moni. Peita'i e lē o fa'aapea mai le aposetolo o ia e leai sana agasala; na ia sa'ilia pea le ato'atoa i le savali i le malamalama o le fa'atasi ai o le Atua. E molimau ia o le tagata e fa'aapea mai e iloa le Atua a e soli Lana tulafono pa'ia, ua ia pepelo i le mea na ta'utino ai. Peita'i ua a'oa'o e le aposetolo a o tatau ona tatou fa'aalia le āva fa'a-Kerisiano, e iā i tatou le aiā e ta'u ai le agasala ma tagata agasala i o latou igoa sa'o - e ō gatasi lea ma le alofa moni. E moni e ao ina tatou alofa i agaga na maliu ai Keriso, ma galulue mo lo latou fa'aolataga, a e lē tatau ona tatou faia se fetu'utu'una'iga ma le agasala. E lē tatau ona tatou 'au'aumea fa'atasi ma ē fouvale, ma ta'u lea mea o le alofa. E mana'omia e le Atua Ōna tagata i lenei augātupulaga o le lalolagi ia tula'i mai, e pei ona faia e Ioane i lona taimi, na le'i 'alo mai le mea sa'o, i le tete'e atu i mea sesē e fa'aumatia ai le agaga.

(10) E MAFAI FA'APEFEA ONA FA'AILOA LO TATOU ALOFA MA LE FA'AMAONI I LE ATUA?

Afai tou te alofa mai iā te A'u, ia outou tausi mai i A'u poloa'iga.

Ioane 14:15

E to'atele isi na matou feiloa'i ua ta'u mai o latou e ola e aunoa ma le agasala. Peita'i ina ua tofotofo e fa'atatau i le Afioga a le Atua, o nei tagata o lo'o solia fa'aaliali Āna tulafono pa'ia. O le molimau e aupito manino o le tumau ma le malosī o le fusi o le tulafono e fā, e lē fafagu ai le loto fuatiaifo. E latou te lē mafai ona fa'afitia le finagalo o le Atua, peita'i e taumafai e fai se 'alofaga mo le lē tausia o le Sapati. Ua ta'u mai o latou ua fa'apa'iaina, ma o lo'o latou 'au'auna i le Atua i aso uma o le vaiaso. E latou te fai mai, e to'atele tagata lelei e le'i tauti Sapati. Pe afai o tagata ua fa'apa'iaina, o le a leai se fa'asalaga i o latou luga, ona o le Atua e tele Lona alofa tunoa o le a lē fa'asalaina ai i latou ona ua lē fa'amamaluina ma tausia le aso fitu. E faitauina lava latou e na o le to'atasi i le fa'apotopotoga pe afai e tauti le Sapati, ma o le a leai se 'a'afiāga i le lalolagi. Ma e tataua ona i ai i lalo ifo o le puleaga o lo'o i ai.

(11) O LE Ā LE UIGA O LE SOLIA O SE TULAFONO E TASI A LE ATUA?

Auā o sē tauti le tulafono uma, a e agasala i se mea e tasi, ua nofo sala ia i mea uma.

Iakopo 2:10

Na fa'avi'ivi'i e Eva ia lava ina ua fa'apea o le Atua e sili le agalelei o le a Ia lē fa'asalaina ai o ia i lona lē usiusita'i i Āna fa'atonuga sa tu'uina mai. O le manatu lava lea e tasi o lo'o 'u'una'ia e le afe ma afe o tagata e fai ma 'alofaga o lo latou lē usiusita'i i le poloa'iga e fā. O i latou e i ai le agaga o Keriso o le a latou tauti i tulafono uma a le Atua, e tusa pe o le ā le i'uga e o'o i ai. Ua fetalai mai le Tupu o le lagi, "Ua 'Ou tausia poloa'iga a Lo'u Tamā" (Ioane 15:10).

(12) O LE Ā LE AUALA E O'O MAI AI LE FA'APA'IAINA MONI?

Ia e fa'apa'iaina i latou i Lau 'upu moni; o Lau afioga o le 'upu moni lea.

Ioane 17:17

Na tofotofo Atamu ma Eva e soli fa'atonuga a le Ali'i, ma e mata'utia le i'uga o la la'ua agasala e ao ina fai ma lapata'iga iā i tatou ia 'aua tatou te mulimuli i ai i lea fa'ata'ita'iga o le lē usiusita'i. Na tatalo Keriso mo Ōna so'o i nei 'upu, "Ia e fa'apa'iaina i latou i Lau 'upu moni; o Lau afioga o le 'upu moni lea" (Ioane 17:17). E leai se fa'apa'iaina moni se'i vaganā le usiusita'i i le 'upu moni. O i latou e alolofa i le Atua ma o latou loto atoa o le a alofa fo'i i Āna poloa'iga uma lava. O le loto ua fa'apa'iaina e ō gatasi ma fa'atonuga o le tulafono a le Atua; auā e pa'ia, e tonu, ma e lelei.

(13) O LE Ā LE FA'AMATALAGA I LENEI FUAI'UPU UA ILOA AI LE TUMAU PEA O LE UIGA O LE ATUA?

Auā o A'u o Ieova, 'Ou te lē liliu; o le mea lea ua lē fa'aumatia ai outou le fanauga a Iakopo.

Malaki 3:6

E le'i suia lava le uiga o le Atua. O Ia lava lea o le Atua e fuā i le asō e pei lava o le taimi na Ia tu'u mai ai Lana tulafono i luga o Sinai, ma sa tusia ai e Lona lava 'a'ao i luga o le papa ma'a. O i latou e soli le tulafono pa'ia a le Atua atonu o le a fa'apea mai, "O a'u ua fa'apa'iaina;" a e o le fa'apa'iaina moni, ma le ta'u mai ua fa'apa'iaina, e 'ese'ese ia mea e lua.

E le'i suia le tulafono a le Atua i le Feagaiga Fou. O le pa'ia o le Sapati o le poloa'iga e fā o lo'o maualilē le fa'avae e pei o le nofoāli'i o le Atua. Ua tusi Ioane, "O i latou uma lava o ē fai le agasala, ua latou soli fo'i i tulafono; o le agasala o le solitulafono lava lea. Ua outou iloa fo'i na fa'aalia o Ia ina ia 'ave'eseina e Ia a tatou agasala; e lē o iā te Ia fo'i se agasala. E lē agasala se tasi o ē tumau iā te Ia; o sē agasala ua lē va'ai o ia iā te Ia, ua lē iloa fo'i o ia e Ia" (I Ioane 3:4-6). Ua mafai ona fa'aaofia i tatou i le tulaga e tasi na tu'u i ai e le so'o pele i latou o ē fa'apea ua mafuta iā Keriso, ia fa'apa'iaina, a e o lo'o ola pea i le soliga o le tulafono a le Atua. Na fetauti ia ma le vaega o tagata fa'apenā e pei fo'i o ē o le a tatou feiloa'i. Ua fa'apea mai ia, "Le fanau e, 'aua ne'i fa'asesē se tasi iā te outou; o lē fai le amiotonu, o le amiotonu lea, fa'apei ona amiotonu o Ia. O lē fai le agasala,

mai le ti'apolo lava ia; auā ua agasala le ti'apolo talu le amataga" (F. 7, 8). O iinei o lo'o tautala ai le aposetolo i 'upu e malamalama gofie, e pei ona ia manatu o le matāupu e mana'omia ona tautalagia.

(14) E FA'APEFEA ONA FESO'OTA'I LE MULIMULI I LE 'UPU MONI MA LE TUMAU I LE TULAGA FA'APA'IAINA?

Afa tatou te fai atu, ua tatou mafuta fa'atasi ma Ia, a e savavali i tatou i le pōuliuli, ua tatou pepelo ai, ua tatou lē faia fo'i le 'upu moni.

I Ioane 1:6

O lē fa'apea o lo'o tumau ia i totonu iā te Ia, e tataua ona savali o lenā tagata fa'apei ona savali o Ia.

I Ioane 2:6

O le agaga o le alofa e mānavaina mai e tusi a Ioane. Peita'i a ia feso'ota'i ma le vaega o ē soli le tulafono a le Atua a e fa'apea mai o lo'o latou ola e aunoa ma le agasala, e lē fa'atuai lava ia e lapata'i i latou i lo latou tulaga ua mata'utia le fa'asesēina. "Afa tatou te fai atu, ua tatou mafuta fa'atasi ma Ia, a e savavali i tatou i le pouliuli, ua tatou pepelo ai, ua tatou lē faia fo'i le 'upu moni. A e afai tatou te savavali i le malamalama, fa'apei ona i ai o Ia i le malamalama, ona tatou mafuta fa'atasi ai lea o le tasi ma le tasi, o le toto fo'i o Iesu Keriso Lona Alo e fa'amamāina ai i tatou i agasala uma lava. Afai tatou te fa'apea, E leai sa tatou agasala, ua sesē ai i tatou iā i tatou, e lē o i totonu iā te i tatou le 'upu moni; a e afai tatou te fa'aali a tatou agasala, e fa'amaoni o Ia, ma le amiotonu e fa'amagalo ai a tatou agasala, ma fa'amamā mai iā i tatou i amiolētonu uma lava. Pe afai tatou te fa'apea, Tatou te le'i agasala, ua tatou fai ai o Ia ma pepelo, e lē o i totonu iā te i tatou Lana afioga" (I Ioane 1:6-10).

'Ou te tatalo mo le poto ina ia sa'ili'ili ai i le a'oa'oga e aupito maua luga e na o le Atua ma le mana o le 'upu moni e maua mai ai.

Li'o le Tali: Ioe Lē Mautonu

O la'u tatalo ia tu'u mai e le Atua iā te a'u le filigā 'ou te ola ma ta'i atu le tala lelei atoa ma le talitonuga mausalī, tusa pe fesaga'i ma sauāga?

Li'o le Tali: Ioe L Mautonu

Ua 'ou iloa e alofa le Atua iā te a'u ma ua tu'uina mai tulafono e sefulu, o ta'iala mo lo'u fiafia.

Li'o le Tali: Ioe Lē Mautonu

'Ou te tatalo mo le ta'ita'iga a le Agaga Pa'ia ina ia faitau Lana afioga, mulimuli i le 'upu moni e fa'ailoa mai, ma fa'aali lo'u alofa iā te Ia i lo'u usiusita'i.

Li'o le Tali: Ioe Lē Mautonu

Manatu o Su'esu'ega

Tatalo Mana'omia

Tali o Tatalo

O Ioane ua Fa'a'aunu'ua

Lesona 9

O le manuia ofoofogia na aofia i le laugaina o le tala lelei e le 'au aposetolo ma ē na latou galulue fa'atasi sa fa'atuputeleina ai le ita o fili o Keriso. Na latou faia taumafaiga uma e fa'alavelave ai le aga'i i luma, ma i'u ai ina latou maua le lagolago malosi a le ta'ita'i o le malō o Roma e tete'e ai i Kerisiano. O se sauāga mata'utia na mulimuli ai ma na fasiotia ai le to'atele o ē na mulimuli iā Keriso. O le taimi lea ua matua lava le aposetolo o Ioane, peita'i o lona naunauta'i tele ma le manuia na maua, na ia fa'aauau pea le laugaina o le matā'upu a Keriso. Na iā te ia le molimau e malosi, sa lē mafai e i latou e tete'e mai ona fa'afinauina, ma fa'apea ona atili fa'amalosia ai ōna uso.

Pe afai ua tau maluelue le fa'atuatua o le 'au Kerisiano i lalo o le malosi o le tete'e mai ma sa fa'amalosia e latou te fesaga'i, na toe ta'u atu iā i latou e le aposetolo, ma le fa'aaloalo, malosi, ma le manino, "O le mea sa i ai talu le amataga, na matou fa'alogologo i ai, na matou va'ava'ai atu i ai o matou mata, na matou matamata ai, na tagotago fo'i o matou lima i a le Lokou o le ola;...ma ua matou ta'u atu ia te outou le ola e fa'avavau, o lenā sa i le Tamā, a ua fa'aalia mai iā te i matou; o le mea na matou va'ava'ai i ai ma fa'alogologo i ai, matou te ta'u atu ia iā te outou, ina ia outou mafuta fa'atasi ma i matou; o lo'o matou mafuta fa'atasi foi i le Tamā lea atoa ma Lona Alo o Iesu Keriso." (I Ioane 1:1-3).

(1) O AI E FAITAUINA E TAGATA AMIOLEAGA O O LATOU FILI?

Ua latou ita atu i lē ua a'oa'i i le faitoto'a; ma ua latou 'ino'ino i lē ua tautala fa'amaoni.

Amosa 5:10

O le ita e matuā tele lava ua tutu e fa'asaga iā Ioane ona o lona fa'amaoni e mautū i le matā'upu iā Keriso. O ia o le so'o mulimuli lea na totoo o le 'au so'o o ē na feso'ota'i vāvālalata tele ma Iesu, ma ua filifili ōna fili ia fa'amutaina lana molimau. Pe a mafai ona fa'ataunu'uina o lea mea, ua latou manatu o le a lē toe fa'asalalauina ai le talitonuga iā Keriso; ma afai e matuā fa'atigāina le faiga, atonu o le a mafai ona vave ona fa'aumatia mai le lalolagi. Na fa'apea loa ona fa'atonuina Ioane ia alu atu i Roma e su'esu'eina ai mo lona fa'atuatuāga. Sa fa'auigasesē lona talitonuga. Na molia e molimau pepelo ia o se tagata fouvale ma fa'atu'i'ese, e a'oa'o i nofoāga faitele matā'upu ina ia fa'ato'ilaloina ai le malō.

(2) O LE Ā LE TALI A TAGATA AMIOLEAGA, E LĒ GATA IĀ IOANE A O I LATOU UMA E LAGOLAGO LE 'UPU MONI?

Ua lamalama le tagata amio leaga i le tagata amiotonu, ua ia sa'ili'ili fo'i e fasioti iā te ia.

Salamo 37:32

Na ta'u atu e le aposetolo lona fa'atuatuāga i se auala manino ia talitonu ai tagata, o le faigofie ma le fa'amaoni o āna 'upu na 'i ai se 'a'afiāga malosi. O ē na fa'alogologo iā te ia ua maofa i lona poto ma ana 'upu onomea. Peita'i o le tele o le fa'atalitonuina i lana molimau, o le loloto fo'i lea o le ita o ē tete'e i le 'upu moni. Sa fa'atumuina le ta'ita'i o le malō Roma i le ita tele, ma ua faifai i le suafa o le Atua ma Keriso. Sa lē mafai e ia ona finau mafaufauga a le aposetolo pe fa'afetaui le malosi o lo'o avatu ma fa'amatala ai le 'upu moni. Sa ia manatu loa ma faia lana fa'ai'uga i se faiga ina ia 'aia ai ona toe lagona le leo o le fautua fa'amaoni.

(3) O Ā AUALA NA FA'AAOGĀINA E LE TA'ITA'I ROMA E FA'ASAGA IĀ IOANE INA IA 'AUA NE'I TOE LAGONA AI LANA MOLIMAU?

O a'u o Ioane, o lo outou uso ma lē ua fa'atasi ma outou i le puapuagā, ma le malō, atoa ma le onosa'i o Iesu Keriso, na a'u i le motu e igoa ia Patamo ona o le afioga a le Atua ma le mau iā Iesu Keriso.

Fa'aaliga 1:9

O i nei tatou te va'ai ai i le ma'a'a e o'o i ai le loto o le tagata pe a ia manatu e tete'e i le finagalo o le Atua. O fili o le ekalesia ua mautū o latou manatu ia fa'aaaua pea lo latou tulaga e mitamitavale ai ma le pule i luma o tagata. E ala i le poloa'iga a le ta'ita'i o le malō, na fa'aaunu'ua ai loa Ioane, a e o fili o Keriso sa matuā lē manumalō i la latou fuafuāga ia lē toe lagona le leo o Lana molimau fa'amaoni. Mai lona nofoāga na fa'aaunu'ua ai, ua sau ai le leo o le aposetolo, e o'o mai lava i le taimi o le i'uga o lo'o alagaina ai pea 'upu moni e aupito sili ona matagofie ua fa'alogi i ai tagata ola.

(4) O LE Ā LE FOLAFOLAGA O LO'O I LENEI FUAI'UPU E MAFAI E LE FANAU A LE ATUA ONA 'A'APA I AI I SO'O SE TAIMI?

Auā ua 'ou mautinoa, e lē mafaia e le oti, po o le ola, po o agelu, po o ali'i, po o ē malolosi, po o mea i nei ona pō, po o mea atalī, po o le maua'uga, po o le loloto, po o se tasi mea na faia, e lē mafaia e ia mea ona fa'ate'a'eseina mai i tatou i le alofa o le Atua, o lo'o iā Keriso Iesu lo tatou Ali'i.

Roma 8:38, 39

O Patamo o se motu gaoā ma lafulafuā i le Sami o Aegean, lea sa filifilia e le malō Roma e fai ma nofoāga e 'ave fa'aaunu'ua ai tagata solitulafono. A e mo le 'au'auna a le Atua o lenei nofoāga faigatā na pei o le faitoto'a o le lagi. Na 'ave'esea o ia mai va'aiga vevesi o le olaga ma gaoioiga o le galuega a le tagata tala'i, peita'i e le'i punitia ai o ia mai le silafaga a le Atua.

(5) O LE Ā LE MOLIMAU A LE MANA O LE ATUA E FA'AALIA E LE NATURA, O MEA UMA NA IA FAIA?

Se'i tetepa a'e i luga, ma outou va'ai, po o ai 'ea ua na faia nei mea? Na te ta'ita'iina mai a latou 'au ua faitauina; na te vala'au iā te i latou uma i o latou igoa; ona o le tele o Lona malosi ma Lona mana tele; e leai so latou e lē iloa.

Isaia 40:26

I lona aiga tu'ufua na ia mafai ona feso'ota'i ai ma le Tupu o tupu, ma su'esu'e vāvālalata ai le fa'aalitinoina o le malosi fa'alelagi i le tusi o uiga o mea na faia. Na fialia o ia e mafaufau loloto i le galuega tele o le foafoāga ma ia vi'ia ai le mana o le Matai foafoa Pa'ia. I tausaga ua mavae na fa'afeiloa'i ōna mata i le va'aiga o atu mauga e ufitia i la'au, o vanu lanu lau'ava, ma fuala'au aina i luga o fanua laugatasi; ma o nei mea uma na fialia ai o ia i le matagofie o mea e feso'ota'i ma le poto ma le silisili'ese o Lē na foafoaina. A o lea ua si'omia nei ia i le va'aiga e foliga i le tele o tagata e pogisā ma e leai se isi e fialia i ai. Peita'i e le'i fa'apenā le va'aiga a Ioane. Na mafai e ia ona faitauina lesone aogā ma le tāua o le mea tu'ufua, o papa alā, o mea lilo o i le sami loloto, ma le mamalu o le vānimonimo. I a Ioane, o nei mea uma ua fa'aalia ai le mana o le Atua ma Lona mamalu.

Na va'aia e le aposetolo i lona si'osi'omaga le molimau o le Lolo, lea sa ufitia ai le lalolagi atoa ona o ē na ainā le lalolagi, ina ua latou tofotofo e soli le tulafono a le Atua. O papa na ō a'e mai le loloto o le lalolagi ina ua tatala mai punāvai, na tu'u manino i lona mafaufau le mata'utia o le liligiina mai o le to'asā o le Atua.

Peita'i a o si'osi'omia ia i lalo nei i se tulaga e foliga mai e gaogao ma tu'ufua, o le lagi lanumoana i luga o le aposetolo i le motu tu'ufua o Patamo ua susula malamalama ma matagofie e pei o le vāteatea i luga o lona nu'u pele o Ierusalem. Ia fa'aavanoa e le tagata se taimi e tepa tasi a'e ai i le mamalu o le lagi i le pō ma mātau galuega na faia i le mana o le Atua, ma o le a a'oa'oina ai se lesone i le silisili'ese o Lē na faia mea uma pe afai e fa'atusatusa ma lona ia lava fa'atauva'a. Pe afai ua ia fa'apelepele le mitamitavale ma manatu e tāua ia lava ona o le tamā'o'aiga, taleni, po o lona ia lava uiga tosina, se'i alu ia i fafo i se pō manino ma va'ai a'e i le matagofie o fetū o le lagi, ma a'oa'oina ai ia fa'amaulalo lona loto mai le silafaga a Lē Silisili 'Ese.

(6) A O TUPUTUPU PEA LE FA'APA'IAINA I LE LOTO, O LE Ā LE MEA E TUPU I LE MOLIMAU A MEA NA IA FAIA?

Auā o le valea o le Atua e sili Lona poto i tagata; o le vaivai fo'i o le Atua e sili Lona malosi i tagata.

I Korinito 1:25

Mai le leo o vai e tele - vai loloto e pei o fetalai'i - na fa'alogoia ai e le peerofeta le si'ufofoga o Lē na foafoa mea uma. O le sami, ua lafoia ona o le malosi o le matagi, ua fa'ailoa mai iā te ia le to'asā o le Atua ua fa'atigā e le tagata. O galu maua luga ma le mata'utia, ua pei o lo'o taofia ia 'aia ne'i sili a'e i le tuā'oi e se lima e lē mava'aia, ua ta'uina iā Ioane le mana e pulea mea loloto. Ina ua fa'atusatusa, na ia va'ai ma lagona ai le valea ma le vaivai o le tagata, e na o ilo o le 'ele'ele, o ē mitamitavale i lo latou poto ma le malosi, ma manatu i o latou loto e tete'e i le Pule o le atulaulau, e peiseā'i o le Atua e tutusa ma i latou. E matuā tauaso ma lē aogā le mitamitavale fa'aletagata! O le itulā e tasi o le fa'amanuiāga i le susulu o le lā ma le timu i luga o le 'ele'ele o le a faia mea e sili atu le tele mo le suiga o foliga o le natura i lo mea uma e faia e le tagata i lona poto mitamitavale ma taumafaiga uma e mafai ona 'ausia i lona olaga atoa.

I le si'osi'omaga i lona nofoāga i le motu, na faitauina e le perofeta fa'amaoniga o le mana o le Atua, ma o galuega uma o mea na faia, na feso'ota'i ai ma lona Atua. O le lagona e aupito naunau i ai le agaga e sa'ili i le Atua, o tatalo fa'atauānau, na alu a'e i le lagi mai le motu gaoā o Patamo. A o va'ai atu Ioane i papa, na fa'amanatu ai iā te ia o Keriso, o le papa o lona malosi, o lona lafitaga e mafai ona ia malu ai e aunoa ma le fefe.

(7) O LE Ā LE ASO O LE ALI'I?

Lenei la, o le Atali'i o le tagata, o le Ali'i lava lea o le Sapati.

Mareko 2:28

(8) O FEA LE ASO NA FA'AMANUIA E LE ATUA, FA'APA'IA, MA ŌLE MAI IA TATOU TAUSIA E FAI MA FA'AMANATUGA O LANA FOAFOĀGA?

Ona fa'amanuia atu lea e le Atua i le Aso fitu, ma na fa'asāina ai; auā na malōlō ai o Ia i Lana galuega uma lava na faia e le Atua ma na saunia.

Kenese 2:3

O le aso o le Ali'i ua ta'ua e Ioane o le Sapati, o le aso na malōlō ai Ieova ina ua mae'a Lana galuega tele o le foafoāga, ma sa Ia fa'amanuia ma fa'apa'ia auā na Ia malōlō ai. O le Sapati na tausia ma fa'apa'ia e Ioane i le motu o Patamo, e pei o aso na ia fa'atasi ai ma tagata na lauga ai i lea aso. I autafa o papa sa si'omia ai o ia, sa fa'amanatu ai iā Ioane le mauga gaoā o Horepa, ma na fa'apea ona fetalai mai ai e le Atua Lana tulafono i tagata, "Ia e manatua le aso sapati e te faapa'iaina" (Esoto 20:8).

(9) NA FA'APEFEA ONA FA'AILOA MAI E LE ATUA LE TĀUA O LANA TULAFONO?

Ua uma atu Āna fetalai iā Mose i le mauga o Sinai, ona avatu ai lea e Ia iā te ia o papa e lua o le tulafono, o papa ma'a lava na tusia e le 'a'ao o le Atua.

Esoto 31:18

O le Ālo o le Atua na fetalai iā Mose mai le tumutumu o le mauga. Na faia e le Atua papa ma Ōna malumalu, ma o atumauga o Lona malumalu lea e fa'avavau. Na afio ifo le Faitulafono Pa'ia i le mauga gaoā e fetalai mai ai Lana tulafono ina ia lagona e tagata uma, ina ia latou iloa le tāua o le maoa'e ma le mata'utia o le fa'aalia o le malosi ma le mamalu, ma ia matata'u e soli Āna poloa'iga. Na fetalai mai le Atua i totonu o faititili ma le emo o le uila, fa'apea ao mafafia i luga o le mauga, ma o Lona si'ufofoga ua pei o le leo o le pūe matuā leo tele. O tulafono a Ieova e lē mafai ona suia, ma o papama'a ua tusia ai o papa moni, e iloa ai e lē masuia Āna poloa'iga. O le mauga gaoā o Horepa ua 'avea ma nofoāga e pa'ia i latou uma o ē alolofa ma āva i le tulafono a le Atua.

(10) A O GAOIOI LE AGAGA PA'IA I LUGA O IOANE, O LE Ā LE 'UPU MONI LOLOTO NA IA OFO AI?

Fa'auta i le silisili o le alofa ua foa'iina mai e le Tamā iā te i tatou, ina ua ta'ua i tatou o le fanau a le Atua; o le mea lea e lē iloa ai i tatou e le lalolagi, auā na lē iloa o Ia.

I Ioane 3:1

A o mafau fau loloto Ioane i va'aiga o Horepa, na afio ifo i ōna luga le Agaga o le Ali'i na fa'apa'iaina le aso fitu. Sa ia manatunatu i le agasala a Atamu na ia solia ai le tulafono pa'ia. ma le i'uga mata'utia o lenā solitulafono. O le alofa e lē uma o le Atuana aumai ai Lona Ālo ina ia togiola aile aigā tagata ua lē iloa, o se mea e matuā tele le faigatā i le gagana ona fa'amatala i ni 'upu. A o ia tu'uina atu i lana tusi na ia vala'au i ekalesia ma le lalolagi ina ia va'ai i ai ma malamalama. O se mea lilo iā Ioane le tu'uina mai e le Atua Lona Ālo ina ia maliu mo le tagata fouvale. Na ia lē malamalama a e ua maofa ona o le fuafuāga o le fa'aolataga, ua fuafuaina i se tau e matuā tele mo le lagi, a e lē mafai ona mafa'amatalaina ona ua te'ena e i latou o ē na faia fa'atatau i ai le taulaga.

(11) TALU AILE ALOFA, O LE Ā LE I'UGA E O'O I AI PE A TATOU USIUSITA'I MA LE LOTO MALIE I LE ATUA?

Inā mafau fau ia i lē ua sao lana amio, ma va'ava'ai i lē ua amiotonu; auā o le i'uga o lea tagata o le manuia lava lea.

Salamo 37:37

Na tapunia fa'atasi Ioane ma le Atua. A o a'oa'o atili e ia le uiga o le Atua e ala i galuega o le foafoāga, na fa'atuputeleina ai fo'i lona āva ma le fa'aaloalo i le Atua. Na ia fesili iā te ia lava, Aiseā e lē mafai ai e tagata, o ē na o le Atua e fa'alagolago i ai, ona sa'ili ia maua le filemū iā te Ia pe a latou usiusita'i ma le loto malie? E lē gata Lona poto, ma e leai se tuā'oi o Lona mana. Na te pulea le atulaulau ma o latou lalolagi e lē mafaitaulia. E na te fa'asao ia ō gatasi le ofoofogia maoa'e ma le matagofie o mea na Ia foafoaina. O le agasala o le solia lea o le tulafono a le Atua, ma o le totogi o le agasala o le oti lea. Se manū e leai se fevaevaea'iga i le lagi po o le lalolagi pe ana lē ulufale mai le agasala. O le lē usiusita'i i le tulafono a le Atua na aumaia le malaia ua aofia ai mea ola uma na Ia faia. Ai seā ua lē faia ai e tagata se leleiga i le Atua?

(12) O LE Ā LE FOLAFOLAGA MO I LATOU E FAIA LE FINAGALO O LE ATUA?

Amu'ia i latou o ē faia Āna poloa'iga, ina ia taga iā i latou le la'au o le ola, ma ia latou ulu atu i le 'a'ai i ōna faitoto'a.

Fa'aaliga 22:14

E lē o se mea māmā le agasala e aga'i i le Atua, i le tu'u atu o le loto finauvale o le tagata e fa'asagatau i le finagalo o Lē na faia o ia. E mo le lelei o le tagata, e fa'apea ma lenei lalolagi, ina ia usiusita'i i le tulafono a le Atua. Ma o le mea mautinoa mo lo latou lelei e fa'avavau o le gaua'i i le Atua, ma ia lelei ma Ia. O manu o le vao e latou te usiusita'i i tulafono a le Atua ia ua tu'uina iā i latou e pulea ai i latou. Ua fetalai o Ia i le vasa lautele, "E te o'o mai i'inei, ae e te lē sopo'ia" (Iopu 38:11); ma e usiusita'i le suāsami i Lana afioga. O paneta e ta'amilo i fa'asologa e ato'atoa ona usiusita'i i tulafono ua fa'atūina e le Atua. I mea uma na faia e le Atua i luga o le fogā'ele'ele, e na o le tagata lava e fouvale. A e e iā te ia le pule e mafau fau e fetu'una'i ma malamalama ai i mea e ao ona fai e tusa ma le tulafono pa'ia ma le loto fuatiaifo e lagona ai le ta'usalaina o le solitulafono, ma le filemū ma le oli'oli mai le usiusita'i. Na faia e le Atua le tagata ia i ai le pule sa'oloto, pe usiusita'i pe lē usiusita'i. O le tau i o le ola e fa'avavau - o le mamalu lea e fa'avavau - ua folafolaina iā i latou o ē faia le finagalo o le Atua, a o le lapata'iga mata'utia o Lona to'asā e fa'amālumālu mai lea i luga o i latou uma o ē tete'e Lana tulafono.

(13) O LE Ā LE FA'AMATALAGA MAI LENEI FUAI'UPU UA FA'AILOA MAI AI O LE MAMALU E LĒ MAFA'AMATALAINA O LE ATUA E LĒ FA'ATAPULA'AINA I LANA FOAFOĀGA O TAGATA?

Ieova e, e vivi'i le lagi i Ōu vavega; e vi'ia fo'i Lou fa'amaoni i le fa'apotopotoga o le 'au pa'ia.

Salamo 89:5

A o mantunatu loloto Ioane i le mamalu o le Atua o lo'o fa'aalia i Āna galuega, na maofa o ia i le matuā ofoofogia ma le maoa'e o le mamalu o Lē na foafoaina mea uma. Pe afai o tagata uma o lo'o ainā lenei lalolagi itiiti e latou te lē o fia usiusita'i i le Atua, o le a lē 'avea lea ma mea o le a leai ai Sona mamalu. E mafai ona Ia 'ave'esea mai le fogā'ele'ele tagata ola uma i se taimi fa'atauva'a pei o le 'emo o le mata, ma Ia toe faia ni tagata fou e fa'aainā le lalolagi ma vi'ia ai Lona suafa. E lē fa'alagolago le Atua i tagata mo vi'iga. E mafai ona Ia fa'atonuina 'au a le lagi, o le miliona o lalolagi i lugā i le vāteatea, ina ia latou pepese se vi'iga o le fa'ane'ene'e ma vi'iga o le mamalu o Lē na foafoaina i latou, "Auā o ai ea i le lagi e fa'atusaina Ieova? O ai so le fanau a ē malolosi e tusa ma Ieova? O le Atua e tatau ona mata'utia tele i le fa'apotopotoga o le 'au pa'ia; e tatau fo'i ona mata'utia o Ia e i latou uma o ē vagavagai iā te Ia" (Salamo 89:6, 7).

(14) IA FA'AMATALA LE FOLIGA MAI O KERISO E PEI ONA VA'AI I AI IOANE I LE FA'AALIGA.

Ua sinasina fo'i Lona ao ma Ōna lauao e pei o le fulufulu mamoe ona sinasina, e pei o le kiona lava; o Ōna fofoga fo'i e pei o le mumū o le afi; ma Ōna vae e pei o le 'apa pupula, e peiseā'i ua mū i le ogāumu; o Lona si'ufofoga fo'i e pei o le ta'alili o vai e tele.

Fa'aaliga 1:14, 15

Na toe fa'amanatuina e Ioane va'aiga matagofie o mea na tutupu sa ia molimauina i le soifuāga o Keriso. I lana va'aiga fa'alemafaufau na ia toe fīafia ai i avanoa tāua na 'avea ai ia o lē na alofaina, ma sa matuā fa'amafanafanaina ai o ia. Na fa'afuase'i ona motusia ona mafaufauga, ua vala'auina o ia e se leo e manino lelei. Na ia faliu e va'ai po o fea e sau ai le leo, Oi! ua ia va'aia lona Ali'i, o Lē sa ia alofa i ai, na la masani ona savavali ma talanoa fa'atasi, ma na ia molimauina Ōna pupuagā i luga o le satauro. Peita'i, o se suiga i le va'aiga o le Fa'aola! O Ia ua lē toe pei "o le tagata fa'anoanoa, ua masani fo'i ma le tigā" (Isaia 53:3). E lē o iā te Ia ni fa'ailoga o le fa'amaulaloina. O Ōna fofoga e pei o le mumū o le afi; o Ōna vae e pei o le 'apa pupula, e peiseā'i ua mū i le ogāumu. O Lona si'ufofoga e pei o le ta'alili o vai e tele, ua susulu mai Ōna fofoga pei o le pupula o le lā i lona atoa. Ua i Lona 'a'ao taumatau o fetū e fitu, e fa'asino lea i ta'ita'i o ekalesia. Ua alu atu mai Lona fofoga o le pelu e ma'ama'ai ona itū e lua, o le fa'atusa o le malosi o Lana afioga.

(15) O LE Ā LE MEA NA TUPU IĀ IOANE, LE SO'O O KERISO NA ALOFAINA MA FA'APA'IAINA, INA UA I AI I LUMA O LE ALI'I?

Ua 'ou iloa atu iā te Ia, ona 'ou pa'ū ifo lea i Ōna vae e peisea'i ua oti; a ua Ia fa'ae'e mai Lona 'a'ao taumatau i luga iā te a'u, ua fa'a'apea mai iā te a'u, 'Aua e te fefe; o A'u Lē muamua ma Lē mulimuli.

Fa'aaliga 1:17

O Ioane, o lē na alofa tele i lona Ali'i, ma na taofi mau pea i le 'upu moni i le fesāga'i ai ma le falepuipui, sasaina, ma fa'amata'u i le oti, a e na ia lē mafai ona lavatia le fa'atasi ai o le mamalu o Keriso, ma ua pa'ū i le 'ele'ele e peiseā'i o se tagata ua oti. Na fa'ae'e e Iesu Lona 'a'ao taumatau i luga o Lana 'au'auna ma fetalai atu, "'Aua e te fefe;...o A'u Lē ola nei lava, sa 'Ou oti, fa'auta fo'i, 'Ou te ola e fa'avavau fa'avavau lava" (Fa'aaliga 1:17, 18). Na fa'amalosia Ioane e ola i le fa'atasi ai o lona Ali'i ua fa'amamaluina, ma na tu'uina atu loa i ōna luma fa'aaliga pa'ia o fuafuāga a le Atua mo augātupulaga o i lumana'i.

(16) O LE Ā LE VA'AIGA NA FA'AMANUIAINA IOANE E MOLIMAUINA MA O LE A O'O I AI LE 'AU FA'AOLAINA I SE ASO O LUMANA'I?

Ua mavae atu ia mea, ona 'ou iloa lea, fa'auta fo'i i le motu o tagata e to'atele mai atu nu'u uma, ma aiga, ma nu'u, ma gagana 'ese'ese, e lē ma faitaulia e se tasi, o lo'o tutū i latou i luma o le nofoāli'i ma luma o le Tama'i Mamoe, ua 'o'ofu i latou i 'ofu sisina, ua i ai fo'i lau pama i o latou lima; ua latou alalaga fo'i ma leo tetele, ua fa'a'apea atu, O i ai le fa'aolataga i lo tatou Atua o Lē ti'eti'e i le nofoāli'i, atoa ma le Tama'i Mamoe. Ua tutū

fa'ata'ali'oli'o agelu uma i le nofoāli'i ma le 'au toea'ina ma mea ola e fā, ua latou fa'apa'ū faō i luma o le nofoāli'i, ma ifo atu i le Atua.

Fa'aaliga 7:9-11

Na fa'ailoa iā te ia le va'aiga matagofie o le aiga i le lagi. Na fa'atagaina o ia e va'ai i le nofoāli'i o le Atua ma iloa le motu o tagata e ofu sinasina ua faaolaina. Sa ia fa'alogoina pesega a agelu o le lagi, ma vi'iga o le manumalō mai iā i latou o ē na manumalō ona o le toto o le Tama'i Mamoe ma le 'upu o la latou molimau.

(17) O LE Ā LE MEA UA TU'UINA ATU IĀ I LATOU O Ē E LOTO MAULALO MA UA FA'APA'IAINA LE AGAGA?

O le fa'amaualuga o le tagata e fa'amaulaloina ai o ia; a o le fa'amaulalo o le loto e maua ai le vi'iga.

Fa'ata'oto 29:23

Mo le so'o na alofaina sa tu'uina i ai le avanoa maualuga e lē to'atele ni tagata ola ua latou maua. Peita'i ona o le felata'i o lana amio e pei oo Keriso, e le'i i ai se uiga mitamitavale i lona loto. O lona loto maualalo e le'i na o se fa'afoliga; na ufiufi o ia e le alofa tunoa e pei o se ofu. Na ia sa'ilia auala e nātia ai lona ia amiotonu ma 'alo'ese mai gaoioiga uma atonu e foliga o le a tosina ai tagata iā te ia. I lana Evagalia, e ta'ua e Ioane le so'o na alofaina, peita'i na fa'alilo le mea moni o ia lava lea ua fa'aaloaloga.

(18) O LE Ā LE MEA UA A'OA'O MAI IOANE E MANA'OMIA I LE AMIO A Ē MULIMULI IĀ KERISO?

O le poloa'iga fou 'Ou te tu'u atu ai ia te outou, ia outou fealofani; fa'apei ona 'Ou alofa atu iā te outou, ia fealofani fo'i outou.

Ioane 13:34

O le amio a Ioane sa aunoa ma le alofa fa'apito. O lona olaga i aso faiso'o na ia a'oa'o ma ola e fa'aalia ai le alofa e matuā ato'atoa. Sa maualuga lona manatu i le itū'aiga alofa e tatau pna i ai i totonu o ;e mafutaga a le 'au uso Kerisiano. Na ia fa'aali ma ūna'i lea alofa o se amio e mana'omia ma e tatau ona i ai i ē mulimuli iā Iesu. Afai e aunoa ma lea, o fa'a'upuga uma e fa'atatau i le Kerisiano o le a leai se aogā.

(19) O LE Ā LE TA'IALA FA'ALE-ATUA O LE A FA'AMAONIA LE FA'ATINOINA O LE FA'APA'IAINA I LE OLAGA O LE KERISIANO?

Auā o le poloa'iga lenei ua outou fa'alologologo i ai talu le amataga, ia tatou fealofani.

I Ioane 3:11

O Ioane o le a'oa'o o le fa'apa'iaina e fa'atinoina. Na is ta'u mai tulafono e sa'o mo le amio a le Kerisiano. E ao ina mamā le loto ma ia sa'o le amio. E leai se taimi e tatau ona fa'amalieina ai ia na o 'upu e fai a e lē fa'atinoina. Na ia fa'ailoa manino mai i 'upu tu'u sa'o, e fa'apea o le ta'ua o le tagata o le Kerisiano e tatau lea ona pei o Keriso.

(20) A O FA'AILOA MAI IĀ I TATOU LE AMIO A KERISO, O LE Ā LE 'UPU MONI A AO ONA TATOU MAFAUFAU LOLOTO I AI?

Se ā ea le tagata e te manatu mai ai iā te ia; ma le atali'i o le tagata e te asiasi mai ai iā te ia?

Salamo 8:4

O le olaga o Ioane o se tasi na taumafai ma le naunauta'i e ō gatasi ma le finagalo o le Atua. O le aposetolo sa mulimuli vāvālalata tele ma lona Fa'aola, ma maua ai e ia le lagona o le mamā ma le fa'aeaina o le pa'ia o Keriso, na foliga lana lava amio, pe a fa'atusatusa atu, e matuā ponā lava. Ma ina ua fa'aalia mai Iesu i Lona tino mamalu iā Ioane, sa na o lana tepa e tasi na mafua ai ona pa'ū i lalo e pei o se tasi ua oti. O le lagona lenā a i latou ua iloa lelei lo latou Ali'i ma le Matai. O le tele o le manatunatu loloto i le soifuāga ma le uiga o Keriso, o

le tele lea o le loloto o le lagona o ā latou lava agasala, o le itiiti lea o lona manatu o le a fa'aioa mai o ia e pa'ia lona loto po o le ta'u mitamita mai o latou e fa'apa'iaina.

'Ou te tatalo mo le loloto o le fa'atuatua na iā Ioane na tū malosi ai mo le Ali'i a o fesaga'i ma le tele o sauāga.

Li'o le Tali: **Ioe** **Lē Mautonu**

'Ou te fa'afetai ona e ui atonu e sauāina a'u, e leai se mea e vā ai ma le alofa o le Atua.

Li'o le Tali: **Ioe** **Lē Mautonu**

'Ou te fa'afetai ona o le valea o le Atua e tele atu le poto e i ai nai poto uma o tagata.

Li'o le Tali: Ioe Lē Mautonu

O la'u tatalo ia fa'apa'iaina lo'u olaga e le Atua. 'Ou te fiafia o lo'o olaga e fa'avae i le loto malie e usiusita'i, 'ou te maua ai le filemū e na o Ia e mafai ona aumai.

Li'o le Tali: **Ioe** **Lē Mautonu**

Manatu o Su'esu'ega	Tatalo Mana'omia	Tali o Tatalo
---------------------	------------------	---------------

This image shows a single sheet of white paper with horizontal blue ruling lines. The lines are evenly spaced and run across the width of the page. There are no margins, text, or other markings on the paper.

O le Amio a le Kerisiano

Lesona 10

(1) E FA'APEFEA ONA FA'AALIA MAI LE UIGA MONI O LE TAGATA?

Tou te iloa i latou i o latou fua. Pe tau mai ea tagata se fuifui vine mai le la'au tuitui, po o mati mai le la'au talatala?

Mataio 7:16

O le uiga moni o le Kerisiano e fa'aalia mai lea i lona olaga o aso faiso'o. Ua fetalai mai Keriso, "E fa'apea fo'i la'au lelei ta'itasi ma fua mai i fua lelei; a o le la'au leaga e fua mai i fua leaga" (Mataio 7:17).

(2) INA IA OLAOLA MA FUA LELEI MAI LA'AU, O FEA E MAUA MAI AI A LATOU MEA'AI?

O A'u nei o le vine, o la outou. O lē tumau iā te A'u, ma A'u iā te ia, o ia lava e fua tele mai; auā e lē mafaia e outou ona fai o se mea e tasi pe a A'u lē i ai.

Ioane 15:5

Ua fa'atusaina e lo tatou Fa'aola Ia lava i se vine, a o Ōna so'o o lālā ia. Ua Ia fa'aailoa manino mai o i latou uma e fia 'avea ma Ōna so'o e tatau ona fua mai; ma na Ia fa'aalia mai pe fa'apefea ona 'avea ma lālā e fua tele mai. "Inā tumau ia o outou iā te A'u, o A'u fo'i iā te outou. Fa'apei o le lā e lē mafai ona fua pe a na o ia, pe afai e lē mau i le vine; a fa'apea fo'i outou, pe afai tou te lē tumau iā te A'u" (Ioane 15:4).

(3) O LE Ā LE FUA O LO'O FA'AALIA MAI I LE OLAGA O LE KERISIANO?

A o le fua o le Agaga o le alofa, o le 'oli'oli, o le filemū, o le onosa'i, o le mataalofa, o le agalelei, o le fa'amaoni, o le agamalū, ma le lē gaoiā; e lē fa'atulafonoina mea fa'apenā.

Kalatia 5:22, 23

Ua fa'amatala mai e le aposetolo o Paulo le fua e tatau ona fua mai ai le Kerisiano. Ua fai mai o ia e i "le agalelei uma lava lea, ma le amiotonu, ma le fa'amaoni" (Efeso 5:9). O nei uiga tāua o ni ta'iala o le tulafono a le Atua e tatau ona tau'aveina i le olaga atoa.

(4) O LE Ā LE FE'AU UA TU'UINA IĀ I LATOU O LO'O MAU IĀ KERISO?

O lē fa'apea o lo'o tumau Ia i totonu iā te ia, e tatau ona savali o lenā tagata fa'apei ona savali o Ia.

I Ioane 2:6

O le tulafono a le Atua e pau lea o le tapula'a moni o le amio e lelei le ato'atoa, auā sa tu'uina mai le fa'ata'ita'iga o le tausiga o le tulafono i le soifuāga o Keriso. Na fetalai mai e fa'atatau iā te Ia lava, ua "'Ou tausia poloa'iga a Lo'u Tamā" (Ioane 15:10). E mana'omia e le Atua lo tatou usiusita'i i Āna afioga; e lē mafai ona tatou 'ai'oi atu e tatou te lē mafai ona faia lea mea, auā ua iā i tatou le mautinoāga, fa'apea, "O Lo'u nei alofa tunoa e lava lea e fesoasoani iā te 'oe" (II Korinito 12:9). A tatou va'ai atu i le fa'ata fa'alelagi, o le tulafono a le Atua, tatou te va'aia ai le matuā leaga tele o le agasala, ma lo tatou lava tulaga lēiloa ona o le solitulafono. Peita'i e ala i le salamō ma le fa'atuatua ua ta'uamiotonu ai i tatou i luma o le Atua, ma e ala i le alofa tunoa o le Atua ua mafai ai ona tatou usiusita'i i Āna poloa'iga.

(5) E FA'APEFEA ONA FA'AALIA LE ALOFA MONI MO LE ATUA?

Afai tou te alofa mai iā te A'u, ia outou tasi mai i A'u poloa'iga.

Ioane 14:15

O i latou uma e i ai le alofa moni mo le Atua o le a fa'atinoina se naunauta'i ia iloa ma fai Lona finagalo. Ua fa'apea mai le aposetolo o Ioane i āna tusiga o lo'o fa'amamafaina ai le alofa, "Auā o lenei lava le alofa i le Atua, ia tatou tausi i Āna poloa'iga" (I Ioane 5:3). O le tamaitiiti e alofa i ōna mātua o le a fa'aalia lea alofa e ala i lona usiusita'i; peita'i o le tamaitiiti e manatu fa'apito, e lē loto fa'afetai, e ssa'ili ia faia sina mea itiiti mo mātua, a e o lo'o naunau ia e maua manuia uma e fa'afiafia ai e fa'apei o lē e usiusita'i ma e fa'amaoni. E fa'apea fo'i iā i latou o ē ta'u mai o le fanau a le Atua; le to'atele e iloa e alofa ma tausia i latou e le atua, ma e naunau ia maua Āna fa'amanuiāga, a e latou te lē fiafia e faia Lona finagalo. E latou te ta'u mai o poloa'iga a le Atua e mamafatū, o se noataga e faigatā ma lē lelei. Peita'i o le tagata o lo'o sa'ili ma le fa'amaoni le loto ma le olaga e fa'apa'iaina e fiafia ia i le tulafono a le Atua, ma e fa'anoanoa pe a ia lē 'ausia le tapula'a o lo'o mana'omia.

(6) E FA'APEFEA ONA FA'AALITINOINA I O TATOU OLAGA LO TATOU ALOFA I LE ATUA?

O le poloa'iga fou 'Ou te tu'u atu ai iā te outou, ia outou fealofani; fa'apei ona 'Ou alofa atu iā te outou, ia fealofani fo'i outou.

Ioane 13:34

O lo'o fa'atonuina i tatou ia alofa le tasi i le tasi e pei ona alofa mai Keriso iā ii tatou. Ua fa'atinoina Lona alofa ina ua tu'uina Lona soifua ia laveā'iina ai i tatou. Ua ta'u mai e le so'o ua pele ia tatau fo'i ona naunau o tatou loto e fa'apea ona tu'u atu o tatou ola mo o tatou uso. Auā "o i latou uma fo'i o ē alolofa i lē āna le fanau, e alolofa fo'i i latou i lana fanau" (I Ioane 5:1). Pe afai e tatou te alolofa iā Keriso, e tatau ona tatou alolofa iā i latou e pei o Ia i Lona soifuāga ma Ōna uiga. Ma e lē na o lea, a e ia alolofa i ē e leai "se fa'amoemoe," ma e "aunoa fo'i ma le Atua i le lalolagi" (Efeso 2:12). Na tu'ua e Keriso Lona aiga i le lagi a e afio mai i le lalolagi e fa'apuapuagātiaina ma mālū ai ina ia fa'asaoina tagata agasala. Mo lenei i'uga, na Ia galue ma mafatia ma tatalo ai, se'ia o'o ina ua loto momoia ma tu'ulafoā'iina e i latou na Ia afio mai e fa'asao. Na Ia tu'uina mai atoa Lona soifua i Kalevario.

(7) O LE Ā LE MOLIMAU MAI LE LOTO O LE KERISIANO UA FA'APA'IAINA?

O le mea lea ua tigāina ai a'u i ia mea; a 'ou te lē mā lava, auā ua 'ou iloa o Ia ua 'ou fa'atuatua i ai, ma a'u mautinoa ua mafaia lava e Ia ona leoleo i le mea na 'ou tu'uina atu ai iā te Ia e o'o atu i lea lava aso.

II Timoteo 1:12

E to'atele e lē 'auai i se olaga e pei ona soifua ai le Fa'aola. E manatu i latou o se taulaga ofo lea e matuā telē o le a mana'omia e faia ina ia tusai ma le Fa'ata'ita'iga, ia maua mai ai fua o galuega lelei, ma lava ai le onosa'i a o teuteuina e le Atua ina ia aumai ai nisi fua e tele. Peita'i pe a fa'apea ifo le Kerisiano o ia e na o se mea faigaluega maulalo i 'a'ao o Keriso, ma taumafai e fai ma le fa'amaoni galuega uma ma fa'alagolago i le fesoasoani ua folafola mai e le Atua, o le a ia amoina loa le amo faigofie a Keriso; o le a ia tau'aveina 'avega mo Keriso, ma ta'u mai e māmā lava. E mafai ona tepa a'e ia i luga ma le lototele ma talitonu fa'amaoni, ma fa'apea mai, "Ua 'ou iloa o Ia ua 'ou fa'atuatua i ai, ma a'u mautinoa ua mafaia lava e Ia ona leoleo i le mea na 'ou tu'uina atu ai iā te Ia e o'o atu i lea lava aso" (II Timoteo 1:12).

Pe afai tatou te fetaia'i ma fa'afitāuli i o tatou ala, ma tatou manumalō ai; pe a tatou fa'afesaga'i ma ē tete'e ma faitio mai, ma manumalō ona o le suafa o Keriso; pe a tatou tau'ave o tatou tiute ma fai a tatou galuega e tatau ai i le agaga o lo tatou Matai - ona tatou maua lea o se malamalamaga tāua o Lona fa'amaoni ma Lona mana. O le a tatou lē toe fa'alagolago i galuega a isi, ona ua tatou molimauina i tatou lava ia. E pei o tagata Samaria anamua, e mafai ona tatou fa'apea atu, "O i matou lava ua matou fa'alologologo, ua matou iloa fo'i, e moni lava, o le Fa'aola lenei o le lalolagi, o le Keriso lava" (Ioane 4:42).

(8) O Ā MEA TĀUA E LUA E FA'AAOGĀINA E LE ALI'I E MAUA AI LE FA'APA'IĀGA I LE OLAGA O LE KERISIANO?

Ua 'ou molitino iā Iutaia atoa ma Eleni le salamō i le Atua, ma le fa'atuatua i lo tatou Ali'i o Iesu Keriso.

Galuega 20:21

Pe a tatou manatunatu loloto i le uiga o Keriso, ma tatou iloa Lona mana fa'asao, o le a tatou iloa manino ai lo tatou vaivai ma le lē atoa'atoa, ma o le a tatou tepa ma le fa'amaoni iā te Ia, o lo tatou malosi ma lo taou Fa'aola. E leai lava so tatou malosi e fa'amamā ai le malumalu o le agaga mai mea o lo'o leaga ai; peita'i pe afai tatou te salamō mai agasala na tatou fai e tete'e ai i le Atua, ma sa'ili le fa'amagaloga e ala iā Keriso, o le a Ia aumai le fa'atuatua e galue ona o le alofa ma e fa'amamāina ai le loto. E ala i le fa'atuatua iā Keriso ma le usiusita'i i le tulafono a le Atua o le a mafai ai ona fa'apa'iaina i tatou, ma o le a mafai ona maua le malosi e talafeagai ma i latou i le fa'apotopotoga a agelu pa'ia ma ē ua togiolaina i le malō mamalu.

(9) O LE Ā LE MANA MAI LE ATUA O LE A IA TU'U AI SE AMIO E ATO'ATOA LE LELEI I LANA FANAU?

Auā afai tou te amio i la le tino, e oti ai outou; a e afai e fasiotia e outou amioga a le tino e le Agaga, tou te ola ai.

Roma 8:13

E lē na o le avanoa a e o le tiute fo'i a Kerisiano uma ia tausi lelei le so'otaga ma Keriso ma ia lelei le galuea'iina o mea a le Atua. O le a maua ai lea i lona olaga o ni fua mai galuega lelei. Na fetalai Keriso, "E vi'ia Lo'u Tamā i lenei mea, pe a outou fua tele mai" (Ioane 15:8). Pe a tatou faitau i olaga o ē tulaga maualuluga ona o lo latou amiotonu, tatou te fa'ataua e lē mafai ona tatou 'ausia le tapula'a o a latou galuega. Peita'i e lē tonu lea manatu, auā na maliu Keriso mo tagata uma. Ua Ia ta'utino mai i Lana afioga e matuā finagalo Ia e tu'u mai Lona Agaga Pa'ia iā i latou uma o ē ōle atu iā te Ia, e sili mamao atu i lo o meaalofo e tu'uina e mātua i a latou fanau. E le'i fa'aleleiina amio Kerisiano a perofeta ma aposetolo ona o se vavega. Sa latou fa'aaogā mea na tu'u i ai e le Atua; ma o i latou uma e fa'aapea ona taumafai, o le a latou maua fo'i lea lava i'uga.

(10) O Ā FA'AMANUIĀGA E TOLU O LE FA'APA'IĀGA UA TA'U MAI E PAULO FA'APEA, "O LE 'OLOA FAULA'I O KERISO E LĒ MASU'ESU'EINA"?

Ina ia foa'iina iā te outou e tusa ma le faula'i o Lona vi'iga, ia fa'amalosia outou i le mana e Lona lava Agaga, i le tagata i totonu; ia nofo mau Keriso i o outou loto i le fa'atuatua, ina ia maua'a outou, ma ia fa'avaeina i le alofa, tou te mafai ai ona iloa lelei e outou atoa ma le 'au pa'ia uma, o le uiga o le lautele, ma le umi, ma le loloto, ma le maualuga, ia iloa fo'i le alofa o Keriso ua silisili 'ese e lē mailea, ia fa'atutumuina outou i le tumu uma lava o le Atua.

Efeso 3:16-19

I lana tusi i le ekalesia i Efeso, na fa'atū atu ai e Paulo i o latou luma le "'upu o le tala lelei sa lilo" (Efeso 6:19), le "'oloa faula'i o Keriso e lē masu'esu'eina lava" (Efeso 3:8), ma na ia ta'utino atu āna tatalo fa'atauānau mo lo latou manuia fa'aleagaga.

Sa ia tusi atu fo'i i ōna uso i Korinito, "o ē ua fa'apa'iaina iā Keriso Iesu...: Ia iā te outou le alofa tunoa ma le manuia mai le Atua lo tatou Tamā, ma le Ali'i o Iesu Keriso. 'Ou te fa'afetai atu i lo'u Atua e lē aunoa ona o outou, auā o le alofa tunoa o le Atua ua foa'iina mai iā te outou iā Keriso Iesu; ina ua fa'atamāo'aigaina outou e Ia i mea uma, i le 'upu uma lava ma le poto uma; fa'apei ona fa'amaonia le molimau iā Keriso iā te outou; o lea ua outou lē matitiva ai i se mea alofa e tasi; o lo'o fa'atalitali outou i le fa'aaliga o lo tatou Ali'i o Iesu Keriso" (I Korinito 1:2-7). O nei 'upu e lē mo na o i latou i Korinito, a e fa'aapea tagata uma o le Atua e o'o i le taimi fa'ai'u. Ia tatau i Kerisiano uma ona maua le fa'amanuiāga o le fa'apa'iaina.

(11) O LE Ā LE TULAGA O LE A I AI I LATOU UMA UA FA'APA'IAINA IĀ KERISO?

Le 'au uso e, 'ou te 'ai'oi atu iā te outou i le suafa o lo tatou Ali'i o Iesu Keriso, ina ia tasi la outou 'upu uma lava, ina ne'i i ai ni maseiga ia te outou; a ia maopoopo lava i le loto e tasi ma le manatu e tasi.

I Korinito 1:10

E lē 'ai'oi atu Paulo iā i latou ina ia fai se mea e lē mafai ona faia. O le nofolelei fa'atasi o le i'uga moni lea o le atoāga fa'a-Kerisiano.

(12) O Ā TULAGA E TOLU O LE FA'APA'IĀGA NA TATALO PAULO IA TU'UINA MAI I LE FANAU A LE ATUA?

O le mea lea o i ma'ua fo'i ma te le'i mapu ai lava i le tatalo mo outou, talu le aso na ma fa'alologologo ai, ma te 'ai'oi atu fo'i ina ia ato'atoa ona outou iloa lelei o Lona finagalo, i le poto uma atoa ma le mafaufau fa'aleagaga; ia outou savavali e tusa ma le Ali'i, ina ia fiafia mai o Ia iā te outou i mea uma, ma ia outou fua mai galuega lelei uma lava, ma ia tupu pea lo outou iloa lelei o le Atua; ia fa'amalosia outou i le malosi uma lava, e tusa ma Lona malosi ua silisili, e i'u i le onosa'i uma lava ma le fa'atoatoa atoa ma le fiafia.

Kolose 1:9-11

I le tusi i le 'au uso i Kolose, ua fa'aali mai ai avanoa matagofie o lo'o teuina mo le fanau a le Atua.

(13) O Ā FA'AMATALAGA E LUA UA FA'AALI MAI AI NA FA'AAUAU PEA LE GALUEGA O LE FA'APA'IĀGA IĀ PAULO?

E lē peisea'i ua 'ou maua nei, po ua 'ou ato'atoa ona lelei nei; a 'ou te tausisi atu pea pe mafai ona 'ou maua o le mea na maua ai a'u e Keriso Iesu.

Filipi 3:12

Auā 'ou te lē faia o le mea lelei 'ou te loto i ai, a o le mea leaga 'ou te lē loto i ai, o le mea lea 'ou te faia.

Roma 7:19

Na taumafai fo'i le aposetolo ina ia 'ausia e ia lea lava tapula'a maualuga e pei ona ia tu'uina i luma o ōna uso. Ua tusi atu i uso o i Filipi, "O mea uma sa aogā iā te a'u, ua 'ou manatu ua lē aogā ia mea ona o Keriso.... Ina ia 'ou iloa o Ia, ma le mana o Lona toe tū mai, ma ia fa'atasi a'u i Ōna tigā, ona ua fa'atusaina a'u iā te a'u i Lona maliu, pe mafai lava iā te a'u ona o'o atu i le toe tū mai o ē ua oti. E lē peisea'i ua 'ou maua nei, po ua 'ou ato'atoa ona lelei nei; a 'ou te tausisi atu pea pe mafai ona 'ou maua o le mea na maua ai a'u e Keriso Iesu. Le 'au uso e, 'ou te lē manatu ua 'ou maua, a o le mea e tasi 'ou te faia, 'ou te fa'alogalo i mea ua tuana'i, 'ou te momo'e punou a'i fo'i i mea o lumana'i, 'ou te tausisi atu i le fa'ailoga, ia maua ai le tau na vala'auina ai a'u mai lugā e le Atua iā Keriso Iesu" (Filipi 3:7-14). E matuā i ai le 'ese'esega i le vā o le mitamitavale ma le fa'afiaamiotonu o i latou o ē ta'u mai e leai ni a latou agasala ma le gagana mai le loto fa'amaulalo a le aposetolo. A e o lona olaga mamā ma le fa'amaoni na fa'ailoa ai le malosi o āna fautuāga i ōna uso fa'aleagaga.

(14) E FIA LE UMI O LE TAIMI O LE A FAI AI PEA E LE ATUA LE GALUEGA O LE FA'APA'IAINA O LANA FANAU?

Ua 'ou mautinoa lenei lava mea, o Ia na amataina le galuega lelei i totonu iā te outou, e fa'a'ato'atoaina ai lava e Ia e o'o atu lava i le aso o Iesu Keriso.

Filipi 1:6

(15) O LE Ā LE MEA NA TA'U MAI E PAULO E FA'ATATAU I LE FINAGALO O LE ATUA MO LANA FANAU?

O le finagalo fo'i lenei o le Atua, ia fa'apa'iaina outou, ina ia fa'amamao outou ma le faita'aga.

I Tesalonia 4:3

E le'i fa'atuai ona fa'amalosia e Paulo, i taimi uma e tatau ai le tāua o le fa'apa'iaina fa'ale-Tusi Pa'ia: "O lenei, a'u pele e, fa'apei ona outou 'ana'ana mai e lē aunoa, e lē gata ina o tatou nonofo ma outou, a o lenei ua atili ai ina ua 'ou lē i ai iā te outou, ia outou galulue a'ia'i ma le mata'u atoa ma le gatete, ina ia fa'aolaina outou. Auā o le Atua, o Ia lē galue i totonu iā te outou i Lona finagalo alofa, ina ia outou loto ma galulue i ai. Ia outou faia

mea uma lava ma le lē muimui, ma le lē fefinaua'i; ina ia 'avea outou ma ē ua lē mata'uleagaina, ma ē ua sao le amio, o le fanau a le Atua, e lē ponā i luma o le tupulaga amio fa'api'opi'o ma le finau vale; ua pupula iā te i latou la outou *amio*, fa'apei o mea e fa'amalamalama a'i le lalolagi" (Filipi 2:12-15).

Na ia poloa'i Tito ina ia fa'atonu le ekalesia e tatau ona talitonu o le fa'aolataga e maua ona o le lelei oo Keriso, ma e ala i le alofa tunoa o le Atua e mafuta i o latou loto, o le a ta'ita'iina ai i latou e galulue ma le fa'amaoni e faia tiute uma o le olaga. "Ia e fa'amanatu atu iā i latou ia latou usiusita'i i ali'i sili ma faipule, ia gaua'i i ali'i, ia nofo sauniuni fo'i i latou i galuega lelei uma lava, 'aua ne'i 'upu leaga i se tasi, 'aua ne'i fa'amisa, a ia fa'apalepale, ma ia fa'aali atu le agamalū uma i tagata uma lava....A ua fa'aalia mai le agalelei ma le alofa i tagata o lo tatou Fa'aola le Atua, ona fa'aola mai ai lea o Ia iā i tatou, e lē ona o galuega o i le amiotonu sa tatou faia, a e tusa ma Lona lava alofa i le fa'ata'eleina i le toefuata'iina ma le fa'afouina e le Agaga Pa'ia, ua na fa'amaligi tele mai i luga iā i tatou, ona o Iesu Keriso lo tatou Fa'aola; ina ia ta'uamiotonuina i tatou i Lona lava alofa tunoa, ia fai i tatou ma suli e tusa ma le fa'amoemoe i le ola e fa'avavau. O le 'upu moni lenā 'ou te loto fo'i ina ia e matuā fa'amalosi atu i ia mea, ina ia naunau i latou o ē ua fa'atuatua i le Atua ona ia faia galuega lelei; e lelei lava ia mea ma aogā i tagata" (Tito 3:1-8).

(16) O Ā UIGA MONI E VALU O LE A FA'AALIA MAI E I LATOU "O Ē UA FILIFILIA E LE ATUA?"

O lenei, ia o'ofu outou i le alofa mutimuti vale, ma le agalelei, ma le loto maulalo, ma le agamalū, ma le onosa'i, fa'apei o ē ua filifilia e le Atua, o ē ua pa'ia ma ua alofaina; ia fefa'apalepalea'i, ma ia fefa'amagaloa'i outou, pe afai ua agaleagaina se tasi e se tasi; fa'apei ona fa'amagalo mai Keriso iā te outou, ia fa'apea fo'i outou. A o le alofa, e lautua lea i nei mea uma, o le fusi lea e ato'atoa ona lelei ai.

Kolose 3:12-14

Ua sa'ili Paulo e fa'amauiina i o tatou mafaufau le 'upu moni e fa'atatau i le alofa, o le fa'avae o 'au'aunaga uma e faia i le Atua, a e o le paleali'i lava lea o galuega lelei uma a le Kerisiano; ma e na o le agaga e fa'aalitino ai le alofa o le a nofomau ai le filemū a le Atua. "Ia pule fo'i le filemū mai le Atua i o outou loto, o le mea lea ua vala'auina ai outou e fai ma tino e tasi; ma ia outou saga fa'afetai. Ia nofo le afioga a Keriso i totonu iā te outou ia tele lava, i le poto uma lava, ia outou a'oa'oa ma apoapoa'i le tasi i le tasi i salāmo, ma pese, ma siva fa'aleagaga, o lo'o pepese atu ai ma le fa'afetai i le Ali'i i o outou loto. O mea uma fo'i tou te faia i le tautalatala, po o le amio, ia faia uma lava ia mea i le suafa o le Ali'i o Iesu, ma le fa'afetai i le Atua le Tamā ona o Ia" (Kolose 3:15-17).

'Ou te naunau i se feso'ota'iga malosi ma Keriso - le Vine Moni. E ala i lea so'otaga, o le a mafai ona 'ou fua mai i la'u amio fua lelei ma fa'amamaluina ai lo'u Tamā i le lagi.

Li'o le Tali: Ioe Lē Mautonu

'Ou te tatalo mo fa'avae ta'ele o le fa'atuatua ma le usiusita'i ina ia fa'atumulia ma fa'apa'iaina ai lo'u loto. Ua 'ou naunau e savali fa'apei o Keriso ma, e ala i le alofa tunoa o le Atua, ia 'ou usita'i ai e tausī Āna poloa'iga pa'ia.

Li'o le Tali: Ioe Lē Mautonu

Tamā e, ua 'ou iloa e te finagalo ia fa'apa'iaina a'u. Fa'afetai tele mo le folafolaga e fa'aauau ai pea lenei galuega iā te a'u se'ia o'o i le aso e afio mai ai Keriso. O la'u molimau lea ia fai pea mai le ta'ele o lo'u loto, "Ua 'ou iloa o Ia ua 'ou fa'atuatua i ai, ma a'u mautinoa ua mafaia lava e Ia ona leoleo i le mea na 'ou tu'uina atu ai iā te Ia".

Li'o le Tali: Ioe Lē Mautonu

Li'o le Tali: Ioe Lē Mautonu

Tali o Tatalo

This image shows a single sheet of white paper with horizontal blue or grey ruling lines. The lines are evenly spaced and run across the width of the page. There are approximately 20 lines visible. The paper has a slight shadow on the right side, suggesting it's resting on a surface. The overall appearance is that of a clean, unused piece of stationery.

O le Fa'apa'iāga - Avanoa Fa'apitoa a le Kerisiano

Lesona 11

(1) E FA'APEFEA ONA OLA I LATOU O LO'O SA'ILI LE OLAGA UA FA'APA'IAINA?

Auā ua fa'aalia mai ai le amiotonu a le Atua i le fa'atuatua, ina ia fa'atuatua ai, pei ona tusia, E ola le tagata amiotonu i le fa'atuatua.

Roma 1:17

E to'atele i latou o lo'o taumafai e sa'ili ma le fa'amaoni se loto e fa'apa'iaina ma ola i se olaga mamā a e foliga mai ua na o le lē mautonu ma le fa'avaivai. Ua na o le va'ai vale iā i latou ma faitio ona ua leai so latou fa'atuatua; ona ua aunoa ma se fa'atuatua ua latou lagona ai e lē mafai e latou ona maua fa'amanuiāga a le Atua. Ua manatu sesē latou fa'apea o le lagona o le fa'atuatua lava lea. Ua latou va'ai i talatu o le faigofie o le fa'atuatua moni, ma ua matuā fa'apogisāina ai o latou agaga. E tatau iā i latou ona liliu'ese le mafaufau mai iā i latou lava, a ia fa'atumau atu i le alofa tunoa ma le agalelei o le Atua ma manatunatu i Āna folafolaga, ona tau lea ina talitonu o le a Ia fa'ataunu'uina Āna afioga. Ia tatou lē talitonu i lo tatou lava fa'atuatua, peita'i ia talitonu i folafolaga a le Atua. Pe afai tatou te salamō ona o tatou solitulafono ua mavae, ma tausisi ia fai meatonu i le lumana'i, e tatau loa ona tatou talitonu e talia tatou e le Atua ona o le sua o Keriso, ma o le a Ia fa'amagalo i a tatou agasala.

(2) I TAIMI O FAIGATĀ, O LE Ā LE MEA E MAFAI ONA FA'ALAGOLAGO I AI LE FANAU A LE ATUA?

Ua na mautinoa fo'i, e mafai iā te Ia ona faia o le mea na folafolaina e Ia.

Roma 4:21

E i ai taimi o le a o'o mai ai le pogisā ma tau fa'avaivai ai le agaga, ma e tau fa'afefe mai ia fa'ato'ilalo ai tatou, peita'i e lē tatau ona tatou tu'u'ese lo tatou talitonuga. Ia tumau la tatou va'ai iā Iesu, pe mana'o i ai pe leai. E tatau ona sa'ili ia faia ma le fa'amaoni o tatou tiute uma, ma o le a mafai ai ona tatou maua se malōlōga filemū i folafolaga a le Atua.

(3) O LE Ā LE MEA O LO'O VALA'AU MAI LE ALI'I E TATAU ONA TATOU FAIA I MEA TATOU TE POPOLE AI?

O le mea lea ia fa'amaulalo ai outou i lalo o le 'a'ao malosi o le Atua, ina ia fa'amaualugaina outou e Ia i ona pō e tatau ai. Ia tu'uina atu iā te Ia mea uma tou te popole ai, auā o lo'o manatu mai o Ia iā te outou.

I Peteru 5:6, 7

(4) O LE Ā LE MEA E MAFAI ONA MAUA AI I O TATOU LOTO LE FILEMŪ MA MAUTINOA AI LE FA'ATASI AI O KERISO?

O ē fa'alagolago iā Ieova e fa'apei o le mauga o Siona i latou, e lē fa'agae'etia, a e tumau e fa'avavau.

Salamo 125:1

E i ai taimi e tatou te lagona ai lo tatou tulaga lē aogā ma o le a oso a'e ai le mata'u i o tatou loto; peita'i e lē o se fa'amaoniga lenei ua suia le finagalo alofa o le Atua mo i tatou, pe o tatou mo Ia. Atonu o le asō ua tatou lē lagona ai se fiafia ma se filemū e pei ona i ai i le aso ananafi; peita'i e tatau ona tatou 'a'apa atu pea i le 'a'ao o Keriso ma le fa'atuatua, ma ia talitonu ato'atoa iā te Ia i le taimi pogisā e pei fo'i ona i ai i le malamalama.

Atonu o le a musumusu atu Satani, "O 'oe o se tagata e agasala tele ua lē mafai e Keriso ona lavea'i." A o e fa'ailoa atu lou tulaga agasala ma le lē aogā, a e atonu o le a e fa'afetaui lē e fa'aosooso mai ma le 'alaga, "E ala i le mana o le togiola, 'ou te 'avea Keriso ma o'u Fa'aola. 'Ou te lē tausisi i lo'u lava lelei, a e o le toto tāua o Iesu,

lea e fa'amamāina ai a'u. I lenei lava taimi o lo'o taofimau lo'u agaga vaivai e 'a'ao o Keriso." E tatau ona fa'atumaui pea le fa'atuatua ola i le olaga o le Kerisiano. O le fa'atuatua e lē vave mavae, o le fa'alagolago e maualā i luga o Keriso, o le a aumaia le filemū e mautinoa i le agaga.

(5) O LE Ā LE FOLAFOLAGA E MAFAI ONA TATOU TAPA I AI PE AFAI E TATOU TE SA'ILI PEA O IA?

'Ou te foa'i atu fo'i ia te i latou le loto e tasi, ma 'Ou foa'i atu le loto fou i totonu iā te outou; 'Ou te 'ave'eseina le loto fatu ai totonu i o latou tino, ma 'Ou foa' atu le loto 'a'ano iā te i latou.

Esekielu 11:19

'Aua ne'i fa'avaivai ina ua foliga mai ua fa'ama'a'aina lou loto. O fa'afitāuli uma, o fili uma mai totonu, o le a fa'atele ai ona e mana'omia o Keriso. Na afio mai o Ia e 'ave'ese le loto ma'a'a, a e tu'u iā te 'oe le loto 'a'ano (Esekielu 11:19). Va'ai iā te Ia mo le alofa e fa'apitoa ina ia fa'ato'ilalo ai ōu uiga sesē. Pe a osofa'ia e fa'aosoosoga, ia tumau le tete'e atu i taumafaiga leaga; ma ia fai atu i lou agaga, "E fa'apefea ona 'ou lē fa'amamaluina lo'u Fa'aola? Ua 'ou tu'u atu a'u iā Keriso; e lē mafai ona 'ou faia galuega a Satani." Ia tagi atu i le Fa'aola mo le fesoasoani e 'ave'ese atu tupua uma ma agasala uma sa pele iā te 'oe. Ia va'ai atu, e ala i mata o le fa'atuatua, iā Iesu o lo'o tula'i i luma o le nofoāli'i o le Tamā, ma tu'u atu Ōna 'a'ao manu'a a o Ia fa'atoga atu mo 'oe. Ia talitonu o le malosi e aumai iā te 'oe e ala lea mai lou Fa'aola pele.

(6) O LE Ā LE FOLAFOLAGA E MAUTINOĀ E LE FANAU A LE ATUA E MAUA AI LE FA'AMALOSI'AGA O LE A MAFAI AI ONA LAVĀTIA SAUĀGA MA FA'AOSOOSOGA O LENEI LALOLAGI?

'Aua lava e te fefe i mea o le a e tigā ai. Fa'auta, o le a tu'uina atu ni o outou e le ti'apolo i le fale puipui, ina ia tofotofoina ai outou; e pō agafulu fo'i e puapuagātia ai outou. Ia e fa'amaoni se'ia o'o i le oti, ona 'Ou avatu ai lea iā te 'oe o le pale o le ola.

Fa'aaliga 2:10

Se'i va'ai e ala i le fa'atuatua i paleali'i o lo'o teuina mo i latou oē o le a manumalō; fa'alogu i le pese fiafia a le 'au fa'aolaina, Ua tatau lava le Tama'i Mamoe na fasia ma na togiolaina tatou i le Atua! (Fa'aaliga 5:12). Taumafai ia iloa manino e moni nei va'aiga. I lana fete'ena'iga mata'utia ma ta'ita'i ma pule ma le matuā amioleaga fa'aleagaga o ē tulaga maua luga, na fa'apea atu ai Setefano, le ula'i Kerisiano na fasiotia, "Fa'auta, ua 'ou iloa le lagi ua avanoa, ma le Atali'i o le tagata o lo'o tū i le itū taumatau o le Atua" (Galuega 7:56). Sa fa'aalia iā te ia le Fa'aola o le lalolagi, o lo'o silasila ifo mai le lagi ma Lona loto naunau, ma le malamalama matagofie mai fofoga o Keriso o lo'o fa'asusuluina i luga o Setefano ma se pupula e o'o lava i ōna fili sa latou va'aia ōna foliga o lo'o susulu mai pei o foliga o se agelu.

Pe afai e tatou te fa'ataga o tatou mafaufau e tumau iā Keriso ma le lagi, ona mafai lea ona tatou maua se fa'amalosi'aga ma se lagolago e tau ai taua mo le Ali'i. O le mitamitavale ma le fiafia i le lalolagi o le a fa'aitiitia ai le malosi a o tatou mafaufau loloto i manuia o le nu'u e sili atu, ua lata ona fai ma o tatou aiga. A e lē gata i le matagofie o Keriso, o mea fa'afiafia uma fa'alalolagi o le a leai se aogā.

(7) O LE Ā LE MEA E TATAU ONA TEU MAU I O TATOU MAFAUFAU?

Ua 'ou teu i lo'u loto Lau afioga, ina ne'i 'ou agasala iā te 'Oe.

Salamo 119:11

Pe afai ua leva ona teu i o tatou loto mea fa'alalolagi, o le a faigatā ona sui o manatunatuga ua masani ai. O le mea e va'ai i ai mata ma fa'alogu i ai taliga o le a tosina malosi i ai le loto ma le mafaufau; peita'i pe afai e tatou te ūlu atu i le 'a'ai o le Atua ma tepa iā Iesu ma Lona mamalu, o le a mafai ona va'aia ai Ia e ala i mata o le fa'atuatua. E tatau ona 'avea afioga ma le amio a Keriso e fai ma autū o tatou manatunatuga ma tatou talanoāga, ma ia tatau i aso ta'itasi ona fa'avanoa le taimi fa'apitoa mo le tatalo ma le su'esu'e loloto i nei matā'upu pa'ia.

(8) O LE Ā LE FA'ATATAU A LE ATUA E UIGA I LE FA'ATAGAINA O AGASALA E FAI MA LE ILOA, UI LAVA INA E ALOFA O IA I LE TAGATA AGASALA?

E 'inosia e Ieova le ala o ē amio leaga; a e alofa o Ia i lē ua tausisi atu i le amiotonu.

Fa'ata'oto 15:9

O le fa'apa'iāga o se galuega e faia i aso ta'itasi. Ia lē fa'asesēina se tasi i le fa'apea o le a fa'amagalo ma fa'amanuiaina e le Atua i tatou a o tatou solipala se tasi o Āna fa'atonuga. O le agasala e faia ma le iloa o le a fa'afilemū ai le si'ufofoga molimau a le Agaga Pa'ia ma vavae'ese ai le tagata mai le Atua. Pe o le ā lava le fīafia e lagona ona o le talitonuga o i le tagata, e lē mafai ona afio Iesu i le loto e lē amana'ia le tulafono a le Atua. E ta'uleleia e le Atua na o i latou o ē fa'amamaluina o Ia.

(9) E FA'APEFEA ONA FA'AMAUTŪ LE MANUMALŌ I LUGA O AGASALA A O FAIA LE GALUEGA O LE FA'APA'IĀGA?

A e fa'afetai i le Atua, o Lē na te foa'iina mai le manumalō iā te i tatou talu lo tatou Ali'i o Iesu Keriso.

I Korinito 15:57

"O āna 'au'auna outou tou te 'ana'ana i ai" (Roma 6:16). Pe afai e tatou te fa'amalieina le loto ita, tu'inanau, o le mana'ofua, 'ino'ino, manatu fa'apito, po o se isi lava agasala, ua 'avea loa tatou ma 'au'auna a le agasala. "E leai se na te mafaia ona 'au'auna i ali'i e to'alua" (Mataio 6:24). Afai tatou te 'au'auna i le agasala, e lē mafai ona tatou 'au'auna iā Keriso. O le a lagona e le Kerisiano 'u'una'iga a le agasala ona o le tu'inanau o le tino e tete'e i le Agaga; peita'i o le Agaga o le a galue e tete'e pea le tino, ma o le a fa'aauau pea lea taua. O i inei e mana'omia ai le fesoasoani a Keriso. O le vaivaiga fa'aletagata o le a soso'ofa'atasi ma le malosi fa'alelagi.

(10) O LE Ā LE MEA E TATAU ONA FAIA MO LE FA'APA'IAINA O I TATOU?

Ia tatalo e lē aunoa.

I Tesalonia 5:17

Pe afai e tatou te atina'e ma fa'atupu se amio e mafai ona talia e le Atua, e tatau ona fausia i o tatou ola fa'aleagaga masaniga e tonu ma lelei. E tatau mo le tuputupu a'e i le alofa tunoa ona tatalo i aso ta'itasi, a e fa'apea fo'i mo le olaga fa'aleagaga, e pei o le mana'omia o le mea'ai mo le soifua malōlōina. O le mea lea e tatau ai ona tatou fa'amasani e si'itia a'e i le Atua i le tatalo manatunatuga i taimi uma. E tatau ona tatou taumafai e fa'amasani le mafaufau o lo'o feliuliua'i solo ina ia tumau iā Keriso. E lē mafai ona tatou saogalemū pe afai e tatou te vavae'ese mai iā Keriso. Atonu o lo'o fa'atasi pea Ia ma i tatou i la'asaga uma, a e ia tatou iloa ma usiusita'i i tulaga ua Ia tu'u mai.

(11) O LE Ā LE 'UPU FA'AAUTŪ O LE A MAFAI MO I LATOU E NAUNAU MA O LO'O SA'ILI LE OLAGA E FA'APA'IAINA?

O mea uma fo'i tou te faia i le tautalatala, po o le amio, ia faia uma lava ia mea i le suafa o le Ali'i o Iesu, ma le fa'afetai i le Atua le Tamā ona o Ia.

Kolose 3:17

E tatau ona faia le fa'atuatuāga ma matā'upu tāua o le olaga. O isi mea uma e tatau ona tu'u i lalo ifo o lea mea. O o tatou malosi uma, o le loto, tino, ma le agaga, e tatau ona fa'aogāina i le taua a le Kerisiano. E tatau iā i tatou ona tepa iā Keriso mo le malosi ma le alofa tunoa, ma o le a mautinoa e tatou te maua le manumalō e pei ona maliu Iesu mo i tatou.

(12) O LE Ā LE AUTŪ TĀUA, PE A MANATU LOLOTO I AI, E FA'AMALOSIA AI LĒ UA FA'APA'IAINA E FILIFILI E 'AU'AUNA IĀ KERISO?

Auā na tonu lo 'u manatu, 'ou te lē iloa se tasi mea iā te outou tau lava o Iesu Keriso, o Ia lava na fa'asatauroina.

I Korinito 2:2

E tatau ona tatou ō fa'alatalata atu i le satauro o Keriso. O le ulua'i lesonea e tatau ona a'oa'oina ai tatou o le salamō lea i lalo o le satauro. O ai e mafai ona malamalama i le uiga o le alofa o Iesu? O le alofa e aupito sili atu le fa'apalepale ma le lē fa'apito i lo o le alofa o le tinā! Pe ana mafai ona tatou iloa le tāua o le agaga o le tagata, e tatau ona tatou va'ai ma le fa'atuatua ola i luga o le satauro, ona amataina lea o le su'esu'ega o le a 'avea ma matā'upu ma le pese a le 'au fa'aolaina e o'o i le fa'avavau. O le aogā o la tatou taimi ma taleni e fa'atatau lea i le tele o le tau sa totogiina e togiola ai tatou. O lo tatou uiga lē fa'afetai e fa'atinoina aga'i i le Atua pe a tatou gaoi mai iā te Ia e ala i le 'ave'esea o le alofa mo Ia ma taofia la tatou 'au'aunaga. O se mea ea e tautele le tu'u atu o tatou iā te Ia, Lē na tu'u mai fa'ataulaga mea uma mo i tatou? E mafai ea ona tatou filifili e fa'auō i le lalolagi a e lē o le mamalu e lē mavae, o lo'o ofo mai e Keriso - e "Ma te nonofo fa'atasi ma A'u i Lo'u nofoāli'i, e pei o A'u fo'i ona 'Ou manumalō, ua ma nonofo fo'i fa'atasi ma Lo'u Tamā i Lona nofoāli'i" (Fa'aaliga 3:21)?

(13) E ALA I LE FA'ATATAU A PETERU, O Ā LA'ASAGA E VALU PE A MULIMULI I AI MA LE FA'AMAONI, E MAUTINOA AI O LE A FILIFILIA I TATOU?

O le mea lava lea ia outou matuā fa'amalosia ai lava, ina ia fa'aopoopoina le amio lelei i lo outou fa'atuatua, ia fa'aopoopo fo'i le poto i le amio lelei, ia fa'aopoopo fo'i le lē gaoiā i le poto, ma ia fa'aopoopo le onosa'i i le lē gaoiā, o le amio Atua fo'i i le onosa'i, ia fa'aopoopo fo'i le alofa i le 'au uso i le amio Atua, o le alofa fo'i i le alofa i le 'au uso. Auā pe a maua e outou ia mea, ma ua fa'ateleina, ona 'avea ai lea o outou ma ē ua lē paiē, a o ē fua mai le iloa lelei o lo tatou Ali'i o Iesu Keriso.

II Peteru 1:5-8

O le auala lenesi e mafai ai ona tatou mautinoa o le a lē mafai ona tatou pa'ū'ū. "O lenesi, le 'au uso e, ia atili ai ona fa'amalolosia outou ia fa'amauiina lo outou vala'auina ma lo outou filifilia, auā pe a outou faia ia mea tou te lē i'u vale lava. Auā a fa'apea, ona matuā fa'aofia ai lea o outou i le ala o le malō e fa'avavau o lo tatou Ali'i o lo tatou Fa'aola lea o Iesu Keriso" (II Peteru 1:10, 11). O i latou o lo'o galulue fa'apea i le fuafuāga mo le fa'aopoopoina o manuia fa'a-Kerisiano, ua mautinoa o le a galue le Atua i le fuafuāga e fa'atele ona fa'aopoopo iā i latou meaalofa o Lona Agaga Pa'ia. Sa tautala Peteru iā i latou o ē na maua lea fa'atuatua tāua: "Ia fa'ateleina iā te outou le alofa tunoa ma le manuia i lo outou iloa lelei le Atua, atoa ma lo tatou Ali'i o Iesu" (F. 1). E ala i le alofa tunoa o le Atua, o i latou uma e loto i ai o le a a'ea le auala pupula mai le lalolagi e o'o i le lagi, e mulimuli ane, "ma le 'alaga ma le 'oli'oli e fa'avavau" (Isaia 35:10), o le a latou ūlu atu i faitoto'a o le 'a'ai o le Atua.

(14) E FA'APEFEA ONA TAU'AVEINA E LE TAGATA LE UIGA FA'ALE-ATUA A O FEAGAI MA TOFOTOFOGA A LENEI LALOLAGI?

O lenesi, o i latou ua tiqāina e tusa ma le finagalo o le Atua, ia latou tu'uina atu ma le amio lelei o latou lava ola i Lē na faia mea uma, o Ia e fa'amaoni.

I Peteru 4:19

E mana'omia e lo tatou Fa'aola mea uma o lo'o iā i tatou; o tatou ulua'i manatunatuga ma e pito sili le pa'ia, o tatou fa'ane'ene'ega e sili ona mamā ma le alofa e matuā malosia lava. Pe afai e mautinoa ua tofusia i tatou i le uiga fa'ale-Atua, o le a i ai pea Ōna vi'iga i totonu o tatou loto ma i o tatou laugutu. E tasi le mea o le a tatou saogalemū ai o le tu'u atu atoa o i tatou iā te Ia ma ia tuputupu a'e pea i le alofa tunoa ma ia iloa le 'upu moni.

(15) E FA'APEFEA ONA MAFAI E I TATOU O KERISIANO O LO'O TUTUPU A'E, ONA TUMAU A E LĒ Ō FA'ATAFA'ESE MAI LE ALA A LE ATUA?

Inā tumau ia o outou iā te A'u, o A'u fo'i iā te outou. Fa'apei o le la e lē mafai ona fua pe a na o ia, pe afai e lē mau i le vine; a fa'apea fo'i outou, pe afai tou te lē tumau iā te A'u.

Ioane 15:4

Na fa'amamaluina e le Atua le aposetolo o Paulo, ina ua 'avea ia e ala i le fa'aaliga pa'ia i le lagi sautolu, i le mea na ia va'ai ai i va'aiga mamalu e le'i fa'atagaina ia e mafai ona fa'ailoa atu. A e le'i 'avea lea ma mea na fia fa'avi'ivi'i pe fa'alialiavale ai. Na ia iloa le tãua o le mataāla ma le fa'afitia pea o ia lava, ma na fa'apea atu, "A ou te fa'ato'ilaloina lo'u nei tino, ma a'u fai ai ma pologa, ina ne'i i'u ina lē fa'amaoni a'u, o a'u sa tala'i atu i isi tagata" (I Korinito 9:27).

(16) O LE Ā LE FA'ATONUGA NA FA'ASOA MAI E PAULO MA NA IA FA'AMAONIA MAI LANA FA'ATA'ITA'IGA?

Ia outou faia mea uma lava ma le lē muimui, ma le lē fefinaua'i; ina ia 'avea outou ma ē ua lē mata'uleagaina, ma ē ua sao le amio, o le fanau a le Atua, e lē ponā i luma o le tupulaga amio fa'api'opi'o ma le finau vale; ua pupula iā te i latou la outou amio, fa'apei o mea e fa'amalamalama a'i le lalolagi.

Filipi 2:14, 15

Na fa'apuapuagātiaina Paulo ona o le 'upu moni, a e tatou te lē o fa'alogo i ni faitiōga mai ōna laugutu. A o ia iloiloina lona olaga galue ma le agaalofo ma le osi fa'ataulaga, ua fa'apea mai ai ia, "O lo'u manatu e lē tatau ona fa'atusaina le tigā i nei ona pō ma le manuia atalī e fa'aalia mai iā te i tatou" (Roma 8:18). Ua o'o mai lava i lo tatou taimi le 'alaga manumalō mai le 'au'auna fa'amaoni a le Atua: "O ai sē na te fa'ate'a'eseina mai i tatou i le alofa o Keriso? o le puapuagā ea, po o le atuatuva'e, po o le sauā, po o le oge, po o lē lavalavā, po o le pagatia, po o le pelu? ... A ua tatou manumalō a'ia'i i nei mea uma lava, ona o la ua alofa mai iā te i tatou. Auā ua 'ou mautinoa, e lē mafaia e le oti, po o le ola, po o agelu, po o ali'i, po o ē malolosi, po o mea i nei ona pō, po o mea atalī, po o le maua'uga, po o le loloto, po o se tasi mea na faia, e lē mafaia e ia mea ona fa'ate'a'eseina mai i tatou i le alofa o le Atua, o lo'o iā Keriso Iesu lo tatou Ali'i" (Roma 8:35-39).

(17) PE A FA'ATAUNU'UINA LA TATOU FAIGAMALAGA O LENEI OLAGA A O LO'O GAUA'I ATO'ATO'A I LE FINAGALO O LE ATUA, E FA'APEI O PAULO, O LE Ā LE 'UPU E MAFAI ONA TATOU TAUTALA ATU MA LE MAUTINO'A?

Auā o a'u ua fa'amaligiina nei lo'u toto, ua lata ona pō 'ou te alu ai. Ua 'ou tau le taua lelei, ua i'u iā te a'u le tausiniōga, ua 'ou taofi i le 'upu o le fa'atuatua. O lenei, ua teuina mo a'u le pale o le amiotonu, e foa'iina mai iā te a'u i lea lava aso o le Ali'i le fa'amasino amiotonu; e lē gata fo'i iā te a'u, a o i latou uma lava o ē fiafia i Lona fa'aali mai.

II Timoteo 4:6-8

E ui ina sa tu'uina Paulo i le falepuipui i Roma - tu'u'ese ma le malamalama o le lagi, vavae'ese mai lana galuega mo le tala lelei, ma sa ta'usalaina mo lenei taimi ina ia oti ai - peita'i na te le'i gaua'i atu ia masalosalo vale pe na leai sona fa'amoemoe. Na sau lana molimau mai lea falepuipui pogisā, e tumu i le fa'atuatua ma le loto tele ma se fa'amalosi'aga i loto o le 'au pa'ia ma ē sauāina i augātupulaga uma. O āna 'upu (i le II Timoteo 4:6-8) o lo'o fa'amatala au'ilili mai ai i'uga o lea olaga ua fa'apa'iaina.

Ua osofia lava a'u i le fa'aa'oa'o a Tanielu, Ioane, ma Paulo. Ua 'ou iloa, e ala i le mana o le Atua e mafai ai, ma ona o lo'u avanoa fa'aKerisiano, e mafai ona fa'apa'iaina ai a'u i le fa'atusa o Keriso.

Li'o le Tali:

Ioe

Lē Mautonu

'Ou te iloa a o faia pea lenei galuega o le a 'ou lē lagona i taimi uma le fiafia po o le loto malie, a e mafai ona 'ou filifili e fa'alagolago i le Afioga a le Atua. O lo'u fa'amoemoe, e ala i le fa'atuatua, ina ia 'ou 'u'umau i le 'a'ao o Keriso ma talitonu ato'atoa iā te Ia i le pogisā a e fa'apea fo'i ma taimi a o i ai le malamalama.

Li'o le Tali:

Ioe

Lē Mautonu

